

Namo tassa bhagavato arahato sammāsambuddhassa

Khuddakanikāye

Theragāthāpāḷi

Nidānagāthā

Sīhānaṃva (..0019) nadantānaṃ, dāṭhīnaṃ girigabbhāre;
suṇātha bhāvitattānaṃ, gāthā atthūpanāyikā §.
Yathānāmā yathāgottā, yathādhammavihārino;
yathādhimuttā sappaññā, vihariṃsu atanditā.
Tattha tattha vipassitvā, phusitvā accutaṃ padaṃ;
katantaṃ paccavekkhantā, imamatthamabhāsisuṃ.

1. Ekakanipāto

1. Paṭhamavaggo

1. Subhūtitheragāthā

1. “Channā me kuṭikā sukhā nivātā, vassa deva yathāsukhaṃ;
cittaṃ me susamāhitaṃ vimuttaṃ, ātāpī viharāmi vassa devā” ti.
Itthaṃ sudaṃ § āyasmā subhūtithero gāthaṃ abhāsithāti.

2. Mahākoṭṭhikattheragāthā

2. “Upasanto (..0220) uparato, mantabhāṇī anuddhato;
dhunāti pāpake dhamme, dumapattaṃva māluto” ti.
Itthaṃ sudaṃ āyasmā mahākoṭṭhiko § thero gāthaṃ abhāsithāti.

3. Kaṅkhārevatattheragāthā

3. “Paññaṃ imaṃ passa tathāgatānaṃ, aggi yathā pajjalito nisithe;
ālokadā cakkhudadā bhavanti, ye āgatānaṃ vinayanti kaṅkhan” ti.

Itthaṃ sudaṃ āyasmā kaṅkhārevato thero gāthaṃ abhāsithāti.

4. Puṇṇattheragāthā

4. “Sambhireva samāsetha, paṇḍitehatthadassibhi;
atthaṃ mahantaṃ gambhīraṃ, duddasaṃ nipuṇaṃ aṇuṃ;
dhīrā samadhigacchanti, appamattā vicakkhaṇā”ti.
Itthaṃ sudaṃ āyasmā puṇṇo mantāṇiputto § thero gāthaṃ abhāsithāti.

5. Dabbattheragāthā

5. “Yo duddamiyo damena danto, dabbo santusito vitiṇṇakaṅkho;
vijitāvī apetaḥeravo hi, dabbo so parinibbuto ṭhitatto”ti.
Itthaṃ sudaṃ āyasmā dabbo thero gāthaṃ abhāsithāti.

6. Sītavanīyattheragāthā

6. “Yo (..0221) sītavanaṃ upagā bhikkhu, eko santusito samāhitatto;
vijitāvī apetalomahaṃso, rakkhaṃ kāyagatāsaṭiṃ dhitimā”ti.
Itthaṃ sudaṃ āyasmā sītavaniyo thero gāthaṃ abhāsithāti.

7. Bhalliyattheragāthā

7. “Yopānudī maccurājassa senaṃ, naḷasetuṃva sudubbalaṃ mahogho;
vijitāvī apetaḥeravo hi, danto so parinibbuto ṭhitatto”ti.
Itthaṃ sudaṃ āyasmā bhalliyō thero gāthaṃ abhāsithāti.

8. Vīrattheragāthā

8. “Yo duddamiyo damena danto, vīro santusito vitiṇṇakaṅkho;
vijitāvī apetalomahaṃso, vīro so parinibbuto ṭhitatto”ti.
Itthaṃ sudaṃ āyasmā vīro thero gāthaṃ abhāsithāti.

9. Pilindavacchattheragāthā

9. “Svāgataṃ na durāgataṃ §, nayidaṃ dumantitaṃ mama;
saṃvibhattesu dhammesu, yaṃ seṭṭhaṃ tadupāgamin”ti.
Itthaṃ sudaṃ āyasmā pilindavaccho § thero gāthaṃ abhāsithāti.

10. Puṇṇamāsattheragāthā

10. “Vihari (..0222) apekkhaṃ idha vā huraṃ vā, yo veda-ū-ū samito yatatto;

sabbesu dhammesu anūpalitto, lokassa jaññā udayabbayañcā”ti.
Itthaṃ sudaṃ āyasmā puṇṇamāso thero gāthaṃ abhāsithāti.

Vaggo paṭhamo niṭṭhito.

Tassuddānaṃ-

Subhūti koṭṭhiko thero, kaṅkhārevatasammato;
mantāṇiputto dabbo ca, sītavaniyo ca bhalliyo;
vīro pilindavaccho ca, puṇṇamāso tamonudoti.

2. Dutiyavaggo

1. Cūlavacchattheragāthā

11. “Pāmojjabahulo bhikkhu, dhamme buddhappavedite;
adhigacche padaṃ santaṃ, saṅkhārūpasamaṃ sukhan”ti.

... Cūlavaccho § thero

2. Mahāvacchattheragāthā

12. “Paññābalī sīlavatūpapanno, samāhito jhānarato satīmā;
yadatthiyaṃ bhojanaṃ bhuñjamāno, kaṅkhetha kālaṃ idha vītarāgo”ti.

... Mahāvaccho § thero

3. Vanavacchattheragāthā

13. “Nīlabbhavaṇṇā (..0223) rucirā, sītavārī sucindharā;
indagopakasañchannā, te selā ramayanti man”ti.

... Vanavaccho thero

4. Sivakasāmaṇeragāthā

14. “Upajjhāyo maṃ avaca, ito gacchāma sīvaka;
gāme me vasati kāyo, araññaṃ me gato mano;
semānakopi gacchāmi, natthi saṅgo vijānatan”ti.

... Sivako sāmaṇero

5. Kuṇḍadhānattheragāthā

15. “Pañca chinde pañca jahe, pañca cuttari bhāvaye;
pañcasaṅgātigo bhikkhu, oghatiṇṇoti vuccatī” ti.

... Kuṇḍadhāno thero....

6. Belaṭṭhasīsattheragāthā

16. “Yathāpi bhaddo ājañño, naṅgalāvattanī sikhī;
gacchatī appakasirena, evaṃ rattindivā mama;
gacchantī appakasirena, sukhe laddhe nirāmise” ti.

... Belaṭṭhasīso thero....

7. Dāsakattheragāthā

17. “Middhī yadā hoti mahagghaso ca, niddāyitā samparivattasāyī;
mahāvarāhova nivāpapuṭṭho, punappunaṃ gabbhamupeti mando” ti.

... Dāsako thero....

8. Siṅgālapituttheragāthā

18. “Ahu (..0224) buddhassa dāyādo, bhikkhu bhesakaḷāvane;
kevalaṃ aṭṭhisaññāya, aphaṛī pathaviṃ § imaṃ.

maññehaṃ kāmarāgaṃ so, khippameva pahissatī”ti §.

... Siṅgālapitā § thero....

9. Kulattheragāthā

19. § “Udakaṃ hi nayanti nettikā, usukārā namayanti § tejanaṃ.
dāruṃ namayanti tacchakā, attānaṃ damayanti subbatā”ti.

... Kulo § thero....

10. Ajitatheragāthā

20. “Maraṇe me bhayaṃ natthi, nikanti natthi jīvite;
sandehaṃ nikkhipissāmi, **sampajāno** paṭissato”ti §..

... Ajito thero

Vaggo dutiyo niṭṭhito.

Tassuddānaṃ-

Cūḷavaccho mahāvaccho, vanavaccho ca sīvako;
kuṇḍadhāno ca belaṭṭhi, dāsako ca tatopari;
siṅgālapitiko thero, kulo ca ajito dasāti.

3. Tatiyavaggo

1. Nigrodhattheragāthā

21. “Nāhaṃ bhayassa bhāyāmi, sathā no amatassa kovido;
yattha bhayaṃ nāvatiṭṭhati, tena maggena vajanti bhikkhavo”ti.

... Nigrodho thero....

2. Cittakattheragāthā

22. “Nīlā (..0225) sugīvā sikhino, morā kārambhiyaṃ § abhinadanti.
te sītavātakīlitā §, suttam jhāyaṃ § nibodhenti”ti.

... Cittako thero

3. Gosālattheragāthā

23. “Ahaṃ kho veḷugumbasmiṃ, bhutvāna madhupāyasaṃ;
padakkhiṇaṃ sammasanto, **khandhānaṃ udayabbayaṃ.**
sānuṃ paṭigamissāmi, vivekamanubrūhayan” ti.

... Gosālo thero

4. Sugandhattheragāthā

24. “Anuvassiko pabbajito, **passa dhammasudhammataṃ;**
tisso vijjā anuppattā, kataṃ buddhassa sāsanan” ti.

... Sugandho thero

5. Nandiyattheragāthā

25. “Obhāsajātaṃ phalagaṃ, cittaṃ yassa abhiṇhaso;
tādisaṃ bhikkhumāsajja, kaṇha dukkhaṃ nigacchasi” ti.

... Nandiyo thero

6. Abhayattheragāthā

26. “Sutvā subhāsitaṃ vācaṃ, buddhassādiccabandhuno;
paccabyadhiṃ hi nipuṇaṃ, vālaggaṃ usunā yathā” ti.

... Abhayo thero

7. Lomasakaṅgiyattheragāthā

27. “Dabbaṃ (..0226) kusaṃ poṭakilaṃ, usīraṃ muñjapabbajaṃ;
urasā panudissāmi, vivekamanubrūhayan” ti.

... Lomasakaṅgiyo thero

8. Jambugāmikaputtattheragāthā

28. “Kacci no vatthapasuto, kacci no bhūsanārato;
kacci sīlamayaṃ gandhaṃ, kiṃ tvaṃ vāyasi § netarā pajā”ti.

... Jambugāmikaputto thero....

9. Hāritattheragāthā

29. “Samunnamayamattānaṃ, usukārova tejanaṃ;
cittaṃ ujuṃ karitvāna, avijjaṃ bhinda hāritā”ti.

... Hārito thero....

10. Uttiyattheragāthā

30. “Ābādhe me samuppanne, sati me udapajjatha;
ābādho me samuppanno, kālo me nappamajjitun”ti.

... Uttiyo thero....

Vaggo tatiyo niṭṭhito.

Tassuddānaṃ-

Nigrodho cittako thero, gosālathero sugandho;
nandiyo abhayo thero, thero lomasakaṅgiyo;
jambugāmikaputto ca, hārito uttiyo isīti.

4. Catutthavaggo

1. Gahvaratīriyattheragāthā

31. “Phuṭṭho (..0227) ḍaṃsehi makasehi, araññasmiṃ brahāvane;
nāgo saṃgāmasīseva, **sato tatrādhivāsaya**”ti.

... Gahvaratīriyo thero....

2. Suppiyattheragāthā

32. “Ajaraṃ jīramānena, tappamānena nibbutiṃ;
nimiyaṃ § paramaṃ santiṃ, yogakkhemaṃ anuttaraṃ” ti.

... Suppiyo thero....

3. Sopākattheragāthā

33. “Yathāpi ekaputtasmiṃ, piyasmiṃ kusalī siyā;
evaṃ sabbesu pāṇesu, sabbattha kusalo siyā” ti.

... Sopāko thero....

4. Posiyattheragāthā

34. “Anāsannavarā etā, niccomeva vijānatā;
gāmā araṅṅamāgamma, tato gehaṃ upāvisi §.
tato uṭṭhāya pakkāmi, anāmantetvā § posiyo” ti.

... Posiyo thero....

5. Sāmaññakānittheragāthā

35. “Sukhaṃ sukhattho labhate tadācaram, kittiṅca pappoti yasassa vaḍḍhati;
yo ariyamaṭṭhaṅgikamañjasaṃ ujum, bhāveti maggaṃ amatassa pattiyā” ti.

... Sāmaññakānitthero....

6. Kumāputtattheragāthā

36. “Sādhu (..0228) sutam sādhu caritakam, sādhu sadā aniketavihāro;
atthapucchanaṃ padakkhiṇakammaṃ, etaṃ sāmaññamakiṅcanassā” ti.

... Kumāputto thero....

7. Kumāputtasahāyakattheragāthā

37. “Nānājanapadaṃ yanti, vicarantā asaññatā;
samādhiñca virādhenti, kiṃsu raṭṭhacariyā karissati;
tasmā vineyya sārambhaṃ, jhāyeyya apurakkhato” ti.

... Kumāputtattherassa sahāyako thero....

8. Gavampatittheragāthā

38. “Yo iddhiyā sarabhuṃ aṭṭhapesi, so gavampati asito

anejo;
taṃ sabbasaṅgātigataṃ mahāmuniṃ, devā namassanti bhavassa pāragun”-
ti.

... Gavampatitthero....

9. Tissattheragāthā

39. §“Sattiyā viya omaṭṭho, ḍayhamānova § matthake.
kāmarāgappahānāya, sato bhikkhu paribbaje”ti.

... Tisso thero....

10. Vaḍḍhamānattheragāthā

40. “Sattiyā viya omaṭṭho, ḍayhamānova matthake;
bhavarāgappahānāya, sato bhikkhu paribbaje”ti.

... Vaḍḍhamāno thero....

Vaggo catuttho niṭṭhito.

Tassuddānaṃ-

Gahvaratīriyo (..0229) suppiyo, sopāko ceva posiyo;
sāmaññakāni kumāputto, kumāputtasahāyako;
gavampati tissatthero, vaḍḍhamāno mahāyasoti.

5. Pañcamavaggo

1. Sirivaḍḍhattheragāthā

41. “Vivaramanupatanti vijjutā, vebhārassa ca paṇḍavassa ca;
nagavivaragato ca jhāyati, putto appaṭimassa tādino”ti.

... Sirivaḍḍho thero....

2. Khadiravanīyattheragāthā

42. “Cāle upacāle sīsūpacāle () § patissatā § nu kho viharatha.
āgato vo vālaṃ viya vedhī” ti.

... Khadiravaniyo thero....

3. Sumaṅgalattheragāthā

43. “Sumuttiko sumuttiko sāhu, sumuttikomhi tīhi khujjakehi;
asitāsu mayā naṅgalāsu, mayā khuddakuddālāsu mayā.
Yadipi idhameva idhameva, atha vāpi alameva alameva;
jhāya sumaṅgala jhāya sumaṅgala, appamatto vihara sumaṅgalā” ti.

... Sumaṅgalo thero....

4. Sānuttheragāthā

44. § “Mataṃ vā amma rodanti, yo vā jīvaṃ na dissati;
jīvantaṃ maṃ amma passantī, kasmā maṃ amma rodasī” ti.

... Sānutthero....

5. Ramaṇīyavīhārittheragāthā

45. “Yathāpi (..0230) bhaddo ājañño, khalitvā patititṭhati;
evaṃ dassanasampannaṃ, sammāsambuddhasāvakan” ti.

... Ramaṇīyavīhāritthero....

6. Samiddhittheragāthā

46. “Saddhāyāhaṃ pabbajito, agārasmānagāriyaṃ;
Sati paññā ca me vuḍḍhā, cittaṅca susamāhitaṃ.
kāmaṃ karassu rūpāni, neva maṃ byādhayissasī” ti §.

... Samiddhitthero....

7. Ujjayattheragāthā

47. “Namo te buddha vīratthu, vippamuttosi sabbadhi;
tuyhāpadāne viharaṃ, viharāmi anāsavo” ti.

... Ujjayo thero....

8. Sañjayattheragāthā

48. “Yato ahaṃ pabbajito, agārasmānagāriyaṃ;
nābhijānāmi saṅkappaṃ, anariyaṃ dosasaṃhitaṃ” ti.

... Sañjajo thero....

9. Rāmaṇeyyakattheragāthā

49. “Cihacihābhinadite Ṣ, sippikābhirutehi ca;
na me taṃ phandati cittaṃ, ekattanirataṃ hi me” ti.

... Rāmaṇeyyako thero....

10. Vimalattheragāthā

50. “Dharaṇī (..0231) ca siñcati vāti, māluto vijjutā carati nabhe;
upasamanti vitakkā, cittaṃ susamāhitaṃ mamā” ti.

... Vimalo thero....

Vaggo pañcama niṭṭhito.

Tassuddānaṃ-

Sirīvaḍḍho revato thero, sumaṅgalo sānusavhayo;
ramaṇiyavihārī ca, samiddhi-ujjayasañjayā;
rāmaṇeyyo ca so thero, vimalo ca raṇañjahoti.

6. Chaṭṭhavaggo

1. Godhikattheragāthā

51. “Vassati devo yathā sugītaṃ, channā me kuṭikā sukhā nivātā;
cittaṃ susamāhitañca mayhaṃ, atha ce patthayasi pavassa devā” ti.

... Godhiko thero

2. Subāhuttheragāthā

52. “Vassati devo yathā sugītaṃ, channā me kuṭikā sukhā nivātā;
Cittaṃ susamāhitañca kāye, atha ce patthayasi pavassa devā” ti.

... Subāhutthero

3. Valliyattheragāthā

53. “Vassati devo yathā sugītaṃ, channā me kuṭikā sukhā nivātā;
tassaṃ viharāmi appamatto, atha ce patthayasi pavassa devā” ti.

... Valliyo thero

4. Uttiyattheragāthā

54. “Vassati (..0232) devo yathā sugītaṃ, channā me kuṭikā sukhā nivātā;
tassaṃ viharāmi adutiyo, atha ce patthayasi pavassa devā” ti.

... Uttiyo thero

5. Añjanavaniyattheragāthā

55. “Āsandiṃ kuṭikaṃ katvā, ogayha añjanaṃ vanaṃ;
tisso vijjā anuppattā, kataṃ buddhassa sāsanan” ti.

... Añjanavaniyo thero

6. Kuṭivihārittheragāthā

56. “Ko kuṭikāyaṃ bhikkhu kuṭikāyaṃ, vītarāgo susamāhitacitto;
evaṃ jānāhi āvuso, amoghā te kuṭikā katā” ti.

... Kuṭivihāritthero....

7. Dutiyakuṭivihārittheragāthā

57. “Ayamāhu purāṇiyā kuṭi, aññaṃ patthayase navam kuṭim;
āsam kuṭiyā virājaya, dukkhā bhikkhu puna navā kuṭi” ti.

... Dutiyaṅkuṭivihāritthero

8. Ramaṇiyakuṭikattheragāthā

58. “Ramaṇiyā me kuṭikā, saddhādeyyā manoramā;
na me attho kumārīhi, yesam attho tahiṃ gacchatha nāriyo” ti.

... Ramaṇiyakuṭiko thero

9. Kosalavihārittheragāthā

59. “Saddhāyāham (..0233) pabbajito, araṇṇe me kuṭikā katā;
appamatto ca ātāpī, sampajāno patissato” ti §.

... Kosalavihāritthero

10. Sīvalittheragāthā

60. “Te me ijjhimsu saṅkappā, yadattho pāvisim kuṭim;
vijjāvimuttiṃ paccesaṃ, mānānusayamujjahan” ti.

... Sīvalitthero

Vaggo chaṭṭho niṭṭhito.

Tassuddānaṃ-

Godhiko ca subāhu ca, valliyo uttiyo isi;
añjanavaniyo thero, duve kuṭivihārino;
ramaṇiyakuṭiko ca, kosalavhayasīvaliti.

7. Sattamavaggo

1. Vappattheragāthā

61. “Passati passo passantaṃ, apassantañca passati;
apassanto apassantaṃ, passantañca na passati” ti.

... Vappo thero

2. Vajjiputtattheragāthā

62. “Ekakā mayaṃ araññe viharāma, apaviddhaṃva vanasmiṃ dārukaṃ;
tassa me bahukā pihayanti, nerayikā viya saggagāminan” ti.

... Vajjiputto thero

3. Pakkhattheragāthā

63. “Cutā (..0234) patanti patitā, giddhā ca punarāgatā;
kataṃ kiccaṃ rataṃ rammaṃ, sukhenanvāgataṃ sukhan” ti.

... Pakkho thero

4. Vimalakoṇḍaññattheragāthā

64. “Dumavhayāya uppanno, jāto paṇḍaraketunā;
ketuhā ketunāyeva, mahāketuṃ padhaṃsayī” ti.

... Vimalakoṇḍañño thero

5. Ukkhepakatavacchattheragāthā

65. “Ukkhepakatavacchassa, saṅkalitaṃ bahūhi vassehi;
taṃ bhāsati gahaṭṭhānaṃ, sunisino uḷārapāmojjo” ti.

... Ukkhepakatavaccho thero

6. Meghiyattheragāthā

66. “Anusāsi mahāvīro, sabbadhammāna pāragū;
tassāhaṃ dhammaṃ sutvāna, vihāsiṃ santike sato;

tisso vijjā anuppattā, kataṃ buddhassa sāsanan” ti.

... Meghiyo thero

7. Ekadhammasavaniyattheragāthā

67. “Kilesā jhāpitā mayhaṃ, bhavā sabbe samūhatā;
vikkhīṇo jātiṣaṃsāro, natthi dāni punabbhavo” ti.

... Ekadhammasavaniyo thero

8. Ekudāniyattheragāthā

68. § “Adhicitaso appamajjato, munino monapathesu sikkhato.
sokā na bhavanti tādino, upasantassa sadā satīmato” ti.

... Ekudāniyo thero

9. Channattheragāthā

69. “Sutvāna (..0235) dhammaṃ mahato mahārasaṃ, sabbaññutaññāṇava-
rena desitaṃ;
maggam papajjim § amatassa pattiyā, so yogakkhemassa pathassa kovido” -
ti.

... Channo thero

10. Puṇṇattheragāthā

70. “Sīlameva idha aggaṃ, paññavā pana uttamo;
manussesu ca devesu, sīlapaññāṇato jayan” ti.

... Puṇṇo thero

Vaggo sattamo niṭṭhito.

Tassuddānaṃ-

Vappo ca vajjiputto ca, pakkho vimalakoṇḍañño;
ukkhepakatavaccho ca, megghiyo ekadhammiko;
ekudāniyachannā ca, puṇṇatthero mahabbaloti.

8. Aṭṭhamavaggo

1. Vacchapālattheragāthā

71. “Susukhumanipuṇatthadassinā, matikusalena nivātavuttinā;
saṃsevitavuddhasīlinā §, nibbānaṃ na hi tena dullabhan”ti.

... Vacchapālo thero

2. Ātumattheragāthā

72. “Yathā (..0236) kaḷīro susu vaḍḍhitaggo, dunnikkhamo hoti pasākhajāto;
evaṃ ahaṃ bhariyāyānitāya, anumaññaṃ maṃ pabbajitomi dānī”ti.

... Ātumo thero

3. Māṇavattheragāthā

73. “Jiṇṇaṅca disvā dukhitaṅca byādhitaṃ, mataṅca disvā gatamāyusa-
ñkhayaṃ;
tato ahaṃ nikkhamitūna pabbajim, pahāya kāmāni manoramāni”ti.

... Māṇavo thero

4. Suyāmanattheragāthā

74. “Kāmacchando ca byāpādo, thinamiddhaṅca § bhikkhuno.
uddhaccaṃ vicikicchā ca, sabbasova na vijjati”ti.

... Suyāmano thero

5. Susāradattheragāthā

75. “Sādhū suvhitāna dassanaṃ, kaṅkhā chijjati buddhi vaḍḍhati;
bālampi karonti paṇḍitaṃ, tasmā sādhu sataṃ samāgamo” ti.

... Susārado thero....

6. Piyañjahattheragāthā

76. “Uppatantesu nipate, nipatantesu uppate;
vase avasamānesu, ramamānesu no rame” ti.

... Piyañjaho thero

7. Hatthārohaputtattheragāthā

77. “Idaṃ (..0237) pure cittamacāri cārikaṃ, yenicchakaṃ yatthakāmaṃ yathā-sukhaṃ;
tadajjahaṃ niggahessāmi yoniso, hatthippabhinnaṃ viya aṅkusaggaho” ti.

... Hatthārohaputto thero

8. Meṇḍasirattheragāthā

78. “Anekajātiṣaṃsāraṃ, sandhāvissaṃ anibbisaṃ;
tassa me dukkhajātassa, dukkhakkhandho aparaddho” ti.

... Meṇḍasiro thero

9. Rakkhitattheragāthā

79. “Sabbo rāgo pahīno me, sabbo doso samūhato;
sabbo me vigato moho, sītibhūtosmi nibbuto” ti.

... Rakkhito thero

10. Uggattheragāthā

80. “Yaṃ (..0238) mayā pakataṃ kammaṃ, appaṃ vā yadi vā bahuṃ;
sabbametaṃ parikkhīṇaṃ, natthi dāni punabbhavo” ti.

... Uggo thero

Vaggo aṭṭhamo niṭṭhito.

Tassuddānaṃ-

Vacchapālo ca yo thero, ātumo māṇavo isi;
suyāmano susārado, thero yo ca piyañjaho;

ārohaputto meṇḍasiro, rakkhito uggasavhayoti.

9. Navamavaggo

1. Samitiguttatheragāthā

81. “Yaṃ mayā pakataṃ pāpaṃ, pubbe aññāsu jātisu;
idheva taṃ vedanīyaṃ, vatthu aññaṃ na vijjati” ti.

... Samitigutto thero

2. Kassapatheragāthā

82. “Yena yena subhikkhāni, sivāni abhayāni ca;
tena puttaka gacchassu, mā sokāpahato bhavā” ti.

... Kassapo thero

3. Sīhattheragāthā

83. “Sīhappamatto vihara, rattindivamatandito;
bhāvehi kusalaṃ dhammaṃ, jaha sīghaṃ samussayan” ti.

... Sīho thero

4. Nītattheragāthā

84. “Sabbarattiṃ supitvāna, divā saṅgaṇike rato;
kudāssu nāma dummedho, dukkhassantaṃ karissati” ti.

... Nīto thero

5. Sunāgattheragāthā

85. “Cittanimittassa kovido, pavivekarasaṃ vijāniya;
jhāyaṃ nipako patissato, adhigaccheyya sukhaṃ nirāmisān” ti.

... Sunāgo thero

6. Nāgitattheragāthā

86. “Ito bahiddhā puthu aññavādinaṃ, maggo na nibbānagamo yathā ayaṃ;
itissu saṅghaṃ bhagavānusāsati, satthā sayamaṃ pāṇitaleva dassayaṃ” ti.

... Nāgito thero

7. Paviṭṭhattheragāthā

87. “Khandhā (..0239) diṭṭhā yathābhūtaṃ, bhavā sabbe padālitā;
vikkhīṇo jātiśamsāro, natthi dāni punabbhavo” ti.

... Paviṭṭho thero

8. Ajjunattheragāthā

88. “Asakkhiṃ vata attānaṃ, uddhātuṃ udakā thalaṃ;
vuyhamāno mahogheva, saccāni paṭivijjhahan” ti.

... Ajjuno thero

9. (paṭhama)-devasabhattheragāthā

89. “Uttiṇṇā paṅkapalipā, pātālā parivajjitā;
mutto oghā ca ganthā ca, sabbe mānā viśaṃhatā” ti.

... Devasabho thero

10. Sāmidattattheragāthā

90. “Pañcakkhandhā pariññātā, tiṭṭhanti chinnaṃūlakā;
vikkhīṇo jātiśamsāro, natthi dāni punabbhavo” ti.

... Sāmidatto thero

Vaggo navamo niṭṭhito.

Tassuddānaṃ-

Thero samitigutto ca, kassapo sīhasavhayo;
nīto sunāgo nāgito, pavitṭho ajjuno isi;
devasabho ca yo thero, sāmīdatto mahabbaloti.

10. Dasamavaggo

1. Paripuṇṇakatheragāthā

91. “Na tathā mataṃ satarasaṃ, sudhannaṃ yaṃ mayajja paribhuttaṃ;
aparimitadassinā gotamena, buddhena desito dhammo” ti.

... Paripuṇṇako thero

2. Vijayattheragāthā

92. “Yassāsavā (..0240) parikkhīṇā, āhāre ca anissito;
suññatā animitto ca, vimokkho yassa gocaro;
ākāseva sakuntānaṃ, padaṃ tassa durannayan” ti.

... Vijayo thero

3. Erakattheragāthā

93. “Dukkā kāmā eraka, na sukhā kāmā eraka;
yo kāme kāmāyati, dukkhaṃ so kāmāyati eraka;
yo kāme na kāmāyati, dukkhaṃ so na kāmāyati erakā” ti.

... Erako thero

4. Mettājitttheragāthā

94 “Namo hi tassa bhagavato, sakyaputtassa sirīmato;
tenāyaṃ aggappattena, aggadhammo § sudesito” ti.

... Mettaji thero....

5. Cakkhupālattheragāthā

95. “Andhohaṃ hatanettosmi, kantāraddhānapakkhando §.
sayamānopi gacchissaṃ, na sahāyena pāpenā”ti.

... Cakkhupālo thero....

6. Khaṇḍasumanattheragāthā

96. “Ekapupphaṃ cajitvāna, asīti § vassakoṭiyo.
saggesu paricāretvā, sesakenamhi nibbuto”ti.

... Khaṇḍasumano thero....

7. Tissattheragāthā

97. “Hitvā satapalaṃ kaṃsaṃ, sovaṇṇaṃ satarājikaṃ;
aggahiṃ mattikāpattaṃ, idaṃ dutiyābhisecanaṃ” ti.

... Tisso thero

8. Abhayattheragāthā

98. “Rūpaṃ (..0241) disvā sati muṭṭhā, piyaṃ nimittaṃ manasikaroto;
sārattacitto vedeti, tañca ajjhosa tiṭṭhati;
tassa vaḍḍhanti āsavā, bhavamūlopagāmino” ti §.

... Abhayo thero

9. Uttiyattheragāthā

99. “Saddaṃ sutvā sati muṭṭhā, piyaṃ nimittaṃ manasikaroto;
sārattacitto vedeti, tañca ajjhosa tiṭṭhati;
tassa vaḍḍhanti āsavā, saṃsāraṃ upagāmino” ti.

... Uttiyo thero

10. (dutiya)-devasabhattheragāthā

100. “Sammappadhānasampanno, satipaṭṭhānagocaro;
vimuttikusumasañchanno, parinibbissatyanāsavo” ti.

... Devasabho thero

Vaggo dasamo niṭṭhito.

Tassuddānaṃ-

Paripuṇṇako ca vijayo, erako mettajī muni;
cakkhupālo khaṇḍasumano, tisso ca abhayo tathā;
uttiyo ca mahāpañño, thero devasabhopi cāti.

11. Ekādasamavaggo

1. Belaṭṭhānikattheragāthā

101. “Hitvā gihittaṃ anavositatto, mukhanaṅgalī odariko kusīto;
mahāvarāhova nivāpapuṭṭho, punappunaṃ gabbhamupeti mando” ti.

... Belaṭṭhāniko thero

2. Setucchattheragāthā

102. “Mānena (.0242) vañcitāse, saṅkhāresu saṃkilissamānāse;
lābhālābhena mathitā, samādhiṃ nādhigacchanti” ti.

... Setuccho thero

3. Bandhurattheragāthā

103. “Nāhaṃ etena atthiko, sukhito dhammarasena tappito;
pitvā § rasaggamuttamaṃ, na ca kāhāmi visena santhavan” ti.

... Bandhuro § thero

4. Khitakattheragāthā

104. “Lahuko vata me kāyo, phuṭṭho ca pītisukhena vipulena;
tūlamiva eritaṃ mālutena, pilavatīva me kāyo” ti.

... Khitako thero

5. Malitavambhattheragāthā

105. “Ukkaṇṭhitopi na vase, ramamānopi pakkame;
na tvevānatthasaṃhitāṃ, vase vāsaṃ vicakkhaṇo” ti.

... Malitavambho thero

6. Suhemantattheragāthā

106. “Sataliṅgassa atthassa, satalakkhaṇadhārino;
ekaṅgadassī dummedho, satadassī ca paṇḍito” ti.

... Suhemanto thero

7. Dhammasavattheragāthā

107. “Pabbajiṃ (..0243) tulayitvāna, agārasmānagāriyaṃ;
tisso vijjā anuppattā, kataṃ buddhassa sāsanan” ti.

... Dhammasavo thero

8. Dhammasavapituttheragāthā

108. “Sa vīsavassasatiko, pabbajiṃ anagāriyaṃ;
tisso vijjā anuppattā, kataṃ buddhassa sāsanan” ti.

... Dhammasavapitu thero

9. Saṅgharakkhitattheragāthā

109. “Na nūnāyaṃ paramahitānukampino, rahogato anuvigaṇeti sāsanaṃ;
tathāhayaṃ viharati pākatindriyo, migī yathā taruṇajātikā vane” ti.

... Saṅgharakkhito thero

10. Usabhattheragāthā

110. “Nagā nagaggesu susaṃvirūḷhā, udaggameghena navena sittā;
vivekakāmassa araṅṅasaṅṅino, janeti bhiyyo usabhassa kalyatan” ti.

... Usabho thero

Vaggo ekādasamo niṭṭhito.

Tassuddānaṃ-

Beḷaṭṭhāniko setuccho, bandhuro khitako isi;
malitavambho suhemanto, dhammasavo dhammasavapitā;
saṅgharakkhitatthero ca, usabho ca mahāmunīti.

12. Dvādasamavaggo

1. Jentattheragāthā

111. “Duppabbajjaṃ (..0244) ve duradhivāsā gehā, dhammo gambhīro duradhi-
gamā bhogā;

kicchā vutti no itarītareneva, yuttaṃ cintetuṃ satatamaniccataṃ” ti.

... Jento thero

2. Vacchagottattheragāthā

112. “Tevijjohaṃ mahājhāyī, cetosamathakovido;

sadattho me anuppatto, kataṃ buddhassa sāsanā” ti.

... Vacchagotto thero

3. Vanavacchattheragāthā

113. “Acchodikā puthusilā, gonaṅgulamigāyutā;

ambusevālasañchannā, te selā ramayanti maṇ” ti.

... Vanavaccho thero

4. Adhimuttattheragāthā

114. “Kāyaduṭṭhullagaruno, hiyyamānamhi § jīvite;

sarīrasukhagiddhassa, kuto samaṇasādhitā” ti.

... Adhimutto thero

5. Mahānāmattheragāthā

115. “Esāvahiyyase pabbatena, bahukuṭṭajasallakikena §.
nesādakena girinā, yasassinā paricchadenā”ti.

... Mahānāmo thero

6. Pārāpariyattheragāthā

116. “Chaphassāyatane (..0245) hitvā, guttadvāro susaṃvuto;
aghamūlaṃ vāmitvāna, patto me āsavakkhayo”ti.

... Pārāpariyo § thero

7. Yasattheragāthā

117. “Suvilitto suvasano,sabbābharaṇabhūsito;

tisso vijjā ajjhagamiṃ, kataṃ buddhassa sāsanan” ti.

... Yaso thero

8. Kimilattheragāthā

118. “Abhisattova nipatati, vayo rūpaṃ aññamiva tatheva santaṃ;
tasseva sato avippavasato, aññasseva sarāmi attānan” ti.

... Kimilo § thero

9. Vajjiputtattheragāthā

119. “Rukkhamūlagahanaṃ pasakkiya, nibbānaṃ hadayasmiṃ opiya;
jhāya gotama mā ca pamādo, kiṃ te biḷibīlikā karissatī” ti.

... Vajjiputto thero

10. Isidattattheragāthā

120. “Pañcakkhandhā pariññātā, tiṭṭhanti chinnamūlakā;
dukkhakkhayo anuppatto, patto me āsavakkhayo” ti.

... Isidatto thero

Vaggo dvādasamo niṭṭhito.

Tassuddānaṃ-

Jento (..0246) ca vacchagotto ca, vaccho ca vanasavhayo;
adhimutto mahānāmo, pārāpariyo yasopi ca;
kimilo vajjiputto ca, isidatto mahāyasoti.

Ekakanipāto niṭṭhito.

Tatruddānaṃ-

Vīsuttarasataṃ therā, katakiccā anāsavā;
ekakeva nipātamhi, susaṅgītā mahesibhīti.

2. Dukanipāto

1. Paṭhamavaggo

1. Uttaratheragāthā

121. “Natthi (..0247) koci bhavo nicco, saṅkhārā vāpi sassatā;
uppajjanti ca te khandhā, cavanti aparāparaṃ.

122. “Etamādīnaṃ ñatvā, bhavenamhi anattiko;
nissaṭṭo sabbakāmehi, patto me āsavakkhayo” ti.

Itthaṃ sudaṃ āyasmā uttaro thero gāthāyo abhāsithāti.

2. Piṇḍolabhāradvājattheragāthā

123. “Nayidaṃ anayena jīvitaṃ, nāhāro hadayassa santiko;
āhāraṭṭhitiko samussayo, iti disvāna carāmi esanaṃ.

124. “Paṅkoti hi naṃ pavedayuṃ, yāyaṃ vandanapūjanā kulesu;
sukhumaṃ sallaṃ durubbahaṃ, sakkāro kāpurisena dujjaho” ti.

Itthaṃ sudaṃ āyasmā piṇḍolabhāradvājo thero gāthāyo abhāsithāti.

3. Valliyattheragāthā

125. “Makkaṭṭo pañcadvārāyaṃ, kuṭikāyaṃ pasakkiya;
dvārena anupariyeti, ghaṭṭayanto muhuṃ muhuṃ.

126. “Tiṭṭha makkaṭṭa mā dhāvi, na hi te taṃ yathā pure;
niggahītosī paññāya, neva dūraṃ gamissatī” ti.

... Valliyo thero....

4. Gaṅgātīriyattheragāthā

127. “Tiṇṇaṃ (..0248) me tālapattānaṃ, gaṅgātīre kuṭī katā;
chavasittova me patto, paṃsukūlañca cīvaraṃ.

128. “Dvinnaṃ antaravassānaṃ, ekā vācā me bhāsītā;
tatiye antaravassamhi, tamokhandho § padālito” ti.

... Gaṅgātīriyo thero....

5. Ajinattheragāthā

129. “ Api ce hoti tevijjo, maccuhāyī anāsavo;
appaññātoti naṃ bālā, avajānanti ajānatā.
130. “ Yo ca kho annapānassa, lābhī hotīdha puggalo;
pāpadhammopi ce hoti, so nesaṃ hoti sakkato” ti.

... Ajino thero

6. Meḷajinattheragāthā

131. “ Yadāhaṃ dhammamassosiṃ, bhāsamānassa satthuno;
na kaṅkhamabhijānāmi, sabbaññū-aparājite.
132. “ Satthavāhe mahāvīre, sārathīnaṃ varuttame;
magge paṭipadāyaṃ vā, kaṅkhā mayhaṃ na vijjatī” ti.

... Meḷajino thero

7. Rādhattheragāthā

133. § “ Yathā agāraṃ ducchannaṃ, vuṭṭhī samativijjhati;
evaṃ abhāvitaṃ cittaṃ, rāgo samativijjhati.
134. § “ Yathā agāraṃ succhannaṃ, vuḍḍhī na samativijjhati;
evaṃ subhāvitaṃ cittaṃ, rāgo na samativijjhati” ti.

... Rādho thero

8. Surādhattheragāthā

135. “ Khīṇā (..0249) hi mayhaṃ jāti, vusitaṃ jinasāsanam;
pahīno jālasaṅkhāto, bhavanetti samūhatā.
136. “ Yassatthāya pabbajito, agārasmānagāriyaṃ;
so me attho anuppatto, sabbasaṃyojanakkhayo” ti.

... Surādho thero

9. Gotamattheragāthā

137. “ Sukhaṃ supanti munayo, ye itthīsu na bajjhare;

sadā ve rakkhittabbāsu, yāsu saccaṃ sudullabhaṃ.
138. “Vadhaṃ carimha te kāma, anaṇḍā dāni te mayaṃ;
gacchāma dāni nibbānaṃ, yattha gantvā na socatī” ti.

... Gotamo thero

10. Vasabhattheragāthā

139. “Pubbe hanati attānaṃ, pacchā hanati so pare;
suhataṃ hanti attānaṃ, vītaṃseneva pakkhimā.
140. “Na brāhmaṇo bahivaṇṇo, anto vaṇṇo hi brāhmaṇo;
yasmimṃ pāpāni kammāni, sa ve kaṇho sujampatī” ti.

... Vasabho thero

Vaggo paṭhamo niṭṭhito.

Tassuddānaṃ-

Uttaro ceva piṇḍolo, valliyo tīriyo isi;
ajino ca meḷajino, rādho surādho gotamo;
vasabhena ime honti, dasa therā mahiddhikāti.

2. Dutiyavaggo

1. Mahācundattheragāthā

141. “Sussūsā (..0250) sutavaddhanī, sutamṃ paññāya vaddhanaṃ;
paññāya atthaṃ jānāti, ñāto attho sukhāvaho.
142. “Sevetha pantāni senāsanāni, careyya saṃyojanavippamokkhaṃ;
sace ratiṃ nādhigaccheyya tattha, saṅghe vase rakkhittatto

satimā”ti.

... Mahācundo thero

2. Jotidāsattheragāthā

143. “Ye kho te veṭhamissena §, nānattena ca kammunā.
manusse uparundhanti, pharusūpakkamā janā;
tepi tattheva kīranti, na hi kammaṃ panassati.
144. “Yaṃ karoti naro kammaṃ, kalyāṇaṃ yadi pāpakaṃ;
tassa tasseva dāyādo, yaṃ yaṃ kammaṃ pakubbatī”ti.

... Jotidāso thero

3. Heraññakānittheragāthā

145. “Accayanti ahorattā, jīvitam uparujjhati;
āyu khīyati maccānaṃ, kunnadīnaṃva odakaṃ.
146. “Atha pāpāni kammāni, karaṃ bālo na bujjhati;
pacchāssa kaṭukaṃ hoti, vipāko hissa pāpako”ti.

... Heraññakānitthero

4. Somamittattheragāthā

147. “Parittaṃ dārumāruyha, yathā sīde mahaṇṇave;
evaṃ kusītamāgamma, sādhujīvīpi sīdati;
tasmā taṃ parivajjeyya, kusītaṃ hīnavīriyaṃ.
148. “Pavivittehi (..0251) ariyehi, pahitattehi jhāyibhi;
niccaṃ āradhaviṛiyehi, paṇḍitehi sahāvase”ti.

... Somamitto thero

5. Sabbamittattheragāthā

149. “Jano janamhi sambaddho §, janamevassito jano;
jano janena heṭṭhiyati, heṭṭeti ca § jano janaṃ.
150. “Ko hi tassa janenatto, janena janitena vā;

janaṃ ohāya gacchaṃ taṃ, heṭhayitvā § bahuṃ janan”ti.

... Sabbamitto thero....

6. Mahākāḷattheragāthā

151. “Kāḷi itthī brahatī dhaṅkarūpā, satthiñca bhetvā aparañca satthiṃ;
bāhañca bhetvā aparañca bāhaṃ, sīsañca bhetvā dadhithālakamva;
esā nisinnā abhisandahitvā.

152. “Yo ve avidvā upadhiṃ karoti, punappunaṃ dukkhamupeti mando;
tasmā pajānaṃ upadhiṃ na kayirā, māhaṃ puna bhinnasiro sayissan”ti §.

... Mahākāḷo thero....

7. Tissattheragāthā

153. “Bahū sapatte labhati, muṇḍo saṅghāṭipāruto;
lābhī annassa pānassa, vatthassa sayanassa ca.

154. “Etamādīnavaṃ ñatvā, sakkāresu mahabbhayaṃ;
appalābho anavassuto, sato bhikkhu paribbaje”ti.

... Tisso thero....

8. Kimilattheragāthā

155. “Pācīnavaṃsadāyamhi (..0252), sakyaputtā sahāyakā;
pahāyānappake bhoge, uñchāpattāgate ratā.

156. “Āraddhavīriyā pahitattā, niccaṃ daḷhaparakkamā;
ramanti dhammaratiyā, hitvāna lokiyaṃ ratin”ti.

... Kimilo § thero....

9. Nandattheragāthā

157. “Ayoniso manasikārā, maṇḍanaṃ anuyuñjisaṃ;
uddhato capalo cāsimaṃ, kāmarāgena aṭṭito.

158. “Upāyakusalenāhaṃ, buddhenādiccabandhunā;
yoniso paṭipajjitvā, bhava cittaṃ udabbahin”ti.

... Nando thero....

10. Sirimattheragāthā

159. “Pare ca naṃ pasaṃsanti, attā ce asamāhito;
moghaṃ pare pasaṃsanti, attā hi asamāhito.

160. “Pare ca naṃ garahanti, attā ce susamāhito;
moghaṃ pare garahanti, attā hi susamāhito” ti.

... Sirimā thero....

Vaggo dutiyo niṭṭhito.

Tassuddānaṃ-

Cundo ca jotidāso ca, thero heraṅṅakāni ca;
somamitto sabbamitto, kālo tisso ca kimilo §.
nando ca sirimā ceva, dasa therā mahiddhikāti.

3. Tatiyavaggo

1. Uttarattheragāthā

161. “Khandhā (..0253) mayā pariṅṅātā, taṅhā me susamūhatā;
bhāvitā mama bojjhaṅgā, patto me āsavakkhayo.

162. “Sohaṃ khandhe pariṅṅāya, abbahitvāna § jāliniṃ;
bhāvayitvāna bojjhaṅge, nibbāyissaṃ anāsavo” ti.

... Uttaro thero....

2. Bhaddajittheragāthā

163. “Panādo nāma so rājā, yassa yūpo suvaṇṇayo;
tiriyaṃ soḷasubbedho §, ubbhamāhu § saḥassadhā.

164. “Sahassakaṇḍo satageṇḍu, dhajālu haritāmoyo;
anaccuṃ tattha gandhabbā, chasahassāni sattadhā” ti.

... Bhaddajitthero....

3. Sobhitattheragāthā

165. “ Satimā paññavā bhikkhu, āradhabalavīriyo;
pañca kappasatānāhaṃ, ekarattiṃ anussariṃ.
166. “ Cattāro satipaṭṭhāne, satta aṭṭha ca bhāvayaṃ;
pañca kappasatānāhaṃ, ekarattiṃ anussarin”ti.

... Sobhito thero....

4. Valliyattheragāthā

167. “ Yaṃ kiccaṃ daḷhavīriyena, yaṃ kiccaṃ boddhumicchatā;
karissaṃ nāvarajjhissaṃ §, passa vīriyaṃ parakkama.
168. “ Tvañca me maggamakkhāhi, añjasaṃ amatogadhaṃ;
ahaṃ monena monissaṃ, gaṅgāsotova sāgaran”ti.

... Valliyo thero....

5. Vītasokattheragāthā

169. “ Kese (..0254) me olikhissanti, kappako upasaṅkami;
tato ādāsamādāya, sarīraṃ paccavekkhisaṃ.
170. “ Tuccho kāyo adissittha, andhakāro tamo byagā;
sabbe coḷā samucchinnā, natthi dāni punabbhavo”ti.

... Vītasoko thero....

6. Puṇṇamāsattheragāthā

171. “Pañca nīvaraṇe hitvā, yogakkhemassa pattiyā;
dhammādāsaṃ gahetvāna, ñāṇadassanamattano.
172. “Paccavekkhiṃ imaṃ kāyaṃ, sabbaṃ santarabāhiraṃ;
ajjhatañca bahiddhā ca, tuccho kāyo adissathā”ti.

... Puṇṇamāso thero

7. Nandakattheragāthā

173. “Yathāpi bhaddo ājañño, khalitvā patitiṭṭhati;
bhiyyo laddāna saṃvegaṃ, adīno vahate dhuraṃ.
174. “Evaṃ dassanasampannaṃ, sammāsambuddhasāvakaṃ;
ājānīyaṃ maṃ dhāretha, puttaṃ buddhassa orasan”ti.

... Nandako thero

8. Bharatattheragāthā

175. “Ehi nandaka gacchāma, upajjhāyassa santikaṃ;
sīhanādaṃ nadissāma, buddhaseṭṭhassa sammukhā.
176. “Yāya no anukampāya, amhe pabbājayī muni;
so no attho anupatto, sabbasaṃyojanakkhaya”ti.

... Bharato thero

9. Bhāradvājattheragāthā

177. “Nadanti (..0255) evaṃ sappaññā, sīhāva girigabbhare;
vīrā vijitasaṅgāmā, jetvā māraṃ savāhaniṃ §.
178. “Satthā ca pariciṇṇo me, dhammo saṅgho ca pūjito;
ahañca vitto sumano, puttaṃ disvā anāsavan”ti.

... Bhāradvājo thero

10. Kaṇhadinnattheragāthā

179. “Upāsītā sappurisā, sutā dhammā abhiṇhaso;
sutvāna paṭipajjissaṃ, añjasaṃ amatogadhaṃ.

180. “Bhavarāgahatassa me sato, bhavarāgo puna me na vijjati;
na cāhu na ca me bhavissati, na ca me etarahi vijjati” ti.

... Kaṇhadinno thero

Vaggo tatiyo niṭṭhito.

Tassuddānaṃ-

Uttaro bhaddajitthero, sobhito valliyo isi;
vītasoko ca yo thero, puṇṇamāso ca nandako;
bharato bhāradvājo ca, kaṇhadinno mahāmuniṭi.

4. Catutthavaggo

1. Migasiratheragāthā

181. “Yato ahaṃ pabbajito, sammāsambuddhasāsane;
vimuccamāno uggacchiṃ, kāmadhātuṃ upaccagaṃ.

182. “Brahmuno pekkhamānassa, tato cittaṃ vimucci me;
akuppā me vimuttīti, sabbasaṃyojanakkhayā” ti.

... Migasiro thero

2. Sivakattheragāthā

183. “Aniccāni (..0256) gahakāni, tattha tattha punappunaṃ;
gahakāraṃ § gavesanto, dukkhā jāti punappunaṃ.

184. “Gahakāraka diṭṭhosi, puna gehaṃ na kāhasi;
sabbā te phāsukā bhaggā, thūṇikā § ca vidālītā §.
vimariyādikataṃ cittaṃ, idheva vidhamissati” ti.

... Sivako § thero

3. Upavāṇattheragāthā

185. “Arahaṃ sugato loke, vātehābādhito § muni;

sace uṇhodakaṃ atthi, munino dehi brāhmaṇa.
186. “Pūjito pūjaneyyānaṃ §, sakkareyyāna sakkato;
apacitopaceyyānaṃ §, tassa icchāmi hātave” ti.

... Upavāṇo thero

4. Isidinnattheragāthā

187. “Diṭṭhā mayā dhammadharā upāsakā, kāmā aniccā iti bhāsamānā;
sārattarattā maṇikuṇḍalesu, puttesu dāresu ca te apekkhā.

188. “Addhā na jānanti yatodha dhammaṃ, kāmā aniccā iti cāpi āhu;
rāgañca tesam na balatthi chettuṃ, tasmā sitā puttadāraṃ dhanañcā” ti.

... Isidinno thero

5. Sambulakaccānattheragāthā

189. “Devo (..0257) ca vassati devo ca gaḷagaḷāyati,
ekako cāhaṃ bherave bile viharāmi;

tassa mayhaṃ ekakassa bherave bile viharato,
natthi bhayaṃ vā chambhitattaṃ vā lomahaṃso vā.

190. “Dhammatā mamasā yassa me, ekakassa bherave bile;
viharato natthi bhayaṃ vā, chambhitattaṃ vā lomahaṃso vā” ti.

... Sambulakaccāno § thero

6. Nitakattheragāthā

191. § “Kassa selūpamaṃ cittaṃ, ṭhitaṃ nānupakampati.
virattaṃ rajanīyesu, kuppanīye na kuppati;

yassevaṃ bhāvitaṃ cittaṃ, kuto taṃ dukkhamessati.

192. “Mama selūpamaṃ cittaṃ, ṭhitaṃ nānupakampati;
virattaṃ rajanīyesu, kuppanīye na kuppati;
mamevaṃ bhāvitaṃ cittaṃ, kuto maṃ dukkhamessati” ti.

... Nitako § thero

7. Soṇapoṭiriyattheragāthā

193. “Na tāva supituṃ hoti, ratti nakkhattamālinī;

paṭijaggitumevesā, ratti hoti vijānatā.

194. “Hatthikkhandhāvapatitaṃ, kuñjaro ce anukkame;
saṅgāme me mataṃ seyyo, yañce jīve parājito”ti.

... Soṇo poṭiriyo § thero

8. Nisabhattheragāthā

195. “Pañca (..0258) kāmaguṇe hitvā, piyarūpe manorame;
saddhāya gharā nikkhamma, dukkhassantakaro bhava.

196. “Nābhinandāmi maraṇaṃ, nābhinandāmi jīvitaṃ;
kālañca paṭikañkhāmi, sampajāno patissato”ti.

... Nisabho thero

9. Usabhattheragāthā

197. “Ambapallavasāṅkāsaṃ, aṃse katvāna cīvamaṃ;
nisinno hatthigīvāyaṃ, gāmaṃ piṇḍāya pāvisiṃ.

198. “Hatthikkhandhato oruyha, saṃvegaṃ alabhiṃ tadā;
sohaṃ ditto tadā santo, patto me āsavakkhayo”ti.

... Usabho thero

10. Kappaṭakurattheragāthā

199. “Ayamiti kappaṭo kappaṭakuro, acchāya atibharitāya Ṣ.
amataghaṭikāyaṃ dhammakaṭamatto Ṣ, katapadaṃ jhānāni ocetuṃ.
200. “Mā kho tvaṃ kappaṭa pacālesi, mā tvaṃ upakaṇṇamhi tāḷessaṃ;
na hi Ṣ tvaṃ kappaṭa mattamaññāsi, saṅghamajjhamhi pacalāyamānoti.

... Kappaṭakuro thero....

Vaggo catuttho niṭṭhito.

Tassuddānaṃ-

Migasiro (..0259) sivako ca, upavāno ca paṇḍito;
isidino ca kaccāno, nitako ca mahāvasī;
poṭiriyaputto nisabho, usabho kappaṭakuroti.

5. Pañcamavaggo

1. Kumārakassapattheragāthā

201. “Aho buddhā aho dhammā, aho no sattu sampadā;
yattha etādisaṃ dhammaṃ, sāvako sacchikāhi” ti.
202. “Asaṅkheyyesu kappesu, sakkāyādhigatā ahū;
tesamayaṃ pacchimako, carimoyaṃ samussayo;
jātimaraṇasaṃsāro, natthi dāni punabbhavo” ti.

... Kumārakassapo thero....

2. Dhammapālattheragāthā

203. “Yo have daharo bhikkhu, yuñjati buddhasāsane;
jāgaro sa hi suttesu Ṣ, amoghaṃ tassa jīvitaṃ.
204. “Tasmā saddhañca silañca, pasādaṃ dhammadassanaṃ;
anuyuñjetha medhāvī, saraṃ buddhāna sāsanaṃ” ti.

... Dhammapālo thero....

3. Brahmālittheragāthā

205. “Kassindriyāni samathaṅgatāni, assā yathā sārathinā sudantā;
pahīnamānassa anāsavassa, devāpi kassa § pihayanti tādino” ti.
206. § “Mayhindriyāni (..0260) samathaṅgatāni, assā yathā sārathinā sudantā.
pahīnamānassa anāsavassa, devāpi mayhaṃ pihayanti tādino” ti.

... Brahmāli thero

4. Mogharājattheragāthā

207. “Chavipāpaka cittabhaddaka, mogharāja satataṃ samāhito;
hemantikasītakālarattiyo §, bhikkhu tvamasi kathaṃ karissasi” .
208. “Sampannasassā magadhā, kevalā iti me sutamaṃ;
palālacchannako seyyamaṃ, yathaññe sukhajīvino” ti.

... Mogharājā thero

5. Visākhapañcālaputtattheragāthā

209. “Na ukkhipe no ca parikkhipe pare, okkhipe pāragataṃ na eraye;
na cattavaṇṇamaṃ parisāsu byāhare, anuddhato sammitabhāṇi subbato.
210. “Susukhumanipuṇatthadassinā, matikusalena nivātavuttinā;
saṃsevitavuddhasīlinā, nibbānamaṃ na hi tena dullabhan” ti.

... Visākho pañcālaputto thero

6. Cūḷakattheragāthā

211. “Nadanti morā susikhā supekhuṇā, sunīlagivā sumukhā sugajjino;
susaddalā cāpi mahāmahī ayamaṃ, subyāpitambu suvalāhakaṃ nabhamaṃ.
212. “Sukallarūpo (..0261) sumanassa jhāyataṃ §, sunikkamo sādhu subuddha-
sāsane.
susukkasukkaṃ nipuṇamaṃ sududdasaṃ, phusāhi taṃ uttamamaccutamaṃ pada-
n” ti.

... Cūḷako § thero

7. Anūpamattheragāthā

213. “Nandamānāgataṃ cittaṃ, sūlamāropamānakaṃ;
tena teneva vajasi, yena sūlaṃ kaliṅgaram.

214. “Tāhaṃ cittakaliṃ brūmi, taṃ brūmi cittadubbhakaṃ;
sathā te dullabho laddho, mānatthe maṃ niyojayī”ti.

... Anūpamo thero....

8. Vajjitattheragāthā

215. “Saṃsaraṃ dīghamaddhānaṃ, gatisu parivattisaṃ;
apassaṃ ariyasaccāni, andhabhūto § puthujjano.

216. “Tassa me appamattassa, saṃsārā vinaḷikatā;
sabbā gatī samucchinnā, natthi dāni punabbhavo”ti.

... Vajjito thero....

9. Sandhitattheragāthā

217. “Assatthe haritobhāse, saṃvirūḷhamhi pādape;
ekaṃ buddhagataṃ saññaṃ, alabhitthaṃ § patissato.

218. “Ekatiṃse ito kappe, yaṃ saññamalabhiṃ tadā;
tassā saññāya vāhasā, patto me āsavakkhayo”ti.

... Sandhito thero....

Vaggo pañcamaṃ niṭṭhito.

Tassuddānaṃ-

Kumārakassapo (..0262) thero, dhammapālo ca brahmāli;
mogharājā visākho ca, cūḷako ca anūpamo;
vajjito sandhito thero, kilesarajavāhanoti.

Dukanipāto niṭṭhito.

Tatruddānaṃ-

gāthādukanipātamhi, navuti ceva aṭṭha ca;
therā ekūnapaññāsaṃ, bhāsītā nayakovidāti.

3. Tikanipāto

1. Aṅgaṇikabhāradvājattheragāthā

219. “Ayonī (..0263) suddhimanvesaṃ, aggīṃ paricariṃ vane;
suddhimaggaṃ ajānanto, akāsiṃ amaraṃ tapaṃ §.
220. “Taṃ sukheṇa sukhaṃ laddhaṃ, passa dhammasudhammataṃ;
tisso vijjā anuppattā, kataṃ buddhassa sāsanaṃ.
221. “Brahmabandhu pure āsiṃ, idāni khomhi brāhmaṇo;
tevijjo nhātako § camhi, sottiyo camhi vedagū” ti.

... Aṅgaṇikabhāradvājo therō

2. Paccayattheragāthā

222. “Pañcāhāhaṃ pabbajito, sekho appattamānaso,
vihāraṃ me pavitṭhassa, cetaso paṇidhī ahu.
223. “Nāsissaṃ na pivissāmi, vihārato na nikkhame;
napi passaṃ nipātessaṃ, taṇhāsalle anūhate.

224. “Tassa mevaṃ viharato, passa vīriyaparakkamaṃ;
tisso vijjā anuppattā, kataṃ buddhassa sāsanan” ti.

... Paccayo thero

3. Bākulattheragāthā

225. “Yo pubbe karaṇīyāni, pacchā so kātumicchati;
sukhā so dhaṃsate ṭhānā, pacchā ca manutappati.

226. “Yañhi kayirā tañhi vade, yaṃ na kayirā na taṃ vade;
akarontaṃ bhāsamānaṃ, pariḷānanti paṇḍitā.

227. “Susukhaṃ (..0264) vata nibbānaṃ, sammāsambuddhadesitaṃ;
asokaṃ virajaṃ khemaṃ, yattha dukkhaṃ nirujjhatī” ti.

... Bākulo § thero

4. Dhaniyattheragāthā

228. “Sukhaṃ ce jīvitum icche, sāmaññasmiṃ apekkhavā;
saṅghikaṃ nātimaññeyya, cīvaraṃ pānabhojanaṃ.

229. “Sukhaṃ ce jīvitum icche, sāmaññasmiṃ apekkhavā;
ahi mūsikasobbhaṃva, sevetha sayanāsanaṃ.

230. “Sukhaṃ ce jīvitum icche, sāmaññasmiṃ apekkhavā;
itarītarena tusseyya, ekadhammañca bhāvaye” ti.

... Dhaniyo thero

5. Mātaṅgaputtattheragāthā

231. “Atisītaṃ ati-uṇhaṃ, atisāyamidaṃ ahu;
iti vissaṭṭhakammante, khaṇā accenti māṇave.

232. “Yo ca sītañca uṇhañca, tiṇā bhiyyo na maññati;
karaṃ purisakiccāni, so sukhaṃ na vihāyati.

233. “Dabbaṃ kusaṃ poṭakilaṃ, usīraṃ muñjapabbajaṃ;
urasā panudissāmi, vivekamanubrūhayan” ti.

... Mātaṅgaputto thero

6. Khujjasobhitattheragāthā

234. “Ye cittakathī bahussutā, samaṇā pāṭaliputtavāsino;
tesaññataroyamāyuvā, dvāre tiṭṭhati khujjasobhito.
235. “Ye (..0265) cittakathī bahussutā, samaṇā pāṭaliputtavāsino;
tesaññataroyamāyuvā, dvāre tiṭṭhati māluterito.
236. “Suyuddhena suyiṭṭhena, saṅgā mavijayena ca;
brahmacariyānuciṇṇena, evāyaṃ sukhamedhatī”ti.

... Khujjasobhito thero....

7. Vāraṇattheragāthā

237. “Yodha koci manussesu, parapāṇāni hiṃsati;
asmā lokā paramhā ca, ubhayā dhaṃsate naro.
238. “Yo ca mettena cittena, sabbapāṇānukampati;
bahuñhi so pasavati, puññaṃ tādisako naro.
239. “Subhāsītassa sikkhetha, samaṇūpāsanassa ca;
ekāsanassa ca raho, cittavūpasamassa cā”ti.

... Vāraṇo thero....

8. Vassikattheragāthā

240. “Ekopi saddho medhāvī, assaddhānīdha ñātinam;
dhammaṭṭho sīlasampanno, hoti atthāya bandhunam.
241. “Niggayha anukampāya, coditā ñātayo mayā;
ñātibandhavapemena, kāraṃ katvāna bhikkhusu.
242. “Te abbhatītā kālaṅkatā, pattā te tidivaṃ sukhaṃ;
bhātaro mayhaṃ mātā ca, modanti kāmakāmino”ti.

... Vassiko § thero....

9. Yasojattheragāthā

243. “Kālapabbaṅgasaṅkāso, kiso dhamanisanthato;
mattaññū annapānamhi, adīnamanaso naro”.
244. “Phuṭṭho (..0266) ḍaṃsehi makasehi, araññasmiṃ brahāvane;
nāgo saṅgāmasīseva, sato tatrādhivāsaya.
245. “Yathā brahmā tathā eko, yathā devo tathā duve;
yathā gāmo tathā tayo, kolāhalaṃ tatuttarin”ti.

... Yasojo thero

10. Sāṭimattiyattheragāthā

246. “Ahu tuyhaṃ pure saddhā, sā te ajja na vijjati;
yaṃ tuyhaṃ tuyhamevetamaṃ, natthi duccharitaṃ mama.
247. “Aniccā hi calā saddā, evamaṃ diṭṭhā hi sā mayā;
rajjantipi virajjanti, tattha kiṃ jiyate muni.
248. “Paccati munino bhattaṃ, thokaṃ thokaṃ kule kule;
piṇḍikāya carissāmi, atthi jaṅghabalaṃ § mamā”ti.

... Sāṭimattiyo thero

11. Upālittheragāthā

249. “Saddhāya abhinikkhamma, navapabbajito navo;
mitte bhajeyya kalyāṇe, suddhājīve atandite.
250. “Saddhāya abhinikkhamma, navapabbajito navo;
saṅghasmiṃ viharaṃ bhikkhu, sikkhetha vinayaṃ budho.
251. “Saddhāya abhinikkhamma, navapabbajito navo;
kappākappesu kusalo, careyya apurakkhato”ti.

... Upālitthero

12. Uttarapālattheragāthā

252. “Paṇḍitaṃ vata maṃ santaṃ, alamaṭṭhavicintakaṃ;
pañca kāmagaṇā loke, sammohā pātayimsu maṃ.
253. “Pakkhanda māraṇisaye, daḷhasallasamappito;
asakkhiṃ maccurājassa, ahaṃ pāsā pamuccituṃ.
254. “Sabbe (..0267) kāmā pahīnā me, bhavā sabbe padālitā §.
vikkhīṇo jātiṣaṃsāro, natthi dāni punabbhavo”ti.

... Uttarapālo thero

13. Abhibhūtattheragāthā

255. “Suṇātha ñātayo sabbe, yāvantettha samāgatā;
dhammaṃ vo desayissāmi, dukkhā jāti punappunaṃ.
256. § “Ārambhatha § nikkamatha, yuñjatha buddhasāsane.
dhunātha maccuno senaṃ, naḷāgāraṃva kuñjaro.
257. “Yo imasmiṃ dhammavinaye, **appamatto** vihassati §.
pahāya jātisaṃsāraṃ, dukkhassantaṃ karissati” ti.

... Abhibhūto thero....

14. Gotamatheragāthā

258. “Saṃsaraṃ hi nirayaṃ agacchissaṃ, petalokamagamaṃ punappunaṃ;
dukkhamamhipi tiracchānayaniyaṃ, nekadhā hi vusitaṃ ciraṃ mayā.
259. “Mānusopi ca bhavobhirādhito, saggakāyamagamaṃ sakiṃ sakiṃ;
rūpadhātusu arūpadhātusu, nevasaññisu asaññisuṭṭhitaṃ.

260. “Sambhavā suviditā asārakā, saṅkhatā pacalitā saderitā;
taṃ viditvā mahamattasambhavaṃ, santimeva satimā samajjhagan” ti.

... Gotamo thero....

15. Hāritattheragāthā

261. “Yo pubbe karaṇīyāni, pacchā so kātumicchati;
sukhā so dhaṃsate ṭhānā, pacchā ca manutappati.

262. “Yañhi (..0268) kayirā tañhi vade, yaṃ na kayirā na taṃ vade;
akarontaṃ bhāsamānaṃ, parijānanti paṇḍitā.

263. “Susukhaṃ vata nibbānaṃ, sammāsambuddhadesitaṃ;
asokaṃ virajaṃ khemaṃ, yattha dukkhaṃ nirujjhati” ti.

... Hārito thero....

16. Vimalattheragāthā

264. “Pāpamitte vivajjetvā, bhajeyyuttamapuggalaṃ;
ovāde cassa tiṭṭheyya, patthento acalaṃ sukhaṃ.

265. “Parittaṃ dārumāruyha, yathā sīde mahaṇṇave;
evaṃ kusītamāgamma, sādhuḥjīvīpi sīdati;
tasmā taṃ parivajjeyya, kusītaṃ hīnavīriyaṃ.

266. “Pavivittehi ariyehi, pahitattehi jhāyibhi;
niccaṃ āraddhavīriyehi, paṇḍitehi sahāvase” ti.

... Vimalo thero....

Tikanipāto niṭṭhito.

Tatruddānaṃ-

Aṅgaṇiko bhāradvājo, paccayo bākulo isi;
dhaniyo mātaṅgaputto, sobhito vāraṇo isi.
Vassiko ca yasojo ca, sāṭimattiyupāli ca;
uttarapālo abhibhūto, gotamo hāritopi ca.
Thero tikanipātamhi, nibbāne vimalo kato;
aṭṭhatālisa gāthāyo, therā soḷasa kittitāti.

4. Catukanipāto

1. Nāgasamālattheragāthā

267. “Alaṅkatā (..0269) suvasanā, mālinī candanussadā;
majjhe mahāpathe nārī, turiye naccati naṭṭakī.
268. “Piṇḍikāya pavitṭhohaṃ, gacchanto naṃ udikkhisam;
alaṅkataṃ suvasanaṃ, maccupāsaṃva oḍḍitaṃ.
269. “Tato me manasikāro, yoniso udapajjatha;
ādīnavo pāturahu, nibbidā samatiṭṭhatha §.
270. “Tato cittaṃ vimucci me, passa dhammasudhammataṃ;
tisso vijjā anuppattā, kataṃ buddhassa sāsanan” ti.

... Nāgasamālo thero

2. Bhaguttheragāthā

271. “Ahaṃ middhena pakato, vihārā upanikkhamiṃ;
caṅkamaṃ abhiruhanto, tattheva papatiṃ chamā.
272. “Gattāni parimajjitvā, punapāruyha caṅkamaṃ;
caṅkame caṅkamiṃ sohaṃ, ajjhattaṃ susamāhito.
273. “Tato me manasikāro, yoniso udapajjatha;
ādīnavo pāturahu, nibbidā samatiṭṭhatha.
274. “Tato cittaṃ vimucci me, passa dhammasudhammataṃ;
tisso vijjā anuppattā, kataṃ buddhassa sāsanan” ti.

... Bhagutthero

3. Sabhiyattheragāthā

275. § “Pare ca na vijānanti, mayamettha yamāmase;
ye ca tattha vijānanti, tato sammanti medhagā.
276. “Yadā ca avijānantā, iriyantiyamarā viya;
vijānanti ca ye dhammaṃ, āturesu anāturā.
277. “Yaṃ (..0270) kiñci sithilaṃ kammaṃ, saṃkiliṭṭhañca yaṃ vataṃ;
saṅkassaraṃ brahmacariyaṃ, na taṃ hoti mahapphalaṃ.
278. “Yassa sabrahmacārīsu, gāravo nūpalabbhati;
ārakā hoti saddhammā, nabhaṃ puthaviyā yathā” ti.

... Sabhiyo thero

4. Nandakattheragāthā

279. “Dhiratthu pūre duggandhe, mārapakkhe avassute;
navasotāni te kāye, yāni sandanti sabbadā.
280. “Mā purāṇaṃ amaññittho, māsādesi tathāgate;
saggepi te na rajjanti, kimaṅgaṃ pana § mānuse.
281. “Ye ca kho bālā dummedhā, dummantī mohapārutā;
tādisā tattha rajjanti, mārakhittamhi bandhane.
282. “Yesaṃ rāgo ca doso ca, avijjā ca virājitā;
tādī tattha na rajjanti, chinnaṣuttā abandhanā” ti.

... Nandako thero

5. Jambukattheragāthā

283. “Pañcapaññāsavassāni, rajojallamadhārayiṃ;
bhuñjanto māsikaṃ bhattaṃ, kesamassaṃ alocayiṃ.
284. “Ekapādena aṭṭhāsiṃ, āsanaṃ parivajjayiṃ;
sukkhagūthāni ca khādiṃ, uddesañca na sādiyiṃ.
285. “Etādisaṃ karitvāna, bahuṃ duggatigāminaṃ;
vuyhamāno mahoghena, buddhaṃ saraṇamāgamaṃ.
286. “Saraṇagamaṇaṃ passa, passa dhammasudhammataṃ;
tisso vijjā anuppattā, kataṃ buddhassa sāsanaṃ” ti.

... Jambuko thero

6. Senakattheragāthā

287. “Svāgataṃ (..0271) vata me āsi, gayāyaṃ gayaphagguyā;
yaṃ addasāsiṃ sambuddhaṃ, desentaṃ dhammamuttamaṃ.
288. “Mahappabhaṃ gaṇācariyaṃ, aggapattaṃ vināyakaṃ;
sadevakassa lokassa, jinaṃ atuladassanaṃ.
289. “Mahānāgaṃ mahāvīraṃ, mahājutimanāsavaṃ;
sabbāsavaparikkhīṇaṃ, satthāramakutobhayaṃ.
290. “Ciraṣaṃkiliṭṭhaṃ vata maṃ, diṭṭhisandānabandhitaṃ §.
vimocayi so bhagavā, sabbaganthehi senakaṃ” ti.

... Senako thero

7. Sambhūtattheragāthā

291. “Yo dandhakāle tarati, taraṇīye ca dandhaye;
ayoni § saṃvidhānena, bālo dukkhaṃ nigacchati.
292. “Tassatthā parihāyanti, kāḷapakkheva candimā;
āyasakyañca § pappoti, mittehi ca virujjhati.
293. “Yo dandhakāle dandheti, taraṇīye ca tāraye;
yoniso saṃvidhānena, sukhaṃ pappoti paṇḍito.
294. “Tassatthā paripūrenti, sukkapakkheva candimā;
yaso kittiñca pappoti, mittehi na virujjhatī” ti.

... Sambhūto thero

8. Rāhulattheragāthā

295. “Ubhayeneva sampanno, rāhulabhaddoti maṃ vidū;
yañcamhi putto buddhassa, yañca dhammesu cakkhumā.
296. “Yañca me āsavā khīṇā, yañca natthi punabbhavo;
arahā dakkhiṇeyyomhi, tevijjo amataddaso.
297. “Kāmandhā (..0272) jālapacchannā, taṇhāchādanachāditā;
pamattabandhunā baddhā, macchāva kumināmukhe.
298. “Taṃ kāmamaṃ ahamujjhivā, chetvā mārassa bandhanaṃ;
samūlaṃ taṇhamabbuyh, sītibhūtosmi nibbuto” ti.

... Rāhulo thero

9. Candanattheragāthā

299. “Jātarūpena sañchannā §, dāsīgaṇapurakkhatā;
aṅkena puttamādāya, bhariyā maṃ upāgami.
300. “Tañca disvāna āyantim, sakaputtassa mātaraṃ;
alaṅkataṃ suvasanaṃ, maccupāsaṃva oḍḍitaṃ.
301. “Tato me manasikāro, yoniso udapajjatha;
ādīnavo pāturahu, nibbidā samatiṭṭhatha.
302. “Tato cittaṃ vimucci me, **passa dhammasudhammataṃ**;
tisso vijjā anuppattā, kataṃ buddhassa sāsanan” ti.

... Candano thero

10. Dhammattheragāthā

303. § “Dhammo have rakkhati dhammacāriṃ, dhammo suciṇṇo sukhamāva-
hati.
esānisaṃso dhamme suciṇṇe, na duggatiṃ gacchati dhammacārī.
304. § “Nahi dhammo adhammo ca, ubho samavipākino;
adhammo nirayaṃ neti, dhammo pāpeti suggatiṃ.
305. “Tasmā hi dhammesu kareyya chandaṃ, iti modamāno sugatena tādīnā;
dhamme ṭhitā sugatavarassa sāvakā, nīyanti dhīrā saraṇavaraggagāmino.
306. “Vipphoṭito (..0273) gaṇḍamūlo, taṇhājālo samūhato;

so khīṇasaṃsāro na catthi kiñcanaṃ,
cando yathā dosinā puṇṇamāsiyan”ti.

... Dhammiko thero....

11. Sappakattheragāthā

- 307.** “Yadā balākā sucipaṇḍaracchadā, kāḷassa meghassa bhayena tajjitā;
palehiti ālayamālayesinī, tadā nadī ajakaraṇī rameti maṃ.
- 308.** “Yadā balākā suvisuddhapaṇḍarā, kāḷassa meghassa bhayena tajjitā;
pariyesati leṇamaleṇadassinī, tadā nadī ajakaraṇī rameti maṃ.
- 309.** “Kaṃ nu tattha na ramenti, jambuyo ubhato tahim;
sobhenti āpagākūlaṃ, mama leṇassa § pacchato.
- 310.** “Tā matamadasaṅghasuppahīnā,
bhekā mandavatī panādayanti;
‘nājja girinadīhi vippavāsasamayo,
khemā ajakaraṇī sivā surammā”ti.

... Sappako thero....

12. Muditattheragāthā

- 311.** “Pabbajim jīvikatthohaṃ, laddhāna upasampadam;
tato saddhaṃ paṭilabhim, daḷhavīriyo parakkamim.
- 312.** “Kāmaṃ bhijjatuyam kāyo, maṃsapesī visīyarum §.
ubho jaṇṇukasandhīhi, jaṅghāyo papatantu me.
- 313.** “Nāsissam (..0274) na pivissāmi, vihārā ca na nikkhame;
napi passam nipātesam, taṇhāsalle anūhate.
- 314.** “Tassa mevaṃ viharato, passa vīriyaparakkamaṃ;
tisso vijjā anuppattā, kataṃ buddhassa sāsanan”ti.

... Mudito thero....

Catukkanipāto niṭṭhito.

Tatruddānaṃ-

Nāgasamālo bhagu ca, sabhiyo nandakopi ca;
jambuko senako thero, sambhūto rāhulopi ca.
Bhavati candano thero, dasete § buddhasāvaka;

dhammiko sappako thero, mudito cāpi te tayo;
gāthāyo dve ca paññāsa, therā sabbepi terasāti §.

5. Pañcakanipāto

1. Rājadattatheragāthā

315. “Bhikkhu (..0275) sivathikaṃ § gantvā, addasa itthimujjhitam.
apaviddham susānasmim, khajjantiṃ kimihī phuṭam.
316. “Yañhi eke jigucchanti, mataṃ disvāna pāpakaṃ;
kāmarāgo pāturahu, andhova savatī § ahum.
317. “Oraṃ odanapākamhā, tamhā ṭhānā apakkamiṃ;
satimā sampajānoham, ekamantaṃ upāvisiṃ.
318. “Tato me manasīkāro, yoniso udapajjatha;
ādīnavo pāturahu, nibbidā samatiṭṭhatha.
319. “Tato cittaṃ vimucci me, passa dhammasudhammataṃ;
tisso vijjā anuppattā, kataṃ buddhassa sāsanan”ti.

... Rājadatto thero

2. Subhūtatheragāthā

320. “Ayoge yuñjamattānaṃ, puriso kiccamicchako §.
caraṃ ce nādhigaccheyya, ‘taṃ me dubbhagalakkhaṇam’.
321. “Abbūḷham aghagataṃ vijitaṃ, ekañce ossajeyya kalīva siyā;
sabbānīpi ce ossajeyya andhova siyā, samavisamassa adassanato.
322. “Yañhi kayirā tañhi vade, yaṃ na kayirā na taṃ vade;
akarontaṃ bhāsamānaṃ, pariñānanti paṇḍitā.
323. § “Yathāpi ruciraṃ pupphaṃ, vaṇṇavantaṃ agandhakaṃ;
evaṃ subhāsītā vācā, aphaḷā hoti akubbato.
324. § “Yathāpi (..0276) ruciraṃ pupphaṃ, vaṇṇavantaṃ sugandhakaṃ §.
evaṃ subhāsītā vācā, saphalā hoti kubbato”ti §.

... Subhūto thero

3. Girimānandattheragāthā

325. “Vassati devo yathā sugītaṃ, channā me kuṭikā sukhā nivātā;
tassaṃ viharāmi vūpasanto, atha ce patthayasī pavassa deva.

326. “Vassati devo yathā sugītaṃ, channā me kuṭikā sukhā nivātā;

- tassaṃ viharāmi santacitto, atha ce patthayasī pavassa deva.
- 327.** “Vassati devo ...pe... tassaṃ viharāmi vītarāgo ...pe....
- 328.** “Vassati devo ...pe... tassaṃ viharāmi vītadoso ...pe....
- 329.** “Vassati devo ...pe... tassaṃ viharāmi vītamoho;
atha ce patthayasī pavassa devā” ti.

... Girimānando thero....

4. Sumanattheragāthā

- 330.** “Yaṃ patthayāno dhammesu, upajjhāyo anuggahi;
amataṃ abhikaṅkhantaṃ, kataṃ kattabbakaṃ mayā.
- 331.** “Anuppatto sacchikato, sayaṃ dhammo anītiho;
visuddhiññaṃ nikkaṅkho, byākaromi tavantike.
- 332.** “Pubbenivāsaṃ jānāmi, dibbacakkhu visodhitam;
sadattho me anuppatto, kataṃ buddhassa sāsanaṃ.
- 333.** “Appamattassa me sikkhā, sussutā tava sāsane;
sabbe me āsavā khīṇā, natthi dāni punabbhavo.
- 334.** “Anusāsi (..0277) maṃ ariyavatā, anukampi anuggahi;
amogho tuyhamovādo, antevāsimhi sikkhito” ti.

... Sumano thero....

5. Vaḍḍhattheragāthā

- 335.** “Sādhū hi kira me mātā, patodaṃ upadaṃsayi;
yassāhaṃ vacanaṃ sutvā, anusitṭho janettiyā;
āraddhavīriyo pahitatto, patto sambodhimuttamaṃ.
- 336.** “Arahā dakkhiṇeyyomhi, tevijjo amataddaso;
jetvā namucino senaṃ, viharāmi anāsavo.
- 337.** “Ajjhattañca bahiddhā ca, ye me vijjiṃsu āsavā;
sabbe asesā ucchinnā, na ca uppajjare puna.
- 338.** “Visāradā kho bhaginī, etamatthaṃ abhāsayi;
‘apihā nūna mayipi, vanatho te na vijjati’.
- 339.** “Pariyantakataṃ dukkhaṃ, antimoyaṃ samussayo;
jātimaraṇasaṃsāro, natthi dāni punabbhavo” ti.

... Vaḍḍho thero....

6. Nadīkassapattheragāthā

340. “Atthāya vata me buddho, nadiṃ nerañjaraṃ agā;
yassāhaṃ dhammaṃ sutvāna, micchādiṭṭhiṃ vivajjayiṃ.
341. “Yajiṃ uccāvace yaññe, aggihuttaṃ juhiṃ ahaṃ;
‘esā suddhī’ti maññanto, andhabhūto § puthujjano.
342. “Diṭṭhigahanapakkhando §, parāmāsenā mohito.
asuddhiṃ maññisaṃ suddhiṃ, andhabhūto aviddasu.
343. “Micchādiṭṭhi pahīnā me, bhavā sabbe padālitā §;
juhāmi dakkhiṇeyyaggiṃ, namassāmi tathāgataṃ.
344. “Mohā (..0278) sabbe pahīnā me, bhavataṇhā padālitā;
vikkhīṇo jātiṣaṃsāro, natthi dāni punabbhavo”ti.

... Nadīkassapo thero

7. Gayākassapattheragāthā

345. “Pāto majjhanhikaṃ sāyaṃ, tikkhattuṃ divasassahaṃ;
otariṃ udakaṃ sohaṃ, gayāya gayaphagguyā.
346. “Yaṃ mayā pakataṃ pāpaṃ, pubbe aññāsu jātisu;
taṃ dānidha pavāhemi’, evaṃdiṭṭhi pure ahuṃ.
347. “Sutvā subhāsitaṃ vācaṃ, dhammatthasahitaṃ padaṃ;
tathaṃ yāthāvakaṃ atthaṃ, yoniso paccavekkhisaṃ;
348. “Ninhātasabbapāpomhi, nimmalo payato suci;
suddho suddhassa dāyādo, putto buddhassa oraso.
349. “Ogayhaṭṭhaṅgikaṃ sotaṃ, sabbapāpaṃ pavāhayiṃ;
tisso vijjā ajjhagamīṃ, kataṃ buddhassa sāsanā”ti.

... Gayākassapo thero

8. Vakkalittheragāthā

350. “Vātarogābhinīto tvaṃ, viharaṃ kānane vane;
paviṭṭhagocare lūkhe, kathaṃ bhikkhu karissasi.
351. “Pītisukhena vipulena, pharamāno samussayaṃ;
lūkhampi abhisambhonto, viharissāmi kānane.
352. “Bhāvento satipaṭṭhāne, indriyāni balāni ca;
bojjhaṅgāni ca bhāvento, viharissāmi kānane.
353. “Āraddhavīriye pahitatte, niccaṃ daḷhaparakkame §.
samagge sahite disvā, viharissāmi kānane.

354. “Anussaranto sambuddhaṃ, aggaṃ dantaṃ samāhitaṃ;
atandito rattindivaṃ, viharissāmi kānane”ti.

... Vakkalittothero....

9. Vijitasenattheragāthā

- 355.** “Olaggessāmi (..0279) te citta, āṇidvāreva hatthinaṃ;
na taṃ pāpe niyojessaṃ, kāmajāla § sarīraja §.
356. “Tvam olaggo na gacchasi §, dvāravivaraṃ gajova alabhanto.
na ca cittakali punappaṇaṃ, pasakka § pāparato carissasi.
357. “Yathā kuñjaraṃ adantaṃ, navaggahamaṅkusaggaho;
balavā āvatteti akāmaṃ, evaṃ āvattayissaṃ taṃ.
358. “Yathā varahayadamakusalo, sārathi pavaro dameti ājaññaṃ;
evaṃ damayissaṃ taṃ, patiṭṭhito pañcasu balesu.
359. “Satiyā taṃ nibandhissaṃ, payutto te damessāmi §.
vīriyadhuraniggahito, na yito dūraṃ gamissase cittā”ti.

... Vijitaseno thero....

10. Yasadattattheragāthā

- 360.** “Upārambhacitto dummedho, suṇāti jinasāsaṇaṃ;
āraḱā hoti saddhammā, nabhaso pathavī yathā.
361. “Upārambhacitto dummedho, suṇāti jinasāsaṇaṃ;
parihāyati saddhammā, kāḷapakkheva candimā.
362. “Upārambhacitto dummedho, suṇāti jinasāsaṇaṃ;
parissussati saddhamme, maccho appodake yathā.
363. “Upārambhacitto dummedho, suṇāti jinasāsaṇaṃ;
na virūhati saddhamme, khetto bijaṃva pūtikaṃ.
364. “Yo ca tuṭṭhena cittena, suṇāti jinasāsaṇaṃ;
khepetvā āsave sabbe, sacchikatvā akuppatam;
pappuyya paramaṃ santiṃ, parinibbātināsavo”ti.

... Yasadatto thero....

11. Soṇakuṭikaṇṇattheragāthā

- 365.** “Upasampadā (..0280) ca me laddhā, vimutto camhi anāsavo;

so ca me bhagavā diṭṭho, vihāre ca sahāvasiṃ.

- 366.** “Bahudeva rattim bhagavā, abbhokāsetināmayi;
vihāarakusalo sathā, vihāraṃ pāvisī tadā.
- 367.** “Santharivāna saṅghāṭim, seyyaṃ kappesi gotamo;
siho selaguhāyaṃva, pahīnabhayabheravo.
- 368.** “Tato kalyāṇavākkaraṇo, sammāsambuddhasāvako;
soṇo abhāsi saddhammaṃ, buddhaseṭṭhassa sammukhā.
- 369.** “Pañcakkhandhe pariññāya, bhāvayitvāna añjasaṃ;
pappuyya paramaṃ santiṃ, parinibbissatyanāsavo” ti.

... Soṇo kuṭikaṇṇathero....

12. Kosiyattheragāthā

- 370.** “Yo ve garūnaṃ vacanaññu dhīro, vase ca tamhi janayetha pemaṃ;
so bhattimā nāma ca hoti paṇḍito, ñatvā ca dhammesu visesi assa.
- 371.** “Yaṃ āpadā uppatitā uḷārā, nakkhambhayante paṭisaṅkhayantaṃ;
so thāmavā nāma ca hoti paṇḍito, ñatvā ca dhammesu visesi assa.
- 372.** “Yo ve samuddova ṭhito anejo, gambhīrapañño nipuṇatthadassī;
asaṃhāriyo nāma ca hoti paṇḍito, ñatvā ca dhammesu visesi assa.
- 373.** “Bahussuto dhammadharo ca hoti, dhammassa hoti anudhammacārī;
so tādiso nāma ca hoti paṇḍito, ñatvā ca dhammesu visesi assa.
- 374.** “Atthañca (..0281) yo jānāti bhāsitassa, atthañca ñatvāna tathā karoti;
atthantaro nāma sa hoti paṇḍito, ñatvā ca dhammesu visesi assā” ti.

... Kosiyo thero....

Pañcakanipāto niṭṭhito.

Tatruddānaṃ-

Rājadatto subhūto ca, girimānandasumanā;
vaḍḍho ca kassapo thero, gayākassapavakkalī.
Vijito yasadatto ca, soṇo kosiyasavhayo;
saṭṭhi ca pañca gāthāyo, therā ca ettha dvādasāti.

6. Chakkanipāto

1. Uruveḷakassapattheragāthā

- 375.** “Disvāna (..0282) pāṭihīrāni, gotamassa yasassino;

- na tāvāhaṃ paṇipatiṃ, issāmānena vañcito.
376. “Mama saṅkappamaññāya, codesi narasārathi;
tato me āsi saṃvego, abbhuto lomahaṃsano.
377. “Pubbe jaṭilabhūtassa, yā me siddhi parittikā;
tāhaṃ tadā nirākatvā §, pabbajiṃ jinasāsane.
378. “Pubbe yaññena santuṭṭho, kāmadhātupurakkhato;
pacchā rāgañca dosañca, mohañcāpi samūhaniṃ.
379. “Pubbenivāsaṃ jānāmi, dibbacakkhu visodhitam;
iddhimā paracittaññū, dibbasotañca pāpuṇiṃ.
380. “Yassa catthāya pabbajito, agārasmānagāriyaṃ;
so me attho anuppatto, sabbasaṃyojanakkhayo”ti.

... Uruveḷakassapo thero....

2. Tekicchakārittheragāthā

- 381.** “Atihitā vīhi, khalagatā sālī;
na ca labhe piṇḍaṃ, kathamahaṃ kassaṃ.
382. “Buddhamappameyyaṃ anussara pasanno;
pītiyā phuṭasarīro hohisi satatamudaggo.
383. “Dhammamappameyyaṃ anussara pasanno;
pītiyā phuṭasarīro hohisi satatamudaggo.
384. “Saṅghamappameyyaṃ anussara pasanno;
pītiyā phuṭasarīro hohisi satatamudaggo.
385. “Abbhokāse (..0283) viharasi, sītā hemantikā imā ratyo;
mā sītena pareto vihaññittho, pavisa tvaṃ vihāraṃ phusitaggaḷaṃ.
386. “Phusissaṃ catasso appamaññāyo, tāhi ca sukhito viharissaṃ;
nāhaṃ sītena vihaññissaṃ, aniñjito viharanto”ti.

... Tekicchakārī § thero....

3. Mahānāgattheragāthā

- 387.** “Yassa sabrahmacārīsu, gāravo nūpalabbhati;
parihāyati saddhammā, maccho appodake yathā.
388. “Yassa sabrahmacārīsu, gāravo nūpalabbhati;
na virūhati saddhamme, khetto bījaṃva pūtikaṃ.
389. “Yassa sabrahmacārīsu, gāravo nūpalabbhati;
ārakā hoti nibbānā §, dhammarājassa sāsane.
390. “Yassa sabrahmacārīsu, gāravo upalabbhati;
na vihāyati saddhammā, maccho bavhodake § yathā.

391. “Yassa sabrahmacārīsu, gāravo upalabbhati;
so virūhati saddhamme, khette bijaṃva bhaddakaṃ.
392. “Yassa sabrahmacārīsu, gāravo upalabbhati;
santike hoti nibbānaṃ §, dhammarājassa sāsane”ti.

... Mahānāgo thero....

4. Kullattheragāthā

393. “Kullo sivathikaṃ gantvā, addasa itthimujjhitaṃ;
apaviddhaṃ susānasmim, khajjantiṃ kimihī phuṭaṃ.
394. “Āturaṃ (..0284) asuciṃ pūtiṃ, passa kulla samussayaṃ;
uggharantaṃ paggharantaṃ, bālānaṃ abhinanditaṃ.
395. “Dhammādāsaṃ gahetvāna, ñāṇadassanapattiyā;
paccavekkhiṃ imaṃ kāyaṃ, tucchaṃ santarabāhiraṃ.
396. “Yathā idaṃ tathā etaṃ, yathā etaṃ tathā idaṃ;
yathā adho tathā uddhaṃ, yathā uddhaṃ tathā adho.
397. “Yathā divā tathā rattiṃ, yathā rattiṃ tathā divā;
yathā pure tathā pacchā, yathā pacchā tathā pure.
398. “Pañcaṅgikena turiyena, na ratī hoti tādisī;
yathā ekaggacittassa, sammā dhammaṃ vipassato”ti.

... Kullo thero....

5. Mālukyaputtattheragāthā

399. “Manujassa pamattacārino, taṇhā vaḍḍhati māluvā viya;
so plavatī § hurā hurāṃ, phalamicchaṃva vanasmi vānaro.
400. “Yaṃ esā sahate § jammī, taṇhā loke visattikā.
sokā tassa pavaḍḍhanti, abhivaṭṭhaṃva § bīraṇaṃ.
401. “Yo cetaṃ sahate § jammim, taṇhaṃ loke duraccayaṃ.
sokā tamhā papatanti, udabindūva pokkharā.

402. “Taṃ vo vadāmi bhaddaṃ vo, yāvattettha samāgatā;
taṇhāya mūlaṃ khaṇatha, usīratthova bīraṇaṃ;
mā vo naḷaṃva sotova, māro bhañji punappaṇaṃ.
403. “Karotha buddhavacanaṃ, khaṇo vo mā upaccagā;
khaṇātītā hi socanti, nirayamhi samappitā.
404. “Pamādo rajo pamādo §, pamādānupatito rajo.
appamādena vijjāya, abbahe sallamattano”ti.

... Mālukyaputto § thero

6. Sappadāsatheragāthā

405. “Paṇṇavīsativassāni (..0285), yato pabbajito ahaṃ;
accharāsaṅghātamattampi, cetosantimanajjhagaṃ.
406. “Aladdhā cittassekaggaṃ, kāmarāgena aṭṭito §.
bāhā paggayha kandanto, vihārā upanikkhamiṃ §.
407. “Satthaṃ vā āharissāmi, ko attho jīvitena me;
kathaṃ hi sikkhaṃ paccakkhaṃ, kālaṃ kubbetha mādiso.
408. “Tadāhaṃ khuramādāya, mañcakamhi upāvisiṃ;
parinīto khuro āsi, dhamaniṃ chettumattano.
409. “Tato me manasīkāro, yoniso udapajjatha;
ādīnavo pāturahu, nibbidā samatiṭṭhatha.
410. “Tato cittaṃ vimucci me, passa dhammasudhammataṃ;
tisso vijjā anuppattā, kataṃ buddhassa sāsanan”ti.

... Sappadāso thero

7. Kātiyānattheragāthā

411. “Uṭṭhehi nisīda kātiyāna, mā niddābahulo ahu jāgarassu;
mā taṃ alasaṃ pamattabandhu, kūṭeneva jinātu maccurājā.
412. “Seyyathāpi § mahāsamuddavego, evaṃ jātijarātivattate taṃ.
so karohi sudīpamattano tvaṃ, na hi tāṇaṃ tava vijjateva aññaṃ.
413. “Satthā hi vijesi maggametaṃ, saṅgā jātijarābhayā atītaṃ;
pubbāpararattamappamatto, anuyuñjassu daḷhaṃ karohi yogaṃ.
414. “Purimāni (..0286) pamuñca bandhanāni, saṅghāṭikhuramuṇḍabhikkha-
bhojī;
mā khiḍḍāratiñca mā niddaṃ, anuyuñjittha jhāya kātiyāna.
415. “Jhāyāhi jināhi kātiyāna, yogakkhemapathesu kovidosi;
pappuyya anuttaraṃ visuddhiṃ, parinibbāhisi vārināva joti.
416. “Pajjotakaro parittaraṃso, vātena vinamyate latāva;

evampi tuvaṃ anādiyāno, māraṃ indasagotta niddhunāhi;
so vedayitāsu vitarāgo, kālaṃ kaṅkha idheva sītibhūto”ti.

... Kātiyāno thero

8. Migajālattheragāthā

417. “Sudesito cakkhumatā, buddhenādiccabandhunā;
sabbasaṃyojanātīto, sabbavaṭṭavināsano.
418. “Niyyāniko uttaraṇo, taṇhāmūlavisosano;
visamūlaṃ āghātanaṃ, chetvā pāpeti nibbutiṃ.
419. “Aññāṇamūlabhedāya, kammayantavighāṭano;
viññāṇānaṃ pariggahe, ñāṇavajiranipātano.
420. “Vedanānaṃ viññāpano, upādānappamocano;
bhavaṃ aṅgārakāsumva, ñāṇena anupassano §.
421. “Mahāraso sugambhīro, jarāmaccunivāraṇo;
ariyo aṭṭhaṅgiko maggo, dukkhūpasamano sivo.
422. “Kammaṃ kammanti ñatvāna, vipākañca vipākato;
paṭiccuppannadhammānaṃ, yathāvālokadassano;
mahākhemaṅgamo santo, pariyoṣānabhaddako”ti.

... Migajālo thero

9. Purohitaputtajentattheragāthā

423. “Jātimadena (..0287) mattohaṃ, bhoga-issariyena ca;
saṅghānavaṇṇarūpena, madamatto acārihaṃ.
424. “Nāttano samakaṃ kañci, atirekaṃ ca maññisaṃ;
atimānahato bālo, patthaddho ussitaddhajo.
425. “Mātaraṃ pitarañcāpi, aññepi garusammate;
na kañci abhivādesiṃ, mānatthaddho anādaro.
426. “Disvā vināyakaṃ aggamaṃ, sārathīnaṃ varuttamaṃ;
tapantamiva ādiccaṃ, bhikkhusaṅghapurakkhataṃ.
427. “Mānaṃ madañca chaḍḍetvā, vippasannena cetasā;
sirasā abhivādesiṃ, sabbasattānamuttamaṃ.
428. “Atimāno ca omāno, pahīnā susamūhatā;
asmimāno samucchinno, sabbe mānavidhā hatā”ti.

... Jento purohitaputto thero

10. Sumanattheragāthā

429. “Yadā navo pabbajito, jātiyā sattavassiko;
iddhiyā abhibhotvāna, pannagindaṃ mahiddhikaṃ.
430. “Upajjhāyassa udakaṃ, anotattā mahāsarā;
āharāmi tato disvā, maṃ satthā etadabravi”.
431. “Sāriputta imaṃ passa, āgacchantaṃ kumārakaṃ;
udakakumbhamādāya, ajjhattaṃ susamāhitaṃ.
432. “Pāsādikena vattena, kalyāṇa-iriyāpatho;
sāmaṇeronuruddhassa, iddhiyā ca visārado.
433. “Ājāniyena ājañño, sādhunā sādhu-kārito;
vinīto anuruddhena, katakiccena sikkhito.
434. “So patvā paramaṃ santiṃ, sacchikatvā akuppataṃ;
sāmaṇero sa sumano, mā maṃ jaññāti icchatī”ti.

... Sumano thero

11. Nhātakamunittheragāthā

435. “Vātarogābhiniṭo (..0288) tvaṃ, viharaṃ kānane vane;
paviddhagocare lūkhe, kathaṃ bhikkhu karissasi”.
436. “Pītisukhena vipulena, pharivāna samussayaṃ;
lūkhampi abhisambhonto, viharissāmi kānane.
437. “Bhāvento satta bojjhaṅge, indriyāni balāni ca;
jhānasokhummasampanno §, viharissaṃ anāsavo.
438. “Vippamuttaṃ kilesehi, suddhacittaṃ anāvilaṃ;
abhiṅhaṃ paccavekkhanto, viharissaṃ anāsavo.
439. “Ajjhatañca bahiddhā ca, ye me vijjimsu āsavā;
sabbe asesā ucchinnā, na ca uppajjare puna.
440. “Pañcakkhandhā pariññātā, tiṭṭhanti chinna-mūlakā;
dukkhakkhaya anuppatto, natthi dāni punabbhavo”ti.

... Nhātakamunitthero....

12. Brahmaddattatheragāthā

441. “Akkodhassa kuto kodho, dantassa samajivino;
sammadaññā vimuttassa, upasantassa tādino.
442. “Tasseva tena pāpiyo, yo kuddhaṃ paṭikujjhati;
kuddhaṃ appaṭikujjhanto, saṅgāmaṃ jeti dujjayaṃ.
443. § “Ubhinnaṃ matthaṃ carati, attano ca parassa ca;
paraṃ saṅkupitaṃ ñatvā, yo sato upasammati.
444. § “Ubhinnaṃ tikicchantaṃ taṃ, attano ca parassa ca;
janā maññanti bāloti, ye dhammassa akovidā.
445. “Uppajje te sace kodho, āvajja kakacūpamaṃ;
upajje ce rase taṇhā, puttamaṃ sūpamaṃ sara.
446. “Sace dhāvati cittaṃ te, kāmesu ca bhavesu ca;
khippaṃ niggaṇha satiyā, kiṭṭhādaṃ viya duppasun”ti;

... Brahmaddatto thero....

13. Sirimaṇḍattheragāthā

447. § “Channamativassati (.0289), vivaṭaṃ nātivassati.
tasmā channaṃ vivaretha, evaṃ taṃ nātivassati.
448. § “Maccunābbhahato loko, jarāya parivārīto;
taṇhāsallena otiṇṇo, icchādhūpāyito sadā.
449. “Maccunābbhahato loko, parikkhitto jarāya ca;
haññati niccamattāṇo, pattadaṇḍova takkaro.
450. “Āgacchantaggikhandhāva, maccu byādhi jarā tayo;
paccuggantaṃ balaṃ natthi, javo natthi palāyituṃ.
451. “Amoghaṃ divasaṃ kayirā, appena bahukena vā;
yaṃ yaṃ vijahate § rattiṃ, tadūnaṃ tassa jīvitaṃ.
452. “Carato tiṭṭhato vāpi, āsīnasayanassa vā;
upeti carimā ratti, na te kālo pamajjitun”ti.

... Sirimaṇḍo § thero....

14. Sabbakāmittheragāthā

453. “Dvipādakoyaṃ asuci, duggandho parihīrati §.

- nānākuṇapaparipūro, vissavanto tato tato.
454. “Migaṃ nilīnaṃ kūṭena, baḷiseneva ambujaṃ;
vānaraṃ viya lepena, bādhayanti puthujjanaṃ.
455. “Rūpā saddā rasā gandhā, phoṭṭhabbā ca manoramā;
pañca kāmagaṇā ete, itthirūpasmi dissare.
456. “Ye etā upasevanti, rattacittā puthujjanā;
vaḍḍhenti kaṭasiṃ ghoraṃ, ācinanti punabbhavaṃ.
457. “Yo cetā parivajjeti, sappasseva padā siro;
somaṃ visattikaṃ loke, sato samativattati.
458. “Kāmesvādīnavaṃ (..0290) disvā, nekkhammaṃ daṭṭhu khemato;
nissaṭo sabbakāmehi, patto me āsavakkhayo” ti.

... Sabbakāmitthero

Chakkanipāto niṭṭhito.

Tatruddānaṃ-

Uruveḷakassapo ca, thero tekicchakāri ca;
mahānāgo ca kullo ca, mālukyo § sappadāsako.
Kātiyāno migajālo, jento sumanasavhayo;
nhātamuni brahmadatto, sirimaṇḍo sabbakāmī ca;
gāthāyo caturāsīti, therā cettha catuddasāti.

7. Sattakanipāto

1. Sundarasamuddattheragāthā

459. “Alaṅkatā (..0291) suvasanā, māladhārī § vibhūsitā.
alattakakatāpādā, pādukāruyha vesikā.
460. “Pādukā oruhitvāna, purato pañjalīkatā;
sā maṃ saṇhena mudunā, mhitapubbaṃ § abhāsatha”.
461. “Yuvāsi tvaṃ pabbajito, tiṭṭhāhi mama sāsane;
bhuñja mānusake kāme, ahaṃ vittaṃ dadāmi te;
saccaṃ te paṭijānāmi, aggiṃ vā te harāmahaṃ.
462. “Yadā jiṇṇā bhavissāma, ubho daṇḍaparāyanā;
ubhopi pabbajissāma, ubhayattha kaṭaggaho”.
463. “Tañca disvāna yācantīṃ, vesikaṃ pañjalīkataṃ;
alaṅkataṃ suvasanaṃ, maccupāsaṃva oḍḍitaṃ.
464. “Tato me manasīkāro ...pe... nibbidā samatiṭṭhatha.
465. “Tato cittaṃ vimucci me ...pe... kataṃ buddhassa sāsanan” ti.

... Sundarasamuddo thero....

2. Lakuṇḍakabhaddiyattheragāthā

466. Pare ambāṭakārāme, vanasaṇḍamhi bhaddiyo;
samūlaṃ taṇhamabbuyha, tattha bhaddova jhāyati §.
467. “Ramanteke mudiṅgehi §, viṇāhi paṇavehi ca.
ahañca rukkhamūlasmiṃ, rato buddhassa sāsane.
468. “Buddho ce § me varaṃ dajjā, so ca labbhetha me varo;
gaṇhehaṃ sabbalokassa, niccaṃ kāyagataṃ satim.
469. “Ye (..0292) maṃ rūpena pāmiṃsu, ye ca ghosena anvagū;
chandarāgavasūpetā, na maṃ jānanti te janā.
470. “Ajjhattañca na jānāti, bahiddhā ca na passati;
samantāvaraṇo bālo, sa ve ghosena vuyhati.
471. “Ajjhattañca na jānāti, bahiddhā ca vipassati;
bahiddhā phaladassāvī, sopi ghosena vuyhati.
472. “Ajjhattañca pajānāti, bahiddhā ca vipassati;
anāvaraṇadassāvī, na so ghosena vuyhatī” ti.

... Lakuṇḍakabhaddiyo thero....

3. Bhaddattheragāthā

473. “Ekaputto ahaṃ āsiṃ, piyo mātu piyo pitu;
bahūhi vatacarīyāhi, laddho āyācanāhi ca.
474. “Te ca maṃ anukampāya, atthakāmā hitesino;
ubho pitā ca mātā ca, buddhassa upanāmayuṃ”.
475. “Kicchā laddho ayaṃ putto, sukhumālo sukhedhito;
imaṃ dadāma te nātha, jinassa paricārakaṃ”.
476. “Satthā ca maṃ paṭiggayha, ānandaṃ etadabravi;
‘pabbājehi imaṃ khippaṃ, hessatyājāniyo ayaṃ.
477. “Pabbājetvāna maṃ satthā, vihāraṃ pāvisī jino;
anoggatasmim sūriyasmim, tato cittaṃ vimucci me.
478. “Tato satthā nirākatvā, paṭisallānavuṭṭhito;
‘ehi bhaddā’ ti maṃ āha, sā me āsūpasampadā.

479. “Jātiyā sattavassena, laddhā me upasampadā;
tisso vijjā anuppattā, aho dhammasudhammatā” ti.

... Bhaddo thero

4. Sopākattheragāthā

480. “Disvā (..0293) pāsādachāyāyaṃ, caṅkamantaṃ naruttamaṃ;
tatha naṃ upasaṅkamma, vandissaṃ § purisuttamaṃ.

481. “Ekaṃsaṃ cīvaraṃ katvā, saṃharitvāna pāṇayo;
anucaṅkamissaṃ virajaṃ, sabbasattānamuttamaṃ.

482. “Tato pañhe apucchi maṃ, pañhānaṃ kovido vidū;
acchambhī ca abhīto ca, byākāsiṃ satthuno ahaṃ.

483. “Vissajjitesu pañhesu, anumodi tathāgato;
bhikkhusaṅghaṃ viloketvā, imamatthaṃ abhāsatha”.

484. “Lābhā aṅgānaṃ magadhānaṃ, yesāyaṃ paribhuñjati;
cīvaraṃ piṇḍapātañca, paccayaṃ sayanāsaṃ;
paccuṭṭhānañca sāmīciṃ, tesaṃ lābhā” ti cābravi.

485. “Ajjatagge maṃ sopāka, dassanāyopasaṅkama;
esā ceva te sopāka, bhavatu upasampadā”.

486. “Jātiyā sattavassohaṃ, laddhāna upasampadaṃ;
dhāremi antimāṃ dehaṃ, aho dhammasudhammatā” ti.

... Sopāko thero

5. Sarabhaṅgattheragāthā

487. “Sare hatthehi bhañjitvā, katvāna kuṭimacchisaṃ;
tena me sarabhaṅgoti, nāmaṃ sammutiyā ahu.

488. “Na mayhaṃ kappate ajja, sare hatthehi bhañjituṃ;
sikkhāpadā no paññattā, gotamena yasassinā.

489. “Sakalaṃ samattaṃ rogaṃ, sarabhaṅgo nāddasaṃ pubbe;
soyaṃ rogo diṭṭho, vacanakarenātidevassa.

490. “Yeneva maggena gato vipassī, yeneva maggena sikhī ca vessabhū;
kakusandhakoṇāgamano ca kassapo, tenañjasena agamāsi gotamo.

491. “Vītataṇhā (..0294) anādānā, satta buddhā khayogadhā;
yehāyaṃ desito dhammo, dhammabhūtehi tāḍibhi.

492. “Cattāri ariyasaccāni, anukampāya pāṇinaṃ;
dukkhaṃ samudayo maggo, nirodho dukkhasaṅkhayo.

493. “Yasmiṃ nivattate § dukkhaṃ, saṃsārasmiṃ anantakaṃ.

bhedā imassa kāyassa, jīvitassa ca saṅkhayā;
añño punabbhavo natthi, suvimuttomhi sabbadhī”ti.

... Sarabhaṅgo thero

Sattakanipāto niṭṭhito.

Tatruddānaṃ-

Sundarasamuddo thero, thero lakuṇḍabhad-diyo;
bhaddo thero ca sopāko, sarabhaṅgo mahā-isi;
sattake pañcakā therā, gāthāyo pañcatimṣatīti.

8. Aṭṭhakanipāto

1. Mahākaccāyanattheragāthā

494. “Kammaṃ (..0295) bahukaṃ na kāraye, parivajjeyya janaṃ na uyyame;
so ussukko rasānugiddho, atthaṃ riñcati yo sukhādhivāho.
495. “Paṅkoti hi naṃ avedayaṃ, yāyaṃ vandanapūjanā kulesu;
sukhumaṃ sallaṃ durubbahaṃ, sakkāro kāpurisena dujjaho.
496. “Na parassupanidhāya, kammaṃ maccassa pāpakaṃ;
attanā taṃ na seveyya, kammabandhūhi mātiyā.
497. “Na pare vacanā coro, na pare vacanā muni;
attā ca naṃ yathāvedī §, devāpi naṃ tathā vidū.
498. “Pare ca na vijānanti, mayamettha yamāmasē;
ye ca tattha vijānanti, tato sammanti medhagā.
499. “Jīvate vāpi sappañño, api vittaparikkhaya;
paññāya ca alābhena §, vittavāpi na jīvati.
500. “Sabbam suṇāti sotena, sabbam passati cakkhunā;
na ca diṭṭham sutam dhīro, sabbam ujhitumarahati.
501. “Cakkhumāssa yathā andho, sotavā badhiro yathā;
paññavāssa yathā mūgo, balavā dubbaloriva;
atha atthe samuppanne, sayetha § matasāyikan”ti.

... Mahākaccāyano thero

2. Sirimittattheragāthā

502. “Akkodhanonupanāhī, amāyo rittapesuṇo;

- sa ve tādīsako bhikkhu, evaṃ pecca na socati.
- 503.** “Akkodhanonupanāhī, amāyo rittapesuṇo;
guttadvāro sadā bhikkhu, evaṃ pecca na socati.
- 504.** “Akkodhanonupanāhī (..0296), amāyo rittapesuṇo;
kalyāṇasīlo so § bhikkhu, evaṃ pecca na socati.
- 505.** “Akkodhanonupanāhī, amāyo rittapesuṇo;
kalyāṇamitto so bhikkhu, evaṃ pecca na socati.
- 506.** “Akkodhanonupanāhī, amāyo rittapesuṇo;
kalyāṇapañño so bhikkhu, evaṃ pecca na socati.
- 507.** “Yassa saddhā tathāgate, acalā suppatiṭṭhitā;
sīlañca yassa kalyāṇaṃ, ariyakantaṃ paṣaṃsitamaṃ.
- 508.** “Saṅghe pasādo yassatthi, ujubhūtañca dassanaṃ;
'adaliddo'ti taṃ āhu, amoghaṃ tassa jīvitaṃ.
- 509.** “Tasmā saddhañca sīlañca, pasādaṃ dhammadassanaṃ;
anuyuñjetha medhāvī, saraṃ buddhāna sāsanaṃ”ti.

... Sirimitto thero

3. Mahāpanthakattheragāthā

- 510.** “Yadā paṭhamamaddakkhiṃ, sathāramakutobhayaṃ;
tato me ahu saṃvego, passivā purisuttamaṃ.
- 511.** “Siriṃ hatthehi pādehi, yo paṇāmeyya āgataṃ;
etādisaṃ so sathāraṃ, ārādhetaṃ virādhaye.
- 512.** “Tadāhaṃ puttadārañca, dhanadhaññañca chaḍḍayaṃ;
kesamassūni chedetaṃ, pabbajīṃ anagāriyaṃ.
- 513.** “Sikkhāsājīvasampanno, indriyesu susaṃvuto;
namassamaṇo sambuddhaṃ, vihāsiṃ aparājito.
- 514.** “Tato me paṇidhī āsi, cetaso abhipatthito;
na nisīde muhuttampi, taṇhāsalle anūhate.
- 515.** “Tassa mevaṃ viharato, passa vīriyaparakkamaṃ;
tisso vijjā anuppattā, kataṃ buddhassa sāsanaṃ.
- 516.** “Pubbenivāsaṃ (..0297) jānāmi, dibbacakkhu visodhitaṃ;
arahā dakkhiṇeyyomhi, vippamutto nirūpadhi.
- 517.** “Tato ratyā vivasāne §, sūriyassuggamaṃ pati.

sabbaṃ taṇhaṃ visosetvā, pallaṅkena upāvisin”ti.

... Mahāpanthako thero

Aṭṭhakanipāto niṭṭhito.

Tatruddānaṃ-

mahākaccāyano thero, sirimitto mahāpanthako;
ete aṭṭhanipātamhi, gāthāyo catuvīsati.

9. Navakanipāto

1. Bhūtattheragāthā

518. “Yadā (..0298) dukkhaṃ jarāmarañanti paṇḍito, aviddasū yattha sitā puthu-
jjanā;
dukkhaṃ pariññāya satova jhāyati, tato ratiṃ paramataraṃ na vindati.
519. “Yadā dukkhassāvahaniṃ visattikaṃ, papañcasaṅghātadukkhādhivāhiniṃ;
taṇhaṃ pahantvāna satova jhāyati, tato ratiṃ paramataraṃ na vindati.
520. “Yadā sivaṃ dvecaturaṅgagāmiṇaṃ, magguttamaṃ sabbakilesasodhanaṃ.
paññāya passitva satova jhāyati, tato ratiṃ paramataraṃ na vindati.
521. “Yadā asokaṃ virajaṃ asaṅkhataṃ, santaṃ padaṃ sabbakilesasodhanaṃ.
bhāveti saññojanabandhanacchidaṃ, tato ratiṃ paramataraṃ na vindati.
522. “Yadā nabhe gajjati meghadundubhi, dhārākulā vihagapathe samantato;
bhikkhū ca pabbhāragatova jhāyati, tato ratiṃ paramataraṃ na vindati.
523. “Yadā nadīnaṃ kusumākulānaṃ, vicitta-vāneyya-vaṭaṃsakānaṃ;
tīre nisinno sumanova jhāyati, tato ratiṃ paramataraṃ na vindati.
524. “Yadā (..0299) nisīthe rahitamhi kānane, deve gaḷantamhi nadanti dāṭhino;
bhikkhū ca pabbhāragatova jhāyati, tato ratiṃ paramataraṃ na vindati.
525. “Yadā vitakke uparundhiyattano, nagantare nagavivaraṃ samassito;
vītaddaro vītakhilova jhāyati, tato ratiṃ paramataraṃ na vindati.
526. “Yadā sukhī malakhilasokanāsano, niraggaḷo nibbanatho visallo;
sabbāsave byantikato va jhāyati, tato ratiṃ paramataraṃ na vindati”ti.

... Bhūto thero

Navakanipāto niṭṭhito.

Tatruddānaṃ-

Bhūto tathaddaso thero, eko khaggavisāṇavā;
navakamhi nipātamhi, gāthāyopi imā navāti.

10. Dasakanipāto

1. Kāḷudāyittheragāthā

527. “Aṅgārino (..0300) dāni dumā bhadante, phalesino chadanaṃ vipphāya;
te accimantova pabhāsayanti, samayo mahāvīra bhāgī rasānaṃ.
528. “Dumāni phullāni manoramāni, samantato sabbadisā pavanti;
pattaṃ pahāya phalamāsasānā §, kālo ito pakkamanāya vīra.
529. “Nevātisītaṃ na panāti-uṇhaṃ, sukhā utu addhaniyā bhadante;
passantu taṃ sākīyā koḷiyā ca, pacchāmukhaṃ rohiniyaṃ tarantaṃ.
530. “Āsāya kasate khettaṃ, bījaṃ āsāya vappati;
āsāya vāṇijā yanti, samuddaṃ dhanahārakā;
yāya āsāya tiṭṭhāmi, sā me āsā samijjhatu.
531. § “Punappunaṃ ceva vapanti bījaṃ, punappunaṃ vassati devarājā.
punappunaṃ khettaṃ kasanti kassakā, punappunaṃ dhaññaṃ mupeti raṭṭhaṃ.
532. § “Punappunaṃ yācanakā caranti, punappunaṃ dānapatī dadanti.
punappunaṃ dānapatī daditvā, punappunaṃ saggamupenti ṭhānaṃ.
533. “Vīro have sattayugaṃ puneti, yasmim kule jāyati bhūripaṇṇo;
maññaṃ mahamaṃ sakkati devadevo, tayā hi jāto § muni saccaṇāmo.
534. “Suddhodano (..0301) nāma pitā mahesino, buddhassa mātā pana māya-
nāmā;
yā bodhisattaṃ parihariya kucchinā, kāyassa bhedaṃ tidivamhi modati.
535. “Sā gotamī kālakatā ito cutā, dibbehi kāmehi samaṅgibhūtā;
sā modati kāmagaṇehi pañcahi, parivāritā devagaṇehi tehi.
536. “Buddhassa puttomaṃ asayhasāhino, aṅgīrasassappaṭimassa tādino;
pitupitā mayhaṃ tuvaṃsi sakka, dhammena me gotama ayyakosi” ti.

... Kāḷudāyī thero

2. Ekavīhāriyattheragāthā

537. “Purato pacchato vāpi, aparo ce na vijjati;
atīva phāsu bhavati, ekassa vasato vane.
538. “Handa eko gamissāmi, araṇṇaṃ buddhavaṇṇitaṃ;
phāsu § ekavīhāriṣṣa, pahitattassa bhikkhuno.
539. “Yogī-pītikaraṃ rammaṃ, mattakuṇṇjarasevitaṃ;
eko attavasī khippaṃ, pavisissāmi kānanaṃ.

540. “Supupphite sītavane, sītale girikandare;
gattāni parisiñcitvā, caṅkamissāmi ekako.
541. “Ekākiyo adutiyo, ramaṇīye mahāvane;
kadāhaṃ viharissāmi, katakicco anāsavo.
542. “Evaṃ me kattukāmassa, adhippāyo samijjhatu;
sādhiyissāmaḥaṃyeva, nāñño aññassa kāraḥko.
543. “Esa (.0302) bandhāmi sannāhaṃ, pavisissāmi kānanaṃ;
na tato nikkhamissāmi, appatto āsavakkhayaṃ.
544. “Mālute upavāyante, sīte surabhigandhike §.
avijjaṃ dālayissāmi, nisinno nagamuddhani.
545. “Vane kusumasañchane, pabbhāre nūna sītale;
vimuttisukhena sukhito, ramissāmi giribbaje.
546. “Sohaṃ paripuṇṇasaṅkappo, cando pannaraso yathā;
sabbāsavaparikkhīṇo, natthi dāni punabbhavo”ti.

... Ekavihāriyo thero....

3. Mahākappinattheragāthā

547. “Anāgataṃ yo paṭikacca § passati, hitaṅca atthaṃ ahitaṅca taṃ dvayaṃ.
viddesino tassa hitesino vā, randhaṃ na passanti samekkhamānā.
548. § “Ānāpānasatī yassa, paripuṇṇā subhāvitā.

- anupubbaṃ paricitā, yathā buddhena desitā;
somaṃ lokaṃ pabhāseti, abbhā muttova candimā.
549. “Odātaṃ vata me cittaṃ, appamāṇaṃ subhāvitaṃ;
nibbidhaṃ paggaḥitañca, sabbā obhāsate disā.
550. “Jīvate vāpi sappañño, api vittaparikkhaya;
paññāya ca alābhena, vittavāpi na jīvati.
551. “Paññā sutavinicchini, paññā kittisilokavaddhanī;
paññāsaḥito naro idha, api dukkhesu sukhāni vindati.
552. “Nāyaṃ ajjatano dhammo, nacchero napi abbhuto;
yattha jāyetha mīyetha, tattha kiṃ viya abbhutaṃ.
553. “Anantaraṃ hi jātassa, jīvitā maraṇaṃ dhuvaṃ;
jātā jātā marantīdha, evaṃdhammā hi paṇino.
554. “Na (..0303) hetadatthāya matassa hoti, yaṃ jīvitatthaṃ paraporisānaṃ;
matamhi ruṇṇaṃ na yaso na lokyaṃ, na vaṇṇitaṃ samaṇabrāhmaṇehi.
555. “Cakkhuṃ sarīraṃ upahanti tena Ṣ, nihīyati vaṇṇabalaṃ matī ca.
ānandino tassa disā bhavanti, hitesino nāssa sukhī bhavanti.
556. “Tasmā hi iccheyya kule vasante, medhāvino ceva bahussute ca;
yesaṃ hi paññāvibhavena kiccaṃ, taranti nāvāya nadiṃva puṇṇaṃ”ti.

... Mahākappino thero....

4. Cūḷapanthakattheragāthā

557. “Dandhā mayhaṃ gatī āsi, paribhūto pure ahaṃ;
bhātā ca maṃ paṇāmesi, ‘gaccha dāni tuvaṃ gharaṃ’.
558. “Sohaṃ paṇāmito santo Ṣ, saṅghārāmassa koṭṭhake;
dummano tattha aṭṭhāsiṃ, sāsanaṃsiṃ apekkhava.
559. “Bhagavā tattha āgacchi Ṣ, sīsaṃ mayhaṃ parāmasi;
bāhāya maṃ gahetvāna, saṅghārāmaṃ pavesayi.
560. “Anukampāya me satthā, pādāsi pādapuñchaniṃ;
‘etaṃ suddhaṃ adhiṭṭhehi, ekamantaṃ svadhiṭṭhitam’.
561. “Tassāhaṃ vacanaṃ sutvā, vihāsiṃ sāsane rato;
samādhiṃ paṭipādesiṃ, uttamatthassa pattiyā.
562. “Pubbenivāsaṃ jānāmi, dibbacakkhu visodhitam;
tisso vijjā anuppattā, kataṃ buddhassa sāsanaṃ.
563. “Sahassakkhattumattānaṃ (..0304), nimminivāna panthako;
nisīdambavane ramme, yāva kālappavedanā.
564. “Tato me satthā pāhesi, dūtaṃ kālappavedakam;
paveditamhi kālamhi, vehāsādupasaṅkamim Ṣ.
565. “Vanditvā satthuno pāde, ekamantaṃ nisīdahaṃ;
nisinnaṃ maṃ viditvāna, atha satthā paṭiggahi.

566. “Āyāgo sabbalokassa, āhutīnaṃ paṭiggaho;
puññakkhettaṃ manussānaṃ, paṭigaṇhittha dakkhiṇaṃ” ti.

... Cūḷapanthako thero

5. Kappattheragāthā

567. “Nānākulamalasampuṇṇo, mahā-ukkārasambhavo;
candanikaṃva paripakkaṃ, mahāgaṇḍo mahāvaṇo.
568. “Pubbaruhirasampuṇṇo, gūthakūpena gāḷhito §.
āpopaggharaṇo kāyo, sadā sandati pūtikaṃ.
569. “Saṭṭhikaṇḍarasambandho, maṃsalepanalepito;
cammakañcukasannaddho, pūtikāyo niratthako.
570. “Aṭṭhisaṅghātaghaṭito, nhārusuttanibandhano;
nekesaṃ saṃgatibhāvā, kappeti iriyāpathaṃ.
571. “Dhuvappayāto maraṇāya, maccurājassa santike;
idheva chaḍḍayitvāna, yena kāmaṅgamo naro.
572. “Avijjāya nivuto kāyo, catuganthena ganthito;
oghasaṃsīdano kāyo, anusayajālamotthato.
573. “Pañcanīvaraṇe yutto, vitakkena samappito;
taṇhāmūlenānugato, mohacchādanachādito.
574. “Evāyaṃ vattate kāyo, kammayantena yantito;
sampatti ca vipatyantā, nānābhāvo vipajjati.
575. “Yemaṃ (..0305) kāyaṃ mamāyanti, andhabālā puthujjanā;
vaḍḍhenti kaṭasiṃ ghoraṃ, ādiyanti punabbhavaṃ.
576. “Yemaṃ kāyaṃ vivajjenti, gūthallittaṃva pannagaṃ;
bhavamūlaṃ vavitvāna, parinibbissanti nāsavā” ti §.

... Kappo thero

6. Vaṅgantaputta-upasenattheragāthā

577. “Vivittaṃ appanigghosaṃ, vāḷamiganisevitaṃ;
seve senāsaṃ bhikkhu, paṭisallānakāraṇā.
578. “Saṅkārappuñjā āhatvā §, susānā rathiyāhi ca;
tato saṅghātikaṃ katvā, lūkhaṃ dhāreyya cīvaraṃ.
579. “Nīcaṃ manaṃ karitvāna, sapadānaṃ kulā kulaṃ;
piṇḍikāya care bhikkhu, guttadvāro susaṃvuto.
580. “Lūkhenapi vā § santusse, nāññaṃ patthe rasaṃ bahuṃ.
rasesu anugiddhassa, jhāne na ramatī mano.

581. “Appiccho ceva santuṭṭho, pavivitto vase muni;
asamṣaṭṭho gahaṭṭhehi, anāgārehi cūbhayaṃ.
582. “Yathā jaḷo va mūgo va, attānaṃ dassaye tathā;
nāṭivelaṃ sambhāseyya, saṅghamajjhamhi paṇḍito.
583. “Na so upavade kañci, upaghātaṃ vivajjaye;
saṃvuto pātimokkhasmiṃ, mattaññū cassa bhojane.
584. “Suggahītanimittassa, cittassuppādakovido;
samaṃ anuyuñjeyya, kālena ca vipassanaṃ.
585. “Vīriyasātaccasampanno, yuttayogo sadā siyā;
na ca appatvā dukkhantaṃ, vissāsaṃ eyya paṇḍito.
586. “Evaṃ viharamānassa, suddhikāmassa bhikkhuno;
khīyanti āsavā sabbe, nibbutiñcādhigacchatī” ti.

... Upaseno vaṅgantaputto thero

7. (apara)-gotamatheragāthā

587. “Vijāneyya (..0306) sakaṃ atthaṃ, avalokeyyātha pāvacaṇaṃ;
yañcettha assa patirūpaṃ, sāmaññaṃ ajjhupagatassa.
588. “Mittaṃ idha ca kalyāṇaṃ, sikkhā vipulaṃ samādānaṃ;
sussūsā ca garūnaṃ, etaṃ samaṇassa patirūpaṃ.
589. “Buddhesu sagāravatā, dhamme apaciti yathābhūtaṃ;
saṅghe ca cittikāro, etaṃ samaṇassa patirūpaṃ.
590. “Ācāragocare yutto, ājīvo sodhito agārayho;
cittassa ca saṅghapanaṃ, etaṃ samaṇassa patirūpaṃ.
591. “Cārittaṃ atha vārittaṃ, iriyāpathiyaṃ pasādaniyaṃ;

- adhicitte ca āyogo, etaṃ samaṇassa patirūpaṃ.
592. “Āraññakāni senāsanāni, pantāni appasaddāni;
bhajitabbāni muninā, etaṃ samaṇassa patirūpaṃ.
593. “Sīlañca bāhusaccañca, dhammānaṃ pavicayo yathābhūtaṃ;
saccānaṃ abhisamayo, etaṃ samaṇassa patirūpaṃ.
594. “Bhāveyya ca aniccanti, anattasaññaṃ asubhasaññañca;
lokamhi ca anabhiratiṃ, etaṃ samaṇassa patirūpaṃ.
595. “Bhāveyya ca bojjaṅge, iddhipādāni indriyāni balāni;
aṭṭhaṅgamaggamariyaṃ, etaṃ samaṇassa patirūpaṃ.
596. “Taṇhaṃ pajaheyya muni, samūlake āsave padāleyya;
vihareyya vippamutto, etaṃ samaṇassa patirūpan”ti.

... Gotamo thero....

Dasakanipāto niṭṭhito.

Tatruddānaṃ-

Kāḷudāyī ca so thero, ekavihārī ca kappino;
cūḷapanthako kappo ca, upaseno ca gotamo;
sattime dasake therā, gāthāyo cettha sattatīti.

11. Ekādasanipāto

1. Saṃkiccattheragāthā

- 597.** “Kiṃ (..0307) tavattho vane tāta, ujjuhānova pāvuse;
verambhā ramaṇiyā te, paviveko hi jhāyinaṃ.
598. “Yathā abbhāni verambho, vāto nudati pāvuse;
saññā me abhikiranti, vivekapaṭisaññutā.
599. “Apaṇḍaro aṇḍasambhavo, sīvathikāya nicketacāriko;
uppādayateva me satiṃ, sandehasmiṃ virāganissitaṃ.
600. “Yañca aññe na rakkhanti, yo ca aññe na rakkhati;
sa ve bhikkhu sukhaṃ seti, kāmesu anapekkhavā.
601. “Acchodikā puthusilā, gonaṅgulamigāyutā;
ambusevālasañchannā, te selā ramayanti maṃ.
602. “Vasitaṃ me araññesu, kandarāsu guhāsu ca;
senāsanesu pantesu, vāḷamiganisevite.
603. “‘Ime haññantu vajjhantu, dukkhaṃ pappontu pāṇino’;
saṅkappaṃ nābhijānāmi, anariyaṃ dosasaṃhitaṃ.
604. “Pariciṅṅo mayā satthā, kataṃ buddhassa sāsanaṃ;

ohito garuko bhāro, bhavanetti samūhatā.

605. “Yassa catthāya § pabbajito, agārasmānagāriyaṃ;
so me attho anuppatto, sabbasaṃyojanakkhaya.

606. “Nābhinandāmi maraṇaṃ, nābhinandāmi jīvitaṃ;
kālañca paṭikañkhāmi, nibbisaṃ bhatako yathā.

607. “Nābhinandāmi (..0308) maraṇaṃ, nābhinandāmi jīvitaṃ;
kālañca paṭikañkhāmi, sampajāno patissato”ti.

... Saṃkicco thero

Ekādasanipāto niṭṭhito.

Tatruddānaṃ-

Saṃkiccathero ekova, katakicco anāsavo;
ekādasanipātamhi, gāthā ekādaseva cāti.

12. Dvādasakanipāto

1. Sīlavattheragāthā

608. “Sīlamevidha (..0309) sikkhetha, asmiṃ loke susikkhitaṃ;
sīlaṃ hi sabbasampattiṃ, upanāmeti sevitāṃ.

609. “Sīlaṃ rakkheyya medhāvī, patthayāno tayo sukhe;
pasaṃsaṃ vittilābhañca, pecca sagge pamodanaṃ §.

610. “Sīlavā hi bahū mitte, saññāmenādhighacchati;
dussīlo pana mittehi, dhaṃsate pāpamācaraṃ.

611. “Avaṇṇaṅca akittiñca, dussīlo labhate naro;
vaṇṇaṃ kittiṃ pasaṃsañca, sadā labhati sīlavā.

612. “Ādi sīlaṃ patiṭṭhā ca, kalyāṇānañca mātukaṃ;
pamukhaṃ sabbadhammānaṃ, tasmā sīlaṃ visodhaye.

613. “Velā ca saṃvaraṃ sīlaṃ §, cittassa abhihāsaṃ.
titthañca sabbabuddhānaṃ, tasmā sīlaṃ visodhaye.

614. “Sīlaṃ balaṃ appaṭimaṃ, sīlaṃ āvudhamuttamaṃ;
sīlamābharaṇaṃ seṭṭhaṃ, sīlaṃ kavacamabbhutaṃ.

615. “Sīlaṃ setu mahesakkho, sīlaṃ gandho anuttaro;
sīlaṃ vilepanaṃ seṭṭhaṃ, yena vāti disodisaṃ.

616. “Sīlaṃ sambalamevaggāṃ, sīlaṃ pātheyyamuttamaṃ;
sīlaṃ seṭṭho ativāho, yena yāti disodisaṃ.

617. “Idheva nindaṃ labhati, peccāpāye ca dummano;
sabbattha dummano bālo, sīlesu asamāhito.

618. “Idheva kittiṃ labhati, pecca sagge ca summano;
sabbattha sumano dhīro, sīlesu susamāhito.

619. “Sīlameva idha aggaṃ, paññavā pana uttamo;
manussesu ca devesu, sīlapaññāṇato jayan”ti.

... Sīlavo thero....

2. Sunītattheragāthā

620. “Nīce (..0310) kulamhi jātohaṃ, daliddo appabhojano;
hīnakammaṃ § mamaṃ āsi, ahosiṃ pupphachaḍḍako.

621. “Jigucchito manussānaṃ, paribhūto ca vambhito;
nīcaṃ manaṃ karitvāna, vandissaṃ bahukaṃ janaṃ.

622. “Athaddasāsiṃ sambuddhaṃ, bhikkhusaṅghapurakkhataṃ;
pavisantaṃ mahāvīraṃ, magadhānaṃ puruttamaṃ.

623. “Nikkhipitvāna byābhaṅgiṃ, vandituṃ upasaṅkamīṃ;
mameva anukampāya, aṭṭhāsi purisuttamo.

624. “Vanditvā satthuno pāde, ekamantaṃ ṭhito tadā;
pabbajjaṃ ahamāyāciṃ, sabbasattānamuttamaṃ.

625. “Tato kāruṅiko satthā, sabbalokānukampako;
‘ehi bhikkhū’ti maṃ āha, sā me āsūpasampadā.

626. “Sohaṃ eko araṅṅasmīṃ, viharanto atandito;
akāsiṃ satthuvacanaṃ, yathā maṃ ovadī jino.

627. “Rattiyā paṭhamaṃ yāmaṃ, pubbajātimanussariṃ;
rattiyā majjhimaṃ yāmaṃ, dibbacakkhuṃ visodhayiṃ §.
rattiyā pacchime yāme, tamokhandhaṃ padālayiṃ.

628. “Tato ratyā vivasāne, sūriyassuggamanaṃ pati;
indo brahmā ca āgantvā, maṃ namassiṃsu pañjalī.

629. “‘Namo te purisājañña, namo te purisuttama;
yassa te āsavā khīṇā, dakkhiṇeyyosi mārīsa’.

630. “Tato disvāna maṃ satthā, devasaṅghapurakkhataṃ;
sitāṃ pātukaritvāna, imamatthaṃ abhāsatha.

631. § “Tapena (..0311) brahmacariyena, saṃyamena damena ca. etena brāhmaṇo hoti, etaṃ brāhmaṇamuttaman” ti.

... Sunīto thero....

Dvādasakanipāto niṭṭhito.

Tatruddānaṃ-

sīlavā ca sunīto ca, therā dve te mahiddhikā;
dvādasamhi nipātamhi, gāthāyo catuvīsati.

13. Terasanipāto

1. Soṇakoḷivisattheragāthā

632. “Yāhu (..0312) raṭṭhe samukkaṭṭho, rañño aṅgassa paddhagū §. svājja dhammesu ukkaṭṭho, soṇo dukkhassa pāragū.
633. “Pañca chinde pañca jahe, pañca cuttari bhāvaye;
pañcasaṅgātigo bhikkhu, oghatiṇṇoti vuccati.
634. “Unnaḷassa pamattassa, bāhirāsassa § bhikkhuno.
sīlaṃ samādhi paññā ca, pāripūriṃ na gacchati.
635. “Yañhi kiccaṃ apaviddhaṃ §, akiccaṃ pana kariyati.
unnaḷānaṃ pamattānaṃ, tesam vaḍḍhanti āsavā.
636. “Yesañca susamāraddhā, niccaṃ kāyagatā sati;
akiccaṃ te na sevanti, kicce sātaccakārino;
satānaṃ sampajānānaṃ, atthaṃ gacchanti āsavā.
637. “Ujumaggamhi akkhāte, gacchatha mā nivattatha;
attanā codayattānaṃ, nibbānamabhihāraye.
638. “Accāraddhamhi vīriyamhi, satthā loke anuttaro;
vīṇopamaṃ karitvā me, dhammaṃ desesi cakkhumā;
tassāhaṃ vacanaṃ sutvā, vihāsiṃ sāsane rato.
639. “Samathaṃ paṭipādesiṃ, uttamatthassa pattiyā;
tisso vijjā anuppattā, kataṃ buddhassa sāsanaṃ.
640. “Nekkhamme § adhimuttassa, pavivekañca cetaso.
abyāpajjhādhimuttassa §, upādānakkhayassa ca.
641. “Taṇhakkhayādhimuttassa, asammohañca cetaso;
disvā āyatanuppādaṃ, sammā cittaṃ vimuccati.
642. “Tassa sammā vimuttassa, santacittassa bhikkhuno;
katassa paṭicayo natthi, karaṇīyaṃ na vijjati.
643. “Selo (..0313) yathā ekaghano §, vātena na samīrati.

evaṃ rūpā rasā saddā, gandhā phassā ca kevalā.
644. “Itthā dhammā anitthā ca, nappavedhenti tādino;
ṭhitaṃ cittaṃ visaññuttaṃ, vayañcassānupassatī” ti.

... Soṇo koḷiviso thero

Terasanipāto niṭṭhito.

Tatruddānaṃ-

Soṇo koḷiviso thero, ekoyeva mahiddhiko;
terasamhi nipātamhi, gāthāyo cettha terasāti.

14. Cuddasakanipāto

1. Khadiravaniyarevatattheragāthā

645. “Yadā (..0314) ahaṃ pabbajito, agārasmānagāriyaṃ;
nābhijānāmi saṅkappaṃ, anariyaṃ dosasaṃhitaṃ.
646. “Ime haññantu vajjhantu, dukkhaṃ pappontu pāṇino’;
saṅkappaṃ nābhijānāmi, imasmiṃ dīghamantare.
647. “Mettañca abhijānāmi, appamāṇaṃ subhāvitaṃ;
anupubbaṃ paricitaṃ, yathā buddhena desitaṃ.
648. “Sabbamitto sabbasakho, sabbabhūtānukampako;
mettacittañca § bhāvēmi, abyāpajjarato § sadā.
649. “Asaṃhīraṃ asaṃkappaṃ, cittaṃ āmodayāmaṃ;
brahmavihāraṃ bhāvēmi, akāpurisasevitaṃ.
650. “Avitakkaṃ samāpanno, sammāsambuddhasāvako;
ariyena tuṅhībhāvena, upeto hoti tāvade.
651. “Yathāpi pabbato selo, acalo suppatiṭṭhito;
evaṃ mohakkhayā bhikkhu, pabbatova na vedhati.
652. “Anaṅgaṇassa posassa, niccaṃ sucigavesino;
vālaggamattaṃ pāpassa, abbhamaṃva khāyati.
653. “Nagaraṃ yathā paccantaṃ, guttaṃ santarabāhiraṃ;
evaṃ gopetha attānaṃ, khaṇo vo mā upaccagā.
654. “Nābhinandāmi maraṇaṃ, nābhinandāmi jīvitaṃ;
kālañca paṭikaṅkhāmi, nibbisaṃ bhatako yathā.
655. “Nābhinandāmi maraṇaṃ ...pe... sampajāno patissato.
656. “Pariciṇṇo mayā satthā, kataṃ buddhassa sāsanaṃ;
ohito garuko bhāro, bhavanetti samūhatā.
657. “Yassa (..0315) catthāya pabbajito, agārasmānagāriyaṃ;

so me attho anuppatto, sabbasaṃyojanakkhayo.

658. “Sampādethappamādena, esā me anusāsanī;
handāhaṃ parinibbissaṃ, vippamuttomhi sabbadhī” ti.

... Khadiravaniyarevato thero

2. Godattatheragāthā

659. “Yathāpi bhaddo ājañño, dhure yutto dhurassaho §.
mathito atibhārena, saṃyugaṃ nātivattati.

660. “Evaṃ paññāya ye tittā, samuddo vārinā yathā;
na pare atimaññanti, ariyadhammova pāṇinaṃ.

661. “Kāle kālavasāṃ pattā, bhavābhavavasāṃ gatā;
narā dukkhaṃ nigacchanti, tedha socanti māṇavā §.

662. “Unnatā sukhadhammena, dukkhadhammena conatā;
dvayena bālā haññanti, yathābhūtaṃ adassino.

663. “Ye ca dukkhe sukhasmiñca, majjhe sibbinimaccagū;
ṭhitā te indakhīlova, na te unnata-onatā.

664. “Na heva lābhe nālābhe, na yase na ca kittiyā;
na nindāyaṃ pasaṃsāya, na te dukkhe sukhamhi.

665. “Sabbattha te na limpanti, udabinduva pokkhare;
sabbattha sukhitā dhīrā, sabbattha aparājitā.

666. “Dhammena ca alābho yo, yo ca lābho adhammiko;
alābho dhammiko seyyo, yaṃ ce lābho adhammiko.

667. “Yaso ca appabuddhīnaṃ, viññūnaṃ ayaso ca yo;
ayasova seyyo viññūnaṃ, na yaso appabuddhinaṃ.

668. “Dummedhehi (..0316) pasaṃsā ca, viññūhi garahā ca yā;
garahāva seyyo viññūhi, yaṃ ce bālappasaṃsanā.

669. “Sukhañca kāmamayikaṃ, dukkhañca pavivekiyaṃ;

- pavivekadukkhaṃ seyyo, yaṃ ce kāmamayaṃ sukhaṃ.
670. “Jīvitañca adhammena, dhammena maraṇaṅca yaṃ;
 maraṇaṃ dhammikaṃ seyyo, yaṃ ce jīve adhammikaṃ.
671. “Kāmakopappahīnā ye, santacittā bhavābhavā;
 caranti loke asitā, natthi tesaṃ piyāpiyaṃ.
672. “Bhāvayitvāna bojjaṅge, indriyāni balāni ca;
 pappuyya paramaṃ santiṃ, parinibbantīnāsavā” ti.

... Godatto thero

Cuddasakanipāto niṭṭhito.

Tatruddānaṃ-

Revato ceva godatto, therā dve te mahiddhikā;
 cuddasamhi nipātamhi, gāthāyo aṭṭhavīsati.

15. Soḷasakanipāto

1. Aññāsikoṇḍaññattheragāthā

- 673.** “Esa (..0317) bhiyyo pasīdāmi, sutvā dhammaṃ mahārasaṃ;
 virāgo desito dhammo, anupādāya sabbaso.
674. “Bahūni loke citrāni, asmiṃ pathavimaṇḍale;
 mathenti maññe saṅkappaṃ, subhaṃ rāgūpasamhitam.
675. “Rajamuhatañca vātena, yathā meghopasammaye;
 evaṃ sammanti saṅkappā, yadā paññāya passati.
676. § “Sabbe saṅkhārā aniccāti, yadā paññāya passati.
 atha nibbindati dukkhe, esa maggo visuddhiyā.
677. § “Sabbe saṅkhārā dukkhāti, yadā paññāya passati
 atha nibbindati dukkhe, esa maggo visuddhiyā.
678. § “Sabbe dhammā anattāti, yadā paññāya passati;
 atha nibbindati dukkhe, esa maggo visuddhiyā.
679. “Buddhānubuddho yo thero, koṇḍañño tibbanikkamo;
 pahīnajātīmaraṇo, brahmacariyassa kevalī.
680. “Oghapāso daḷhakhilo §, pabbato duppadālayo;
 chetvā khilañca pāsāñca, selaṃ bhetvāna § dubbhidaṃ.
 tiṅṅo pāraṅgato jhāyī, mutto so mārabandhanā.
681. “Uddhato capalo bhikkhu, mitte āgamma pāpake;
 saṃsīdati mahoghasmiṃ, ūmiyā paṭikujjito.
682. “Anuddhato acapalo, nipako saṃvutindriyo;

- kalyāṇamitto medhāvī, dukkhassantakaro siyā.
- 683.** “Kālapabbaṅgasaṅkāso, kiso dhamanisanthato;
mattaññū annapānasmim, adīnamanaso naro.
- 684.** “Phuṭṭho ḍaṃsehi makasehi, araññasmiṃ brahāvane;
nāgo saṅgāmasīseva, sato tatrādhivāsaya.
- 685.** “Nābhinandāmi (..0318) maraṇaṃ ...pe... nibbisaṃ bhatako yathā.
- 686.** “Nābhinandāmi maraṇaṃ ...pe... sampajānā-e patissato.
- 687.** “Pariciṅṅo mayā satthā ...pe... bhavanetti samūhatā.
- 688.** “Yassa catthāya pabbajito, agārasmānagāriyaṃ;
so me attho anuppatto, kiṃ me saddhivihārinā”ti.

... Aññāsikoṇḍaṅṅo § thero....

2. Udāyittheragāthā

- 689.** § “Manussabhūtaṃ sambuddhaṃ, attadantaṃ samāhitaṃ;
iriyamānaṃ brahmapathe, cittassūpasame rataṃ.
- 690.** “Yaṃ manussā namassanti, sabbadhammāna pāraguṃ;
devāpi taṃ namassanti, iti me arahato sutāṃ.
- 691.** “Sabbasaṃyojanātītaṃ, vanā nibbanamāgataṃ;
kāmehi nekkhammarataṃ §, muttaṃ selāva kañcanaṃ.
- 692.** “Sa ve accaruci nāgo, himavāvaññe siluccaye;
sabbesaṃ nāganāmānaṃ, saccanāmo anuttaro.
- 693.** “Nāgaṃ vo kittayissāmi, na hi āguṃ karoti so;
soraccaṃ avihimsā ca, pādā nāgassa te duve.
- 694.** “Sati ca sampajāññaṅca, caraṇā nāgassa tepare;
saddhāhattho mahānāgo, upekkhāsetadantavā.
- 695.** “Sati gīvā siro paññā, vīmaṃsā dhammacintanā;
dhammakucchisamāvāso, viveko tassa vāladhi.
- 696.** “So jhāyī assāsarato, ajjhattaṃ susamāhito;
gacchaṃ samāhito nāgo, ṭhito nāgo samāhito.
- 697.** “Sayāṃ samāhito nāgo, nisinnopi samāhito;
sabbattha saṃvuto nāgo, esā nāgassa sampadā.
- 698.** “Bhuñjati (..0319) anavajjāni, sāvajjāni na bhuñjati;
ghāsamacchādānaṃ laddhā, sannidhiṃ parivajjayaṃ.
- 699.** “Saṃyojanaṃ aṇuṃ thūlaṃ, sabbaṃ chetvāna bandhanaṃ;
yena yeneva gacchati, anapakkhova gacchati.
- 700.** “Yathāpi udake jātaṃ, puṇḍarīkaṃ pavaḍḍhati;
nopalippati toyena, sucigandhaṃ manoramaṃ.
- 701.** “Tatheva ca loke jāto, buddho loke viharati;
nopalippati lokena, toyena padumaṃ yathā.
- 702.** “Mahāgini pajjalito, anāhāropasammati;

aṅgāresu ca santesu, nibbutoti pavuccati.

703. “Atthassāyaṃ viññāpanī, upamā viññūhi desitā;
viññissanti mahānāgā, nāgaṃ nāgena desitaṃ.

704. “Vītarāgo vītadoso, vītamoho anāsavo;
sarīraṃ vijahaṃ nāgo, parinibbissatyanāsavo” ti.

... Udāyī thero

Soḷasakanipāto niṭṭhito.

Tatruddānaṃ-

Koṇḍañño ca udāyī ca, therā dve te mahiddhikā;
soḷasamhi nipātamhi, gāthāyo dve ca tiṃsa cāti.

16. Vīsatinipāto

1. Adhimuttattheragāthā

705. “Yaññatthaṃ (..0320) vā dhanatthaṃ vā, ye hanāma mayaṃ pure;
avasesaṃ § bhayaṃ hoti, vedhanti vilapanti ca.

706. “Tassa te natthi bhītattaṃ, bhiyyo vaṇṇo pasīdati;
kasmā na paridevesi, evarūpe mahabbhaye.

707. “Natthi cetasikaṃ dukkhaṃ, anapekkhassa gāmaṇi;
atikkantā bhayā sabbe, khīṇasaṃyojanassa ve.

708. “Khīṇāya bhavanettiyā, diṭṭhe dhamme yathātathe;
na bhayaṃ maraṇe hoti, bhāranikkhepane yathā.

709. “Suciṇṇaṃ brahmacariyaṃ me, maggo cāpi subhāvito;
maraṇe me bhayaṃ natthi, rogānamiva saṅkhaye.

710. “Suciṇṇaṃ brahmacariyaṃ me, maggo cāpi subhāvito;
nirassādā bhavā diṭṭhā, visaṃ pitvāva § chaḍḍitaṃ.

711. “Pāragū anupādāno, katakicco anāsavo;

- tuṭṭho āyukkhayā hoti, mutto āghātanā yathā.
- 712.** “Uttamaṃ dhammataṃ patto, sabbaloke anathhiko;
ādittāva gharā mutto, maraṇasmimṃ na socati.
- 713.** “Yadatthi saṅgataṃ kiñci, bhavo vā yattha labbhati;
sabbaṃ anissaraṃ etaṃ, iti vuttaṃ mahesinā.
- 714.** “Yo taṃ tathā pajānāti, yathā buddhena desitaṃ;
na gaṇhāti bhavaṃ kiñci, sutattaṃva ayoguḷaṃ.
- 715.** “Na me hoti ‘ahosin’ti, ‘bhavissan’ti na hoti me;
saṅkhārā vigamissanti, tattha kā paridevanā.
- 716.** “Suddhaṃ dhammasamuppādaṃ, suddhaṃ saṅkhārasantatiṃ;
passantassa yathābhūtaṃ, na bhayaṃ hoti gāmaṇi.
- 717.** “Tiṇakaṭṭhasamaṃ (..0321) lokaṃ, yadā paññāya passati;
mamattaṃ so asaṃvindaṃ, ‘natthi me’ti na socati.
- 718.** “Ukkaṇṭhāmi sarīrena, bhavenamhi anathhiko;
soyaṃ bhijjissati kāyo, añño ca na bhavissati.
- 719.** “Yaṃ vo kiccaṃ sarīrena, taṃ karotha yadicchatha;
na me tappaccayā tattha, doso pemañca hehiti”.
- 720.** Tassa taṃ vacanaṃ sutvā, abbhutaṃ lomahaṃsanaṃ;
satthāni nikkhipitvāna, māṇavā etadabravum.
- 721.** “Kiṃ bhadante karitvāna, ko vā ācariyo tava;
kassa sāsanaṃāgama, labbhate taṃ asokatā”.
- 722.** “Sabbaññū sabbadassāvī, jino ācariyo mama;
mahākāruṇiko satthā, sabbalokatikicchako.
- 723.** “Tenāyaṃ desito dhammo, khayagāmī anuttaro;
tassa sāsanaṃāgama, labbhate taṃ asokatā”.
- 724.** Sutvāna corā isino subhāsitaṃ, nikkhippa satthāni ca āvudhāni ca;
tamhā ca kammā viramiṃsu eke, eke ca pabbajjamarocayiṃsu.
- 725.** Te pabbajitvā sugatassa sāsane, bhāvetva bojjaṅgalāni paṇḍitā;
udaggacittā sumanā katindriyā, phusiṃsu nibbānapadaṃ asaṅkhatanti.

...Adhimutto thero....

2. Pārāpariyattheragāthā

- 726.** “Samaṇassa ahu cintā, pārāpariyassa bhikkhuno;
ekakassa nisinnassa, pavivittassa jhāyino.
- 727.** “Kimānupubbaṃ puriso, kiṃ vataṃ kiṃ samācāraṃ;
attano kiccakārīssa, na ca kañci viheṭhaye.
- 728.** “Indriyāni (..0322) manussānaṃ, hitāya ahitāya ca;
arakkhitāni ahitāya, rakkhitāni hitāya ca.
- 729.** “Indriyāneva sārakkhaṃ, indriyāni ca gopayaṃ;

- attano kiccakārīssa, na ca kañci viheṭṭhaye.
- 730.** “Cakkhundriyaṃ ce rūpesu, gacchantam̐ anivārayam̐;
anādīnavadassāvī, so dukkhā na hi muccati.
- 731.** “Sotindriyaṃ ce saddesu, gacchantam̐ anivārayam̐;
anādīnavadassāvī, so dukkhā na hi muccati.
- 732.** “Anissaraṇadassāvī, gandhe ce paṭisevati;
na so muccati dukkhamhā, gandhesu adhimucchito.
- 733.** “Ambilaṃ madhuraggañca, tittakaggamanussaram̐;
rasataṇhāya gadhito, hadayaṃ nāvabujjhati.
- 734.** “Subhānyappaṭikūlāni, phoṭṭhabbāni anussaram̐;
ratto rāgādhikaraṇam̐, vividham̐ vindate dukham̐.
- 735.** “Manam̐ cetehi dhammehi, yo na sakkoti rakkhitum̐;
tato nam̐ dukkhamanveti, sabbehetehi pañcahi.
- 736.** “Pubbalohitasampuṇṇam̐, bahussa kuṇapassa ca;
naravīrakataṃ vaggum̐, samuggamiva cittitam̐.
- 737.** “Kaṭukaṃ madhurassādam̐, piyanibandhanam̐ dukham̐;
khuraṃva madhunā littam̐, ulliham̐ nāvabujjhati.
- 738.** “Itthirūpe itthisare, phoṭṭhabbepi ca itthiyā;
itthigandhesu sāratto, vividham̐ vindate dukham̐.
- 739.** “Itthisotāni sabbāni, sandanti pañca pañcasu;
tesamāvaraṇam̐ kātum̐, yo sakkoti vīriyavā.
- 740.** “So atthavā so dhammaṭṭho, so dakkho so vicakkhaṇo;
kareyya ramamānopi, kiccaṃ dhammatthasam̐hitam̐.
- 741.** “Atho (..0323) sīdati saññuttam̐, vaje kiccaṃ niratthakam̐;
‘na tam̐ kiccaṃ’ti maññitvā, appamatto vicakkhaṇo.
- 742.** “Yañca atthena saññuttam̐, yā ca dhammagatā rati;
tam̐ samādāya vattetha, sā hi ve uttamā rati.
- 743.** “Uccāvacehupāyehi, paresamabhijigīsati;
hantvā vadhitvā atha socayitvā, ālopati sāhasā yo paresam̐.
- 744.** “Tacchanto āṇiyā āṇim̐, nihanti balavā yathā;
indriyānindriyeheva, nihanti kusalo tathā.
- 745.** “Saddham̐ vīriyam̐ samādhiñca, satipaññañca bhāvayam̐;
pañca pañcahi hantvāna, anīgho yāti brāhmaṇo.
- 746.** “So atthavā so dhammaṭṭho, katvā vākyānusāsanim̐;
sabbena sabbam̐ buddhassa, so naro sukhamedhatī”ti.

..Pārāpariyo thero....

3. Telakānittheragāthā

- 747.** “Cirarattam̐ vatātāpī, dhammam̐ anuvicintayam̐;

- samaṃ cittassa nālatthaṃ, pucchaṃ samaṇabrāhmaṇe.
- 748.** “Ko so pāraṅgato loke, ko patto amatogadhaṃ;
kassa dhammaṃ paṭicchāmi, paramatthavijānanaṃ’.
- 749.** “Antovaṅkagato āsi, macchova ghasamāmisam;
baddho mahindapāsena, vepacityasuro yathā.
- 750.** “Añchāmi naṃ na muñcāmi, asmā sokapariddavā;
ko me bandhaṃ muñcaṃ loke, sambodhiṃ vedayissati.
- 751.** “Samaṇaṃ brāhmaṇaṃ vā kaṃ, ādisantaṃ pabhaṅgunaṃ.
kassa dhammaṃ paṭicchāmi, jarāmaccupavāhanaṃ.
- 752.** “Vicikicchākaṅkhāganthitaṃ, sārambhabalasaññutaṃ;
kodhappattamanatthaddhaṃ, abhijappappadāraṇaṃ.
- 753.** “Taṇhādhanusamuṭṭhānaṃ (..0324), dve ca pannarasāyutaṃ §;
passa orasikaṃ bāḷhaṃ, bhetvāna yadi § tiṭṭhati.
- 754.** “Anudiṭṭhīnaṃ appahānaṃ, saṅkappaparatejitaṃ;
tena viddho pavedhāmi, pattaṃva māluteritaṃ.
- 755.** “Ajjhattaṃ me samuṭṭhāya, khippaṃ paccati māmakaṃ;
chaphassāyatanī kāyo, yattha sarati sabbadā.
- 756.** “Taṃ na passāmi tekicchaṃ, yo metaṃ sallamuddhare;
nānārajjena satthena §, nāññena vicikicchitaṃ.

757. “Ko me asattho avaṇo, sallamabbhantarapassayaṃ;
ahiṃsaṃ sabbagattāni, sallamaṃ me uddharissati.
758. “Dhammappati hi so seṭṭho, visadosappavāhako;
gambhīre patitassa me, thalaṃ pāṇiṅca dassaye.
759. “Rahadehamasmi ogāḷho, ahāriyaramattike;
māyā-usūyasārambha, thinamiddhamapatthaṇe.
760. “Uddhaccameghathanitaṃ, saṃyojanavalāhakaṃ;
vāhā vahanti kuddiṭṭhiṃ §, saṅkappā rāganissitā.
761. “Savanti sabbadhi sotā, latā ubbhijja tiṭṭhati;
te sote ko nivāreyya, taṃ lataṃ ko hi checchati.
762. “Velaṃ karotha bhaddante, sotānaṃ sannivāraṇaṃ;
mā te manomayo soto, rukkhaṃva sahasā luve.
763. “Evaṃ me bhayaajātassa, apārā pāramesato;
tāṇo paññāvudho satthā, isisaṅghanisevito.
764. “Sopāṇaṃ sugataṃ suddhaṃ, dhammasāramayaṃ daḷhaṃ;
pādāsi vuyhamānassa, ‘mā bhāyī’ti ca mabravi.
765. “Satipaṭṭhānapāsādaṃ, āruya paccavekkhisāṃ;
yaṃ taṃ pubbe amaññissaṃ, sakkāyābhiraṭaṃ pajāṃ.
766. “Yadā (..0325) ca maggamaddakkiṃ, nāvāya abhirūhanaṃ;
anadhiṭṭhāya attānaṃ, tithamaddakkhimuttamaṃ.
767. “Sallaṃ attasamuṭṭhānaṃ, bhavanettippabhāvitaṃ;
etesāṃ appavattāya §, desesi maggamuttamaṃ.
768. “Dīgharattānusayitaṃ, cirarattamadhiṭṭhitaṃ;
buddho mepānudī ganthaṃ, visadosappavāhana”ti.

...Telakāni thero

4. Raṭṭhapālattheragāthā

769. § “Passa cittakataṃ bimbaṃ, arukāyaṃ samussitaṃ;
āturaṃ bahusaṅkappaṃ, yassa natthi dhuvaṃ ṭhiti.
770. “Passa cittakataṃ rūpaṃ, maṇinā kuṇḍalena ca;
aṭṭhiṃ tacena onaddhaṃ, saha vatthehi sobhati.
771. “Alattakakatā pādā, mukhaṃ cuṇṇakamakkhitaṃ;
alaṃ bālassa mohāya, no ca pāragavesino.
772. “Aṭṭhapadakatā kesā, nettā añjanamakkhitaṃ;
alaṃ bālassa mohāya, no ca pāragavesino.
773. “Añjanīva navā cittā, pūtikāyo alaṅkato;
alaṃ bālassa mohāya, no ca pāragavesino.
774. “Odahi migavo pāsaṃ, nāsadā vāguraṃ migo;
bhutvā nivāpaṃ gacchāma, kandante migabandhake.

775. “Chinno pāso migavassa, nāsadā vāguraṃ migo;
bhutvā nivāpaṃ gacchāma, socante migaluddake.
776. “Passāmi loke sadhane manusse, laddhāna vittaṃ na dadanti mohā;
luddhā dhanam sannaṃ karonti, bhīyova kāme abhipatthayanti.
777. “Rājā (..0326) pasayhappathaviṃ vijetvā, sasāgarantaṃ mahimāvasanto;
oraṃ samuddassa atittarūpo, pāraṃ samuddassapi patthayetha.
778. “Rājā ca aññe ca bahū manussā, avītataṇhā maraṇam upenti;
ūnāva hutvāna jahanti deham, kāmehi lokamhi na hatthi titti.
779. “Kandanti nam ñātī pakiriya kese, aho vatā no amarāti cāhu;
vatthena nam pārutaṃ nīharitvā, citaṃ samodhāya tato ḍahanti.
780. “So ḍayhati sūlehi tujjamāno, ekena vatthena § pahāya bhoge.
na mīyamānassa bhavanti tāṇā, ñātī ca mittā atha vā sahāyā.
781. “Dāyādakā tassa dhanam haranti, satto pana gacchati yena kammaṃ;
na mīyamānam dhanamanveti § kiñci, puttā ca dārā ca dhanañca raṭṭham.
782. “Na dīghamāyumuṃ labhate dhanena, na cāpi vittena jaram vihanti;
appappam hidaṃ jīvitamāhu dhīrā, asassataṃ vippariṇāmadhammaṃ.
783. “Aḍḍhā daliddā ca phusanti phassaṃ, bālo ca dhīro ca tatheva phuṭṭho;
bālo hi bālyā vadhitova seti, dhīro ca no vedhati phassaphuṭṭho.
784. “Tasmā (..0327) hi paññāva dhanena seyyā, yāya vosānamidhādhiga-
cchati;
abyositattā hi bhavābhavesu, pāpāni kammāni karoti mohā.
785. “Upeti gabbhañca parañca lokaṃ, saṃsāramāpajja paramparāya;
tassappapañño abhisaddahanto, upeti gabbhañca parañca lokaṃ.
786. “Coro yathā sandhimukhe gahīto, sakammunā haññati pāpadhammo;
evaṃ pajā pecca paramhi loke, sakammunā haññati pāpadhammo.
787. “Kāmā hi citrā madhurā manoramā, virūparūpena mathenti cittaṃ;
ādīnavaṃ kāmaguṇesu disvā, tasmā aham pabbajitomi rāja.
788. “Dumapphalānīva patanti māṇavā, daharā ca vuḍḍhā ca sarīrabhedā;
etampi disvā pabbajitomi rāja, apaṇṇakaṃ sāmāññameva seyyo.
789. “Saddhāyāham pabbajito, upeto jinasāsane;
avajjhā mayham pabbajjā, anaṇo bhuñjāmi bhojanaṃ.
790. “Kāme ādittato disvā, jātarūpāni satthato;
gabbhavokkantito dukkham, nirayesu mahabbhayaṃ.
791. “Etamādīnavaṃ ñatvā, saṃvegaṃ alabhiṃ tadā;
soham viddho tadā santo, sampatto āsavakkhayaṃ.
792. “Pariciṇṇo mayā satthā, kataṃ buddhassa sāsanaṃ;
ohito garuko bhāro, bhavanetti samūhatā.
793. “Yassatthāya pabbajito, agārasmānagāriyaṃ;
so me attho anuppatto, sabbasaṃyojanakkhaya”ti.

... Raṭṭhapālo thero....

5. Mālukyaṭṭattheragāthā

794. § “Rūpaṃ (..0328) disvā sati muṭṭhā, piyaṃ nimittaṃ manasi karoto.
sārattacitto vedeti, tañca ajjhossa tiṭṭhati.
795. “Tassa vaḍḍhanti vedanā, anekā rūpasambhavā;
abhijjhā ca vihesā ca, cittamassūpahaññati;
evamācinato dukkhaṃ, ārā nibbāna § vuccati.
796. “Saddaṃ sutvā sati muṭṭhā, piyaṃ nimittaṃ manasi karoto;
sārattacitto vedeti, tañca ajjhossa tiṭṭhati.
797. “Tassa vaḍḍhanti vedanā, anekā saddasambhavā;

abhijjhā ca vihesā ca, cittamassūpahaññati;
evamācinato dukkhaṃ, ārā nibbāna vuccati.

798. “Gandhaṃ ghatvā sati muṭṭhā, piyaṃ nimittaṃ manasi karoto;
sārattacitto vedeti, tañca ajjhossa tiṭṭhati.

799. “Tassa vaḍḍhanti vedanā, anekā gandhasambhavā;
abhijjhā ca vihesā ca, cittamassūpahaññati;
evamācinato dukkhaṃ, ārā nibbāna vuccati.

800. “Rasaṃ bhotvā sati muṭṭhā, piyaṃ nimittaṃ manasi karoto;
sārattacitto vedeti, tañca ajjhossa tiṭṭhati.

801. “Tassa vaḍḍhanti vedanā, anekā rasasambhavā;
abhijjhā ca vihesā ca, cittamassūpahaññati;
evamācinato dukkhaṃ, ārā nibbāna vuccati.

802. “Phassaṃ phussa sati muṭṭhā, piyaṃ nimittaṃ manasi karoto;
sārattacitto vedeti, tañca ajjhossa tiṭṭhati.

803. “Tassa vaḍḍhanti vedanā, anekā phassasambhavā;
abhijjhā ca vihesā ca, cittamassūpahaññati;
evamācinato dukkhaṃ, ārā nibbāna vuccati.

804. “Dhammaṃ ñatvā sati muṭṭhā, piyaṃ nimittaṃ manasi karoto;
sārattacitto vedeti, tañca ajjhossa tiṭṭhati.

805. “Tassa (..0329) vaḍḍhanti vedanā, anekā dhammasambhavā;
abhijjhā ca vihesā ca, cittamassūpahaññati;
evamācinato dukkhaṃ, ārā nibbāna vuccati.

806. “Na so rajjati rūpesu, rūpaṃ disvā patissato;
virattacitto vedeti, tañca nājjhossa tiṭṭhati.

807. “Yathāssa passato rūpaṃ, sevato cāpi vedanaṃ;
khīyati nopacīyati, evaṃ so caratī sato;
evaṃ apacinato dukkhaṃ, santike nibbāna vuccati.

808. “Na so rajjati saddesu, saddaṃ sutvā patissato;
virattacitto vedeti, tañca nājjhossa tiṭṭhati.

809. “Yathāssa suṇato saddaṃ, sevato cāpi vedanaṃ;
khīyati nopacīyati, evaṃ so caratī sato;
evaṃ apacinato dukkhaṃ, santike nibbāna vuccati.

810. “Na so rajjati gandhesu, gandhaṃ ghatvā patissato;
virattacitto vedeti, tañca nājjhossa tiṭṭhati.

811. “Yathāssa ghāyato gandhaṃ, sevato cāpi vedanaṃ;
khīyati nopacīyati, evaṃ so caratī sato;
evaṃ apacinato dukkhaṃ, santike nibbāna vuccati.

812. “Na so rajjati rasesu, rasaṃ bhotvā patissato;
virattacitto vedeti, tañca nājjhossa tiṭṭhati.

813. “Yathāssa sāyarato rasaṃ, sevato cāpi vedanaṃ;
khīyati nopacīyati, evaṃ so caratī sato;
evaṃ apacinato dukkhaṃ, santike nibbāna vuccati.

814. “Na so rajjati phassesu, phassaṃ phussa patissato;
virattacitto vedeti, tañca nājjhossa tiṭṭhati.
815. “Yathāssa phusato phassaṃ, sevato cāpi vedanaṃ;
khīyati nopacīyati, evaṃ so caratī sato;
evaṃ apacinato dukkhaṃ, santike nibbāna vuccati.
816. “Na so rajjati dhammesu, dhammaṃ ñatvā patissato;
virattacitto vedeti, tañca nājjhossa tiṭṭhati.
817. “Yathāssa (..0330) vijānato dhammaṃ, sevato cāpi vedanaṃ;
khīyati nopacīyati, evaṃ so caratī sato;
evaṃ apacinato dukkhaṃ, santike nibbāna vuccati”.

... Mālukyaputto thero

6. Selattheragāthā

818. “Paripuṇṇakāyo suruci, sujāto cārudassano;
suaṇṇavaṇṇosi bhagavā, susukkadāṭhosi vīriyavā §.
819. “Narassa hi sujātassa, ye bhavanti viyañjanā;
sabbe te tava kāyasmim, mahāpurisalakkhaṇā.
820. “Pasannanetto sumukho, brahā uju patāpavā;
majjhe samaṇasaṅghassa, ādiccova virocasi.
821. “Kalyāṇadassano bhikkhu, kañcanasannibhattaco;
kiṃ te samaṇabhāvena, evaṃ uttamavaṇṇino.
822. “Rājā arahasi bhavitum, cakkavattī rathesabho;
cāturanto vijitāvī, jambusaṇḍassa § issaro.
823. “Khattiyā bhogī rājāno §, anuyantā bhavanti te.
rājābhirājā § manujindo, rajjaṃ kārehi gotama”.
824. “Rājāhamasmi sela, (selāti bhagavā) dhammarājā anuttaro;
dhammena cakkaṃ vattemi, cakkaṃ appaṭivattiyaṃ”.
825. “Sambuddho paṭijānāsi, (iti selo brāhmaṇo) dhammarājā anuttaro;
‘dhammena cakkaṃ vattemi’, iti bhāsatha gotama.
826. “Ko nu senāpati bhoto, sāvako sathuranvayo §.
ko tetamanuvatteti, dhammacakkaṃ pavattitaṃ”.
827. “Mayā (..0331) pavattitaṃ cakkaṃ, (selāti bhagavā) dhammacakkaṃ anu-
ttaraṃ;
sāriputto anuvatteti, anujāto tathāgataṃ.
828. “Abhiññeyyaṃ abhiññātaṃ, bhāvetabbañca bhāvitaṃ;
pahātabbaṃ pahīnaṃ me, tasmā buddhosmi brāhmaṇa.
829. “Vinayassu mayi kaṅkhaṃ, adhimuñcassu brāhmaṇa;
dullabhaṃ dassanaṃ hoti, sambuddhānaṃ abhiṇhaso.
830. “Yesam ve dullabho loke, pātubhāvo abhiṇhaso;

sohaṃ brāhmaṇa buddhosmi, sallakatto § anuttaro.

831. “Brahmabhūto atitulo, mārasenappamaddano;
sabbāmitte vase § katvā, modāmi akutobhayo”.

832. “Idaṃ bhonto nisāmetha, yathā bhāsati cakkhumā;
sallakatto mahāvīro, sīhova nadatī vane.

833. “Brahmabhūtaṃ atitulaṃ, mārasenappamaddanaṃ;
ko disvā nappasīdeyya, api kaṇhābhijātiko.

834. “Yo maṃ icchati anvetu, yo vā nicchati gacchatu;
idhāhaṃ pabbajissāmi, varapaññassa santike”.

835. “Etaṃ ce ruccati bhoto, sammāsambuddhasāsaṇaṃ;
mayampi pabbajissāma, varapaññassa santike.

836. “Brāhmaṇā tisatā ime, yācanti pañjalikatā;
‘brahmacariyaṃ carissāma, bhagavā tava santike’”.

837. “Svākhātaṃ brahmacariyaṃ, (selāti bhagavā) sandiṭṭhikamakālikaṃ;
yattha amoghā pabbajjā, appamattassa sikkhato”.

838. “Yaṃ taṃ saraṇamāgamha §, ito aṭṭhame § cakkhuma.

- sattarattena bhagavā, dantāmha tava sāsane.
839. “Tuvaṃ (..0332) buddho tuvaṃ satthā, tuvaṃ mārābhibhū muni;
 tuvaṃ anusaye chetvā, tiṇṇo tāresimaṃ pajaṃ.
840. “Upadhī te samatikkantā, āsavā te padālitā;
 sīhova anupādāno, pahīnabhayabheravo.
841. “Bhikkhavo tisaṭā ime, tiṭṭhanti pañjalīkatā;
 pāde vīra pasārehi, nāgā vandantu satthuno” ti.

... Selo thero

7. Kāḷigodhāputtabhaddiyattheragāthā

- 842.** “Yātaṃ me hatthigīvāya, sukhumā vatthā padhāritā;
 sālīnaṃ odano bhutto, sucimaṃsūpasecano.
843. “Sojja bhaddo sātātiko, uñchāpattāgate rato;
 jhāyati anupādāno, putto godhāya bhaddiyo.
844. “Paṃsukūlī sātātiko, uñchāpattāgate rato;
 jhāyati anupādāno, putto godhāya bhaddiyo.
845. “Piṇḍapātī sātātiko ...pe....
846. “Tecīvarī sātātiko ...pe....
847. “Sapadānacārī sātātiko ...pe....
848. “Ekāsanī sātātiko ...pe....
849. “Pattapiṇḍī sātātiko ...pe....
850. “Khalupacchābhattī sātātiko ...pe....
851. “Āraññiko sātātiko ...pe....
852. “Rukkhamūliko sātātiko ...pe....
853. “Abbhokāsī sātātiko ...pe....
854. “Sosāniko sātātiko ...pe....
855. “Yathāsanthatiko sātātiko ...pe....
856. “Nesajjiko (..0333) sātātiko ...pe....
857. “Appiccho sātātiko ...pe....
858. “Santuṭṭho sātātiko ...pe....
859. “Pavivitto sātātiko ...pe....
860. “Asaṃsaṭṭho sātātiko ...pe....
861. “Āraddhavīriyo sātātiko ...pe....
862. “Hitvā satapalaṃ kaṃsaṃ, sovaṇṇaṃ satarājikaṃ;
 aggahiṃ mattikāpattaṃ, idaṃ dutiyābhisecanaṃ.
863. “Ucce maṇḍalipākāre, daḷhamatṭālakoṭṭhake;
 rakkhito khaggahatthehi, uttasam vihariṃ pure.
864. “Sojja bhaddo anutrāsī, pahīnabhayabheravo;
 jhāyati vanamogayha, putto godhāya bhaddiyo.

865. “Sīlakkhandhe patiṭṭhāya, satim paññañca bhāvayaṃ;
pāpuṇim anupubbena, sabbasaṃyojanakkhayan”ti.

... Bhaddiyo kāḷigodhāya putto thero....

8. Aṅgulimālattheragāthā

866. “Gacchaṃ vadesi samaṇa ‘ṭṭhitomhi’, mamañca brūsi ṭṭhitamaṭṭhitoti;
pucchāmi taṃ samaṇa etamatthaṃ, ‘kathaṃ ṭṭhito tvaṃ ahamatṭhitomhi”.
867. “Ṭṭhito ahaṃ aṅgulimāla sabbadā, sabbesu bhūtesu nidhāya daṇḍaṃ;
tuvañca pāṇesu asaññatosi, tasmā ṭṭhitohaṃ tuvamaṭṭhitosi”.
868. “Cirassaṃ vata me mahito mahesī, mahāvanaṃ samaṇo paccapādi §.
sohaṃ cajissāmi sahasapāpaṃ, sutvāna gāthaṃ tava dhammayuttaṃ”.
869. Icceva (..0334) coro asimāvudhañca, sobbhe papāte narake anvakāsi §.
avandi coro sugatassa pāde, tattheva pabbajjamayāci buddhaṃ.
870. Buddho ca kho kāruṇiko mahesi, yo sathā lokassa sadevakassa;
‘tamehi bhikkhū’ti tadā avoca, eseva tassa ahu bhikkhubhāvo.
871. “Yo ca pubbe pamajjitvā, pacchā so nappamajjati;
somaṃ lokaṃ pabhāseti, abbhā muttova candimā.
872. “Yassa pāpaṃ kataṃ kammaṃ, kusalena pidhīyati §.
somaṃ lokaṃ pabhāseti, abbhā muttova candimā.
873. “Yo have daharo bhikkhu, yuñjati buddhasāsane;
somaṃ lokaṃ pabhāseti, abbhā muttova candimā.
874. § “Disāpi me dhammakathaṃ suṇantu, disāpi me yuñjantu buddhasāsane.
disāpi me te manuje bhajantu, ye dhammamevādapayanti santo.
875. “Disā hi me khantivādānaṃ, avirodhappasaṃsinam;
suṇantu dhammaṃ kālena, tañca anuvidhīyantu.
876. “Na hi jātu so mamaṃ hiṃse, aññaṃ vā pana kiñcanaṃ §.
pappuyya paramaṃ santim, rakkheyya tasathāvare.
877. § “Udakañhi nayanti nettikā, usukārā namayanti § tejanaṃ.
dāruṃ namayanti § tacchakā, attānaṃ damayanti paṇḍitā.
878. “Daṇḍeneke (..0335) damayanti, aṅkusebhi kasāhi ca;
adaṇḍena asatthena, ahaṃ dantomhi tādinaṃ.
879. “‘Ahiṃsako’ti me nāmaṃ, hiṃsakassa pure sato;
ajjāhaṃ saccanāmomhi, na naṃ hiṃsāmi kiñcanaṃ §.
880. “Coro ahaṃ pure āsim, aṅgulimāloti vissuto;
vuyhamāno mahoghena, buddhaṃ saraṇamāgamaṃ.
881. “Lohitapāṇi pure āsim, aṅgulimāloti vissuto;
saraṇagamaṇaṃ passa, bhavanetti samūhatā.
882. “Tādisaṃ kammaṃ katvāna, bahuṃ duggatigāminam;
phuṭṭho kammavipākena, anaṇo bhuñjāmi bhojanaṃ.

883. “Pamādamanuyuñjanti, bālā dummedhino janā;
appamādañca medhāvī, dhanam seṭṭhamva rakkhati.
884. “Mā pamādamanuyuñjetha, mā kāmaratisanthavam §;
appamatto hi jhāyanto, pappoti paramam sukham.
885. “Svāgataṃ nāpagataṃ, netam dummantitam mama;
savibhattesu dhammesu, yam seṭṭham tadupāgamaṃ.
886. “Svāgataṃ nāpagataṃ, netam dummantitam mama;
tisso vijjā anuppattā, kataṃ buddhassa sāsanaṃ.
887. “Araññe rukkhāmūle vā, pabbatesu guhāsu vā;
tatha tattheva aṭṭhāsiṃ, ubbiggamanaso tadā.
888. “Sukham sayāmi ṭhāyāmi, sukham kappemi jīvitam;
ahatthapāso mārassa, aho satthānukampito.
889. “Brahmajacco pure āsiṃ, udicco ubhato ahu;
sojja putto sugatassa, dhammarājassa satthuno.
890. “Vītaṇho anādāno, guttadvāro susaṃvuto;
aghamūlam vadhitvāna, patto me āsavakkhayo.

891. “Pariciṇṇo (..0336) mayā satthā, kataṃ buddhassa sāsanaṃ;
ohito garuko bhāro, bhavanetti samūhatā”ti.

... Aṅgulimālo thero

9. Anuruddhattheragāthā

892. “Pahāya mātāpitaro, bhaginiñātibhātaro;
pañca kāmagaṇe hitvā, anuruddhova jhāyatu.
893. “Sameto naccagītehi, sammatāḷappabodhano;
na tena suddhimajjhagaṃ §, mārassa visaye rato.
894. “Etañca samatikkamma, rato buddhassa sāsane;
sabboghaṃ samatikkamma, anuruddhova jhāyati.
895. “Rūpā saddā rasā gandhā, phoṭṭhabbā ca manoramā;
ete ca samatikkamma, anuruddhova jhāyati.
896. “Piṇḍapātaṭikkanto, eko adutiyo muni;
esati paṃsukūlāni, anuruddho anāsavo.
897. “Vicinī aggahī dhovi, rajayī dhārayī muni;
paṃsukūlāni matimā, anuruddho anāsavo.
898. “Mahiccho ca asantuṭṭho, saṃsaṭṭho yo ca uddhato;
tassa dhammā ime honti, pāpakā saṃkilesikā.
899. “Sato ca hoti appiccho, santuṭṭho avighātavā;
pavivekarato vitto, niccamāraddhavīriyo.
900. “Tassa dhammā ime honti, kusalā bodhipakkhikā;
anāsavo ca so hoti, iti vuttaṃ mahesinā.
901. “Mama saṅkappamaññāya, satthā loke anuttaro;
manomayena kāyena, iddhiyā upasaṅkami.
902. “Yadā me ahu saṅkappo, tato uttari desayi;
nippapañcarato buddho, nippapañcamadesayi.
903. “Tassāhaṃ dhammamaññāya, vihāsiṃ sāsane rato;
tisso vijjā anuppattā, kataṃ buddhassa sāsanaṃ.
904. “Pañcapaññāsavassāni (..0337), yato nesajjiko ahaṃ;
pañcavīsativassāni, yato middhaṃ samūhataṃ.
905. § “Nāhu assāsapassāsā, ṭhitacittassa tādino.
anejo santimārabbha, cakkhumā parinibbuto.
906. § “Asallīnena cittena, vedanaṃ ajjhavāsayi;
pajjotasseva nibbānaṃ, vimokkho cetaso ahu.
907. “Ete pacchimakā dāni, munino phassapañcamā;
nāññe dhammā bhavissanti, sambuddhe parinibbute.
908. “Natthi dāni punāvāso, devakāyasmi jālini;
vikkhīṇo jātisamsāro, natthi dāni punabbhavo.

909. “Yassa muhuttana saḥassadhā, loko saṃvidito sabrahmakappo;
vasī iddhiguṇe cutūpapāte, kāle passati devatā sa bhikkhu §.
910. “Annabhāro § pure āsiṃ, daliddo ghāsahārako;
samaṇaṃ paṭipādesiṃ, upariṭṭhaṃ yasassinaṃ.
911. “Somhi sakyakule jāto, anuruddhoti maṃ vidū;
upeto naccagītehi, sammatāḷappabodhano.
912. “Athaddasāsiṃ sambuddhaṃ, satthāraṃ akutobhayaṃ;
tasmīṃ cittaṃ pasādetvā, pabbajiṃ anagāriyaṃ.
913. “Pubbenivāsaṃ jānāmi, yattha me vusitaṃ pure;
tāvatiṃsesu devesu, aṭṭhāsiṃ sakkajātiyā §.
914. “Sattakkhattuṃ manussindo, ahaṃ rajjamakārayiṃ;
cāturanto vijitāvī, jambusaṇḍassa issaro;
adaṇḍena asatthena, dhammena anusāsayiṃ.
915. “Ito satta tato satta, saṃsārāni catuddasa;
nivāsamabhijānissaṃ, devaloke ṭhitā tadā.
916. “Pañcaṅgike (..0338) samādhimhi, sante ekodibhāvite;
paṭippassaddhiladdhamhi, dibbacakkhu visujjhi me.
917. “Cutūpapātaṃ jānāmi, sattānaṃ āgatiṃ gatiṃ;
itthabhāvaññathābhāvaṃ, jhāne pañcaṅgike ṭhito.
918. “Pariciṅṅo mayā satthā ...pe... bhavanetti samūhatā.
919. “Vajjīnaṃ veḷuvagāme, ahaṃ jīvitasañkhayā;
heṭṭhato veḷugumbasmiṃ, nibbāyissaṃ anāsavo” ti.

... Anuruddho thero....

10. Pārāpariyattheragāthā

920. Samaṇassa ahu cintā, pupphitamhi mahāvane;
ekaggassa nisinnassa, pavivittassa jhāyino.
921. “Aññathā lokanāthamhi, tiṭṭhante purisuttame;
iriyāṃ āsi bhikkhūnaṃ, aññathā dāni dissati.
922. “Sītavātaparittānaṃ, hirikopīnachādanaṃ;
mattaṭṭhiyaṃ abhuñjiṃsu, santuṭṭhā itaritare.
923. “Paṇītaṃ yadi vā lūkhaṃ, appaṃ vā yadi vā bahuṃ;
yāpanatthaṃ abhuñjiṃsu, agiddhā nādhimucchitā.
924. “Jīvitānaṃ parikkhāre, bhesajje atha paccaye;
na bāḷhaṃ ussukā āsuṃ, yathā te āsavakkhaye.
925. “Araññe rukkhāmūlesu, kandarāsu guhāsu ca;
vivekamanubrūhantā, vihaṃsu tapparāyanā.
926. “Nīcā niviṭṭhā subharā, mudū atthaddhamānasā;
abyāsekā amukharā, atthacintā vasānugā.

927. “Tato pāsādikaṃ āsi, gataṃ bhuttaṃ nisevitaṃ;
siniddhā teladhārāva, ahosi iriyāpatho.
928. “Sabbāsavaparikkhīṇā, mahājhāyī mahāhitā;
nibbutā dāni te therā, parittā dāni tādisā.
929. “Kusalānañca (..0339) dhammānaṃ, paññāya ca parikkhayā;
sabbākāravārūpetam, lujjate jinasāsanaṃ.
930. “Pāpakānañca dhammānaṃ, kilesānañca yo utu;
upaṭṭhitā vivekāya, ye ca saddhammasesakā.
931. “Te kilesā pavaḍḍhantā, āvisanti bahum jaṇaṃ;
kiḷanti maññe bālehi, ummattehiva rakkhasā.
932. “Kilesehābhibhūtā te, tena tena vidhāvitā;
narā kilesavatthūsu, sasaṅgāmeva ghosite.
933. “Pariccajitvā saddhammaṃ, aññamaññehi bhaṇḍare;
diṭṭhigatāni anventā, idaṃ seyyoti maññare.
934. “Dhanañca puttaṃ bhariyañca, chaḍḍayitvāna niggatā;
kaṭacchubhikkhahetūpi, akicchāni nisevare.
935. “Udarāvadehakaṃ bhutvā, sayantuttānaseyyakā;
kathaṃ vattenti § paṭibuddhā, yā kathā satthugarahitā.
936. “Sabbakārukasippāni, cittaṃ katvāna § sikkhare.
avūpasantā ajjhattaṃ, sāmaññatthoti acchati §.
937. “Mattikaṃ telacuṇṇaṃca, udakāsanabhojanaṃ;

- gihīnaṃ upanāmenti, ākaṅkhaṅtā bahuttaraṃ.
- 938.** “Dantaponam kapitthañca, pupphaṃ khādaniyāni ca;
piṇḍapāte ca sampanne, ambe āmalakāni ca.
- 939.** “Bhesajjesu yathā vejjā, kiccākicce yathā gihi;
gaṇikāva vibhūsāyaṃ, issare khattiyā yathā.
- 940.** “Nekatikā vañcanikā, kūṭasakkhī apāṭukā;
bahūhi parikappehi, āmisaṃ paribhuñjare.
- 941.** “Lesakappe pariyāye, parikappenu dhāvītā;
jīvikatthā upāyena, saṅkaḍḍhanti bahuṃ dhanam.
- 942.** “Upaṭṭhāpentī (..0340) parisam, kammato no ca dhammato;
dhammam paresam desenti, lābhato no ca atthato.
- 943.** “Saṅghalābhassa bhaṇḍanti, saṅghato paribāhirā;
paralābhopajīvantā, ahirīkā na lajjare.
- 944.** “Nānuyuttā tathā eke, muṇḍā saṅghāṭipārūtā;
sambhāvanamye vicchanti, lābhasakkāramucchitā.
- 945.** “Evaṃ nānappayātamhi, na dāni sukaram tathā;
aphusitam vā phusitum, phusitam vānurakkhitum.
- 946.** “Yathā kaṇṭakaṭṭhānamhi, careyya anupāhano;
satiṃ upaṭṭhapetvāna, evaṃ gāme munī care.
- 947.** “Saritvā pubbake yogī, tesam vattamanussaram;
kiñcāpi pacchimo kālo, phuseyya amataṃ padaṃ.
- 948.** “Idam vatvā sālavane, samaṇo bhāvitindriyo;
brāhmaṇo parinibbāyī, isi khīṇapuna bhavo” ti.

... Pārāpariyo § thero

Vīsatinipāto niṭṭhito.

Tatruddānam-

Adhimutto pārāpariyo, telakāni raṭṭhapālo;
mālukyase lo bhaddiyo, aṅguli dibbacakkhuko.
Pārāpariyo dasete, vīsamhi parikittitā;
gāthāyo dve satā honti, pañcatālīsa § uttarinti.

17. Tiṃsanipāto

1. Phussattheragāthā

- 949.** Pāsādike (..0341) bahū disvā, bhāvitatte susamvute;
isi paṇḍarasagotto §, apucchi phussasavhayaṃ.
- 950.** “Kimchandā kimadhippāyā, kimākappā bhavissare;

anāgatamhi kālamhi, taṃ me akkhāhi pucchito”.

951. “Suṇohi vacanaṃ mayhaṃ, isipaṇḍarasavhaya;
sakkaccaṃ upadhārehi, ācikkhissāmyanāgataṃ.
952. “Kodhanā upanāhi ca, makkhī thambhī saṭhā bahū;
ussukī nānāvādā ca, bhavissanti anāgate.
953. “Aññātamānino dhamme, gambhīre tīragocarā;
lahukā agaru dhamme, aññamaññamagāravā.
954. “Bahū ādīnavā loke, uppajjissantyanāgate;
sudesitaṃ imaṃ dhammaṃ, kilesessanti § dummatī.
955. “Guṇahīnāpi saṅghamhi, voharantā visāradā;
balavanto bhavissanti, mukharā assutāvino.
956. “Guṇavantopi saṅghamhi, voharantā yathāthato;
dubbalā te bhavissanti, hirīmanā anatthikā.
957. “Rajataṃ jātarūpañca, khettaṃ vatthumajeḷakaṃ;
dāsīdāsañca dummedhā, sādīyissantyanāgate.
958. “Ujjhānasaññino bālā, sīlesu asamāhitā;
unnaḷā vicarissanti, kalahābhiratā magā.
959. “Uddhatā ca bhavissanti, nīlacīvarapārutā;
kuhā thaddhā lapā siṅgī, carissantyariyā viya.
960. “Telasaṅṭhehi kesehi, capalā añjanakkhikā;
rathiyāya gamissanti, dantavaṇṇikapārutā.
961. “Ajegucchaṃ (..0342) vimuttehi, surattaṃ arahaddhajaṃ;
jigucchissanti kāsāvaṃ, odātesu samucchitā §.
962. “Lābhakāmā bhavissanti, kusitā hīnavīriyā;
kicchantaṃ vanapatthāni, gāmantesu vasissare.
963. “Ye ye lābhaṃ labhissanti, micchājīvaratā sadā;
te teva anusikkhantā, bhajissanti asaṃyatā.
964. “Ye ye alābhino lābhaṃ, na te pujjā bhavissare;
supesalepi te dhīre, sevissanti na te tadā.
965. “Milakkhuraṇaṃ rattaṃ §, garahantā sakaṃ dhajaṃ;
titthiyānaṃ dhajaṃ keci, dhārissantyavadātaṃ.
966. “Agāravo ca kāsāve, tadā tesāṃ bhavissati;
paṭisaṅkhā ca kāsāve, bhikkhūnaṃ na bhavissati.
967. “Abhibhūtassa dukkhena, sallavidhassa ruppato;
paṭisaṅkhā mahāghorā, nāgassāsi acintiyā.
968. “Chaddanto hi tadā disvā, surattaṃ arahaddhajaṃ;
tāvadeva bhaṇī gāthā, gajo atthopasaṃhitā”.
969. § “Anikkasāvo kāsāvaṃ, yo vatthaṃ paridhassati §.
apeto damasaccena, na so kāsāvamarahati.
970. “Yo ca vantakāsāvassa, sīlesu susamāhito;
upeto damasaccena, sa ve kāsāvamarahati.
971. “Vipannasīlo dummedho, pākaṭo kāmākāriyo;

- vibbhantacitto nissukko, na so kāsāvamarahati.
- 972.** “Yo ca sīlena sampanno, vītarāgo samāhito;
odātamanasaṅkappo, sa ve kāsāvamarahati.
- 973.** “Uddhato unnaḷo bālo, sīlaṃ yassa na vijjati;
odātakaṃ arahati, kāsāvaṃ kiṃ karissati.
- 974.** “Bhikkhū (..0343) ca bhikkhuniyo ca, duṭṭhacittā anādarā;
tādīnaṃ mettacittānaṃ, niggaṇhissantyanāgate.
- 975.** “Sikkhāpentāpi therehi, bālā cīvaradhāraṇaṃ;
na suṇissanti dummedhā, pākaṭā kāmakāriyā.
- 976.** “Te tathā sikkhitā bālā, aññamaññaṃ agāravā;
nādiyissantupajjhāye, khaḷuṅko viya sārathiṃ.
- 977.** “Evaṃ anāgataddhānaṃ, paṭipatti bhavissati;
bhikkhūnaṃ bhikkhunīnañca, patte kālamhi pacchime.
- 978.** “Purā āgacchate etaṃ, anāgataṃ mahabbhayaṃ;
subbacā hotha sakhilā, aññamaññaṃ sagāravā.
- 979.** “Mettacittā kāruṇikā, hotha sīlesu saṃvutā;
āraddhavīriyā pahitattā, niccaṃ daḷhaparakkamā.
- 980.** “Pamādaṃ bhayato disvā, appamādañca khemato;
bhāvethaṭṭhaṅgikaṃ maggaṃ, phusantā amataṃ padan”ti.

... Phusso thero

2. Sāriputtattheragāthā

981. “Yathācārī yathāsato satīmā, yatasañkappajjhāyi appamatto;
ajjhattarato samāhitatto, eko santusito tamāhu bhikkhuṃ.
982. “Allaṃ sukkaṃ vā bhuñjanto, na bālhaṃ suhito siyā;
ūnūdarō mitāhāro, sato bhikkhu paribbaje.
983. “Cattāro pañca ālope, abhutvā udakaṃ pive;
alaṃ phāsuvihārāya, pahitattassa bhikkhuno.
984. “Kappiyaṃ taṃ ce chādeti, cīvaraṃ idamatthikaṃ §.
alaṃ phāsuvihārāya, pahitattassa bhikkhuno.
985. “Pallaṅkena (..0344) nisinnassa, jaṇṇuke nābhivassati;
alaṃ phāsuvihārāya, pahitattassa bhikkhuno.
986. § “Yo sukkaṃ dukkhato adda, dukkhamaddakkhi sallato.
ubhayantarena § nāhosi, kena lokasmi kiṃ siyā.
987. “Mā me kadāci pāpiccho, kusito hīnavīriyo;
appassuto anādarō, kena lokasmi kiṃ siyā.
988. “Bahussuto ca medhāvī, sīlesu susamāhito;
cetosamathamanuyutto, api muddhani tiṭṭhatu.
989. “Yo papañcamanuyutto, papañcābhirato mago;
virādhayī so nibbānaṃ, yogakkhemaṃ anuttaraṃ.
990. “Yo ca papañcaṃ hitvāna, nippapañcapathe rato;
ārādhayī so nibbānaṃ, yogakkhemaṃ anuttaraṃ.
991. § “Gāme vā yadi vāraññe, ninne vā yadi vā thale;
yattha arahanto viharanti, taṃ bhūmirāmaṇeyyakaṃ.
992. “Ramaṇīyāni araññāni, yattha na ramatī jano;
vītarāgā ramissanti, na te kāmāgavesino.
993. § “Nidhīnaṃva pavattāraṃ, yaṃ passe vajjadassināṃ;
niggayhavādiṃ medhāviṃ, tādisaṃ paṇḍitaṃ bhaje;
tādisaṃ bhajamānassa, seyyo hoti na pāpiyo.
994. § “Ovadeyyānusāseyya, asabbhā ca nivāraye;
satañhi so piyo hoti, asataṃ hoti appiyo.
995. “Aññassa bhagavā buddho, dhammaṃ desesi cakkhumā;
dhamme desiyamānamhi, sotamodhesimatthiko;
taṃ me amoghaṃ savanaṃ, vimuttomhi anāsavo.
996. “Neva pubbenivāsāya, napi dibbassa cakkhuno;
cetopariyāya iddhiyā, cutiyā upapattiyā;
sotadhātuvisuddhiyā, paṇidhī me na vijjati §.
997. “Rukkhamūlaṃva (..0345) nissāya, muṇḍo saṅghāṭipāruto;
paññāya uttamo thero, upatissova § jhāyati.
998. “Avitakkaṃ samāpanno, sammāsambuddhasāvako;
ariyena tuṅhībhāvena, upeto hoti tāvade.

999. § “Yathāpi pabbato selo, acalo suppatiṭṭhito;
evaṃ mohakkhayā bhikkhu, pabbatova na vedhati.
1000. “Anaṅgaṇassa posassa, niccaṃ sucigavesino;
vālaggamattaṃ pāpassa, abbhamaṃva khāyati.
1001. “Nābhinandāmi maraṇaṃ, nābhinandāmi jīvitaṃ;
nikkhipissaṃ imaṃ kāyaṃ, sampajāno patissato.
1002. “Nābhinandāmi maraṇaṃ, nābhinandāmi jīvitaṃ;
kālañca paṭikañkhāmi, nibbisaṃ bhatako yathā.
1003. “Ubhayena midamaṃ maraṇameva, nāmaraṇaṃ pacchā vā pure vā;
paṭipajjatha mā vinassatha, khaṇo vo mā upaccagā.
1004. “Nagaraṃ yathā paccantaṃ, guttaṃ santarabāhiraṃ;
evaṃ gopetha attānaṃ, khaṇo vo mā upaccagā;
khaṇātītā hi socanti, nirayamhi samappitā.
1005. “Upasanto uparato, mantabhāṇi § anuddhato.
dhunāti pāpake dhamme, dumapattaṃva māluto.
1006. “Upasanto uparato, mantabhāṇi anuddhato;
appāsi § pāpake dhamme, dumapattaṃva māluto.
1007. “Upasanto anāyāso, vipprasanno anāvilo;
kalyāṇasīlo medhāvī, dukkhassantakaro siyā.
1008. “Na vissase ekatiyesu evaṃ, agārisu pabbajitesu cāpi;
sādhūpi hutvā na asādhu honti, asādhu hutvā puna sādhu honti.
1009. “Kāmacchando (..0346) ca byāpādo, thinamidhañca bhikkhuno;
uddhaccaṃ vicikicchā ca, pañcete cittakelisā.
1010. “Yassa sakkariyamānassa, asakkārena cūbhayaṃ;
samādhi na vikampati, appamādavihārino.
1011. “Taṃ jhāyinaṃ sātatikaṃ, sukhumadiṭṭhivipassakaṃ;
upādānakkhayārāmaṃ, āhu sappuriso iti.
1012. “Mahāsamuddo pathavī, pabbato anilopi ca;
upamāya na yujjanti, satthu varavimuttiyā.
1013. “Cakkānuvattako thero, mahāñāṇi samāhito;
pathavāpaggisamāno, na rajjati na dussati.
1014. “Paññāpāramitaṃ patto, mahābuddhi mahāmati;
ajaḷo jaḷasamāno, sadā carati nibbuto.
1015. “Pariciṇṇo mayā satthā ...pe... bhavanetti samūhatā.
1016. “Sampādethappamādena, esā me anusāsani;
handāhaṃ parinibbissaṃ, vipparamuttomhi sabbadhi”ti.

... Sāriputto thero....

3. Ānandattheragāthā

1017. “Pisuṇena ca kodhanena ca, maccharinā ca vibhūtanandinā;
sakhitaṃ na kareyya paṇḍito, pāpo kāpurisena saṅgamo.
1018. “Saddhena ca pesalena ca, paññavatā bahussutena ca;
sakhitaṃ kareyya paṇḍito, bhaddo sappurisenā saṅgamo.
1019. “Passa cittaḥkataṃ bimbaṃ ...pe... yassa natthi dhavaṃ ṭhiti.
1020. “Passa cittaḥkataṃ bimbaṃ ...pe... vatthehi sobhati.
1021. “Alattakakatā (..0347) ...pe... no ca pāragavesino.
1022. “Aṭṭhapadakatā ...pe... no ca pāragavesino.
1023. “Añjanīva navā ...pe... no ca pāragavesino.
1024. “Bahussuto cittaḥkathī, buddhassa paricārako;
pannabhāro visaññutto, seyyaṃ kappeti gotamo.
1025. “Khīṇāsavo visaññutto, saṅgātīto sunibbuto;
dhāreti antimāṃ dehaṃ, jātimaraṇapāragū.
1026. “Yasmiṃ patiṭṭhitā dhammā, buddhassādiccabandhuno;
nibbānagamane magge, soyaṃ tiṭṭhati gotamo.
1027. “Dvāsīti buddhato gaṇhiṃ, dve saḥassāni bhikkhuto;

- caturāsītisahassāni, ye me dhammā pavattino.
- 1028.** “Appassutāyaṃ puriso, balibaddova jīrati;
maṃsāni tassa vaḍḍhanti, paññā tassa na vaḍḍhati.
- 1029.** “Bahussuto appassutaṃ, yo sutenātimaññati;
andho padīpadhārova, tatheva paṭibhāti maṃ.
- 1030.** “Bahussutaṃ upāseyya, sutañca na vināsaye;
taṃ mūlaṃ brahmacariyassa, tasmā dhammadharo siyā.
- 1031.** “Pubbāparaññū atthaññū, niruttipadakovidō;
suggahitañca gaṇhāti, atthañcopaparikkhati.
- 1032.** “Khantiyā chandikato § hoti, ussahitvā tuletī taṃ.
samaye so padahati, ajjhataṃ susamāhito.
- 1033.** “Bahussutaṃ dhammadharaṃ, sappaññaṃ buddhasāvakaṃ;
dhammaviññāṇamaṅkaṅkhaṃ, taṃ bhajetha tathāvidhaṃ.
- 1034.** “Bahussuto dhammadharo, kosārakkho mahesino;
cakkhu sabbassa lokassa, pūjaniyo bahussuto.
- 1035.** “Dhammārāmo dhammarato, dhammaṃ anuvicintayaṃ;
dhammaṃ anussaraṃ bhikkhu, saddhammā na parihāyati.
- 1036.** “Kāyamaccheragaruno (..0348) §, hiyyamāne § anuṭṭhahe.
sarīrasukhagiddhassa, kuto samaṇaphāsutā.
- 1037.** “Na pakkhanti disā sabbā, dhammā na paṭibhanti maṃ;
gate kalyāṇamittamhi, andhakāraṃva khāyati.
- 1038.** “Abbhatītasahāyassa, atītagatasatthuno;
natthi etādisaṃ mittam, yathā kāyagatā sati.
- 1039.** “Ye purāṇā atītā te, navehi na sameti me;
svajja ekova jhāyāmi, vassupetova pakkhimā.
- 1040.** “Dassanāya abhikkante, nānāverajjake bahū;
mā vārayittha sotāro, passantu samayo mamaṃ.
- 1041.** “Dassanāya abhikkante, nānāverajjake puthu;
karoti satthā okāsaṃ, na nivāreti cakkhumā.
- 1042.** “Paṇṇavīsativassāni, sekhabhūtassa me sato;
na kāmasaññā uppajji, passa dhammasudhammataṃ.
- 1043.** “Paṇṇavīsativassāni, sekhabhūtassa me sato;
na dosasaññā uppajji, passa dhammasudhammataṃ.
- 1044.** “Paṇṇavīsativassāni, bhagavantaṃ upaṭṭhahiṃ;
mettena kāyakammena, chāyāva anapāyinī §.
- 1045.** “Paṇṇavīsativassāni, bhagavantaṃ upaṭṭhahiṃ;
mettena vacīkammena, chāyāva anapāyinī.
- 1046.** “Paṇṇavīsativassāni, bhagavantaṃ upaṭṭhahiṃ;
mettena manokammena, chāyāva anapāyinī.
- 1047.** “Buddhassa caṅkamantassa, piṭṭhito anucaṅkamhiṃ;
dhamme desiyamānamhi, ñāṇaṃ me udapajjatha.
- 1048.** “Ahaṃ sakaraṇīyomhi, sekho appattamānaso;

- satthu ca parinibbānaṃ, yo amhaṃ anukampako.
- 1049.** “Tadāsi (..0349) yaṃ bhīṃsanakaṃ, tadāsi lomahaṃsanaṃ;
sabbākāravāpēte, sambuddhe parinibbute.
- 1050.** “Bahussuto dhammadharo, kosārakkho mahesino;
cakkhu sabbassa lokassa, ānando parinibbuto.
- 1051.** “Bahussuto dhammadharo, kosārakkho mahesino;
cakkhu sabbassa lokassa, andhakāre tamonudo.
- 1052.** “Gatimanto satimanto, dhitimanto ca yo isi;
saddhammadhārako thero, ānando ratanākaro.
- 1053.** “Pariciṇṇo mayā satthā, kataṃ buddhassa sāsanaṃ;
ohito garuko bhāro, natthi dāni punabbhavo”ti.

... Ānando thero

Tiṃsanipāto niṭṭhito.

Tatruddānaṃ-

Phussopatisso ānando, tayotime pakittitā;
gāthāyo tattha saṅkhātā, sataṃ pañca ca uttarīti;

18. Cattālīsanipāto

1. Mahākassapattheragāthā

- 1054.** “Na (..0350) gaṇena purakkhato care, vimano hoti samādhi dullabho;
nānājanasaṅgaho dukho, iti disvāna gaṇaṃ na rocaye.
- 1055.** “Na kulāni upabbaje muni, vimano hoti samādhi dullabho;
so ussukko rasānugiddho, atthaṃ riñcati yo sukhāvaho.
- 1056.** “Paṅkoti hi naṃ avedayaṃ, yāyaṃ vandanapūjanā kulesu;
sukhumaṃ salla durubbahaṃ, sakkāro kāpurisena dujjaho.
- 1057.** “Senāsanamhā oruyha, nagaraṃ piṇḍāya pāvisiṃ;
bhuñjantaṃ purisaṃ kuṭṭhiṃ, sakkaccaṃ taṃ upaṭṭhahiṃ.
- 1058.** “So me § pakkena hatthena, ālopaṃ upanāmayi;
ālopaṃ pakkipantassa, aṅguli cettha § chijjatha.
- 1059.** “Kuṭṭamūlañca § nissāya, ālopaṃ taṃ abhuñjisaṃ;
bhuñjamāne vā bhutte vā, jegucchaṃ me na vijjati.
- 1060.** “Uttiṭṭhapiṇḍo āhāro, pūtimuttañca osadhaṃ;
senāsanaṃ rukkhamaṃ, paṃsukūlañca cīvaraṃ;
yassete abhisambhutvā §, sa ve cātuddiso naro.
- 1061.** “Yattha eke vihaññanti, āruhantā siluccayaṃ;

- tassa buddhassa dāyādo, sampajāno patissato;
iddhibalenupatthaddho, kassapo abhirūhati.
- 1062.** “Piṇḍapātapaṭikkanto (..0351), selamāruyha kassapo;
jhāyati anupādāno, pahīnabhayabheravo.
- 1063.** “Piṇḍapātapaṭikkanto, selamāruyha kassapo;
jhāyati anupādāno, ḍayhamānesu nibbuto.
- 1064.** “Piṇḍapātapaṭikkanto, selamāruyha kassapo;
jhāyati anupādāno, katakicco anāsavo.
- 1065.** “Karerimālāvitatā, bhūmibhāgā manoramā;
kuñjarābhirudā rammā, te selā ramayanti maṃ.
- 1066.** “Nīlabbhavaṇṇā rucirā, vārisītā sucindharā;
indagopakasañchannā, te selā ramayanti maṃ.
- 1067.** “Nīlabbhakūṭasadisā, kūṭāgāravārūpamā;
vāraṇābhirudā rammā, te selā ramayanti maṃ.
- 1068.** “Abhivutṭhā rammatalā, nagā isibhi sevitā;
abhunnaditā sikhīhi, te selā ramayanti maṃ.
- 1069.** “Alaṃ jhāyitukāmassa, pahitattassa me sato;
alaṃ me atthakāmassa Ṣ, pahitattassa bhikkhuno.
- 1070.** “Alaṃ me phāsukāmassa, pahitattassa bhikkhuno;
alaṃ me yogakāmassa, pahitattassa tādino.
- 1071.** “Umāpupphena samānā, gaganāvabbhachāditā;

- nānādiḷagaṇākiṇṇā, te selā ramayanti maṃ.
- 1072.** “Anākiṇṇā gahaṭṭhehi, migasaṅghanisevitā;
nānādiḷagaṇākiṇṇā, te selā ramayanti maṃ.
- 1073.** “Acchodikā puthusilā, gonaṅgulamigāyutā;
ambusevālasaṅchannā, te selā ramayanti maṃ.
- 1074.** “Na pañcaṅgikena turiyena, rati me hoti tādīsī;
yathā ekaggacittassa, sammā dhammaṃ vipassato.
- 1075.** “Kammaṃ (..0352) bahukaṃ na kāraye, parivajjeyya janaṃ na uyyame;
ussukko so rasānugiddho, atthaṃ riñcati yo sukhāvaho.
- 1076.** “Kammaṃ bahukaṃ na kāraye, parivajjeyya anattaneyyametaṃ;
kicchati kāyo kilamati, dukkhito so samathaṃ na vindati.
- 1077.** “Oṭṭhappahatamattena, attānampi na passati;
patthaddhagīvo carati, ahaṃ seyyoti maññati.
- 1078.** “Aseyyo seyyasamānaṃ, bālo maññati attānaṃ;
na taṃ viññū pasamsanti, patthaddhamānasaṃ naraṃ.
- 1079.** “Yo ca seyyohamasmiti, nāhaṃ seyyoti vā pana;
hīno taṃsadiso § vāti, vidhāsu na vikampati.
- 1080.** “Paññavantaṃ tathā tādiṃ, sīlesu susamāhitaṃ;
cetosamathamanttaṃ, tañce viññū pasamsare.
- 1081.** “Yassa sabrahmacārīsu, gāravo nūpalabbhati;
ārakā hoti saddhammā, nabhato puthavī yathā.
- 1082.** “Yesañca hiri ottappaṃ, sadā sammā upaṭṭhitaṃ;
virūḷhabrahmacariyā te, tesam khīṇā punabbhavā.
- 1083.** “Uddhato capalo bhikkhu, paṃsukūlena pāruto;
kapīva sīhacamma, na so tenupasobhati.
- 1084.** “Anuddhato acapalo, nipako saṃvutindriyo;
sobhati paṃsukūlena, sīhova girigabbhare.
- 1085.** “Ete sambahulā devā, iddhimanto yasassino;
dasadevasahassāni, sabbe te brahmakāyikā.
- 1086.** “Dhammasenāpatiṃ vīraṃ, mahājhāyiṃ samāhitaṃ;
sāriputtaṃ namassantā, tiṭṭhanti pañjalīkatā.
- 1087.** “‘Namo (..0353) te purisājañña, namo te purisuttama;
yassa te nābhijānāma, yampi nissāya jhāyati §.
- 1088.** “‘Accheraṃ vata buddhānaṃ, gambhīro gocaro sako;
ye mayaṃ nābhijānāma, vāavedhisamāgatā’.
- 1089.** “Taṃ tathā devakāyehi, pūjitaṃ pūjanārahaṃ;
sāriputtaṃ tadā disvā, kappinassa sitaṃ ahu.
- 1090.** “Yāvatā buddhakhettamhi, ṭhapayitvā mahāmunim;
dhutaḷaṇe visiṭṭhohaṃ, sadiso me na vijjati.
- 1091.** “Pariciṇṇo mayā satthā, kataṃ buddhassa sāsanaṃ;
ohito garuko bhāro, natthi dāni punabbhavo.
- 1092.** “Na cīvare na sayane, bhojane nupalimpati;

gotamo anappameyyo, muḷālapupphaṃ vimalaṃva;
ambunā nekkhammaninno, tibhavābhinissaṭo.

1093. “Satipaṭṭhānagīvo so, saddhāhattho mahāmuni;
paññāsīso mahāñāṇī, sadā carati nibbuto”ti.

... Mahākassapo thero....

Cattālīsanipāto niṭṭhito.

Tatruddānaṃ-

Cattālīsanipātamhi, mahākassapasavhayo;
ekova thero gāthāyo, cattāsīla duvepi cāti.

19. Paññāsanipāto

1. Tālapuṭattheragāthā

1094. “Kadā (..0354) nuhaṃ pabbatakandarāsu, ekākiyo addutiyo vihassaṃ;
aniccato sabbabhavaṃ vipassaṃ, taṃ me idaṃ taṃ nu kadā bhavissati.

1095. “Kadā nuhaṃ bhinnapaṭandharo muni, kāsāvavattho amamo nirāso;
rāgañca dosañca tatheva mohaṃ, hantvā sukhī pavanagato vihassaṃ.

1096. “Kadā aniccaṃ vadharoganiḷaṃ, kāyaṃ imaṃ maccujarāyupaddutaṃ;
vipassamāno vītabhayo vihassaṃ, eko vane taṃ nu kadā bhavissati.

1097. “Kadā nuhaṃ bhayajananiṃ dukhāvahaṃ, taṇhālataṃ bahuvīdhānuva-
ttaniṃ;

paññāmayam tikhiṇamasim gahetvā, chetvā vase tampi kadā bhavissati.

1098. “Kadā nu paññāmayamuggatejaṃ, satthaṃ isīnaṃ sahasādiyitvā;
māraṃ sasenaṃ sahasā bhañjissaṃ, sīhāsane taṃ nu kadā bhavissati.

1099. “Kadā nuhaṃ sabbhi samāgamesu, diṭṭho bhava dhammagarūhi tāḍibhi;
yāthāvadassīhi jitindriyehi, padhāniyo taṃ nu kadā bhavissati.

1100. “Kadā nu maṃ tandi khudā pipāsā, vātātapā kīṭasarīsapā vā;
na bādhayissanti na taṃ giribbaje, atthatthiyaṃ taṃ nu kadā bhavissati.

1101. “Kadā (..0355) nu kho yaṃ viditaṃ mahesinā, cattāri saccāni sududda-
sāni;

samāhitatto satimā agacchaṃ, paññāya taṃ taṃ nu kadā bhavissati.

1102. “Kadā nu rūpe amite ca sadde, gandhe rase phusitabbe ca dhamme;
ādittatohaṃ samathehi yutto, paññāya dacchaṃ tadidaṃ kadā me.

1103. “Kadā nuhaṃ dubbacanena vutto, tatonimittaṃ vimano na hessaṃ;
atho pasatthopi tatonimittaṃ, tuṭṭho na hessaṃ tadidaṃ kadā me.

1104. “Kadā nu kaṭṭhe ca tiṇe latā ca, khandhe imehaṃ amite ca dhamme;

ajjhakkāneva ca bāhirāni ca, samaṃ tuleyyaṃ tadidaṃ kadā me.

1105. “Kadā nu maṃ pāvusakālamegho, navena toyena sacīvaraṃ vane;
isippayātamhi pathe vajantaṃ, ovassate taṃ nu kadā bhavissati.

1106. “Kadā mayūrassa sikhaṇḍino vane, dijassa sutvā girigabbhare rutaṃ;
paccuṭṭhahitvā amatassa pattiyā, saṃcintaye taṃ nu kadā bhavissati.

1107. “Kadā nu gaṅgaṃ yamaṃ sarassatiṃ, pātālakhittaṃ vaḷavāmukhañca

§.
asajjamāno patareyyamiddhiyā, vibhiṃsanaṃ taṃ nu kadā bhavissati.

1108. “Kadā (..0356) nu nāgo va asaṅgacārī, padālaye kāmagaṇesu chandaṃ;
nibbajayaṃ sabbasubhaṃ nimittaṃ, jhāne yuto taṃ nu kadā bhavissati.

1109. “Kadā iṇaṭṭova daliddako § nidhiṃ,

ārādhayitvā dhanikehi pīlito.

tuttho bhavissam adhigamma sāsanaṃ, mahesino taṃ nu kadā bhavissati.

1110. “Bahūni vassāni tayāmi yācito, ‘agāravāsena alaṃ nu te idaṃ’;
taṃ dāni maṃ pabbajitaṃ samānaṃ, kiṃkāraṇā citta tuvaṃ na yuñjasi.

1111. “Nanu ahaṃ citta tayāmi yācito, ‘giribbaje citrachadā vihaṅgamā’;
mahindaghosatthanitābhigajjino, te taṃ ramessanti vanami jhāyinaṃ.

1112. “Kulamhi mitte ca piye ca ñātake, khiḍḍāratim kāmagaṇaṅca loke;
sabbaṃ pahāya imamajjhupāgato, athopi tvaṃ citta na mayha tussasi.

1113. “Mameva etaṃ na hi tvaṃ paresaṃ, sannāhakāle paridevitena kiṃ;
sabbaṃ idaṃ calamiti pekkhamāno, abhinikkhamim amatapadaṃ jigīsaṃ.

1114. “Suyuttavādī dvipadānamuttamo, mahābhisakko naradammasārathi §.
‘cittaṃ calaṃ makkaṭasannibhaṃ iti, avītarāgena sudunnivārayaṃ’.

1115. “Kāmā (..0357) hi citrā madhurā manoramā, aviddasū yattha sitā puthu-
jjanā;

te dukkhamicchanti punabbhavesino, cittena nītā niraye nirākatā.

1116. “‘Mayūraṅcābhirutamhi kānane, dīpīhi byagghehi purakkhato vasaṃ;
kāye apekkhaṃ jaha mā virādhaya’, itissu maṃ citta pure niyuñjasi.

1117. “‘Bhāvehi jhānāni ca indriyāni ca, balāni bojhaṅgasamādhībhāvanā;
tisso ca vijjā phusa buddhasāsane’, itissu maṃ citta pure niyuñjasi.

1118. “‘Bhāvehi maggaṃ amatassa pattiyā, niyyānikaṃ sabbadukkhakkhayo-
gadhaṃ;

aṭṭhaṅgikaṃ sabbakilesasodhanaṃ’, itissu maṃ citta pure niyuñjasi.

1119. “‘Dukkanti khandhe paṭipassa yoniso, yato ca dukkhaṃ samudeti taṃ
jaha;

idheva dukkhassa karohi antaṃ’, itissu maṃ citta pure niyuñjasi.

1120. “‘Aniccaṃ dukkhanti vipassa yoniso, suññaṃ anattāti aghaṃ vadhanti ca.
manovicāre uparundha cetaso’, itissu maṃ citta pure niyuñjasi.

1121. “‘Muṇḍo virūpo abhisāpamāgato, kapālahatthova kulesu bhikkhasu;
yuñjassu satthuvacane mahesino’, itissu maṃ citta pure niyuñjasi.

1122. “‘Susamvutatto (..0358) visikhantare caraṃ, kulesu kāmesu asaṅgamā-
naso;

cando yathā dosinapuṇṇamāsiyā’, itissu maṃ citta pure niyuñjasi.

1123. “‘Āraññiko hohi ca piṇḍapātiko, sosāniko hohi ca paṃsukūliko;
nesajjiko hohi sadā dhute rato’, itissu maṃ citta pure niyuñjasi.

1124. “‘Ropetva rukkhāni yathā phalesī, mūle taruṃ chettu tameva icchasi;
tathūpamaṃ cittamidaṃ karosi, yaṃ maṃ aniccaṃhi cale niyuñjasi.

1125. “‘Arūpa dūraṅgama ekacāri, na te karissaṃ vacanaṃ idānihaṃ;
dukkhā hi kāmā kaṭukā mahabbhaya, nibbānamevābhimano carissaṃ.

1126. “‘Nāhaṃ alakkhyā ahirikkatāya vā, na cittahetū na ca dūrakantanā;
ājīvahetū ca ahaṃ na nikkhamim, kato ca te citta paṭissavo mayā.

1127. “‘Appicchatā sappurisehi vaṇṇitā, makkhappahānaṃ vūpasamo
dukhassa’;

itissu maṃ citta tadā niyuñjasi, idāni tvaṃ gacchasi pubbacīṇṇaṃ.

1128. “Taṇhā avijjā ca piyāpiyañca, subhāni rūpāni sukhā ca vedanā;
manāpiyā kāmaguṇā ca vantā, vante ahaṃ āvamituṃ na ussahe.

1129. “Sabbattha (..0359) te citta vaco kataṃ mayā, bahūsu jātisu na mesi
kopito;

ajjhattasambhavo kataññutāya te, dukkhe ciraṃ saṃsaritaṃ tayā kate.

1130. “Tvaññeva no citta karosi brāhmaṇo §, tvaṃ khattiyo rājadasī § karosi.
vessā ca suddā ca bhavāma ekadā, devattanaṃ vāpi taveva vāhasā.

1131. “Taveva hetū asurā bhavāmase, tvaṃmūlakaṃ nerayikā bhavāmase;
atho tiracchānagatāpi ekadā, petattanaṃ vāpi taveva vāhasā.

1132. “Nanu dubbhissasi maṃ punappunaṃ, muhuṃ muhuṃ cāraṇikaṃva
dassayaṃ;

ummattakeneva mayā palobhasi, kiñcāpi te citta virādhitaṃ mayā.

1133. “Idaṃ pure cittamacāri cārikaṃ, yenicchakaṃ yatthakāmaṃ yathāsukhaṃ.
tadajjahaṃ niggahessāmi yoniso, hatthippabhinnaṃ viya aṅkusaggaho.

1134. “Sathā ca me lokamimaṃ adhiṭṭhahi, aniccato addhuvato asārato;
pakkhanda maṃ citta jinassa sāsane, tārehi oghā mahatā suduttarā.

1135. “Na te idaṃ citta yathā purāṇakaṃ, nāhaṃ alaṃ tuyha vase nivattituṃ §.
mahesino pabbajitomi sāsane, na mādisā honti vināsadhārino.

1136. “Nagā (..0360) samuddā saritā vasundharā, disā catasso vidisā adho
divā;

sabbe aniccā tibhavā upaddutā, kuhiṃ gato citta sukhaṃ ramissasi.

1137. “Dhitipparaṃ kiṃ mama citta kāhisi, na te alaṃ citta vasānuvattako;
na jātu bhastaṃ ubhatomukhaṃ chupe, dhiratthu pūraṃ nava sotasandaniṃ.

1138. “Varāha-eṇeyyavigāḷhasevite, pabbhāraḷḷe pakateva sundare;
navambunā pāvusasitthakānane, tahiṃ guhāgehagato ramissasi.

1139. “Sunīlagīvā susikhā supekhunā, sucittapattacchadanā vihaṅgamā;
sumañjughosatthanitābhigajjino, te taṃ ramessanti vanamhi jhāyinaṃ.

1140. “Vuṭṭhamhi deve caturaṅgule tiṇe, saṃpupphite meghanibhamhi kānane;
nagantare viṭapisamo sayissaṃ, taṃ me mudū hehiti tūlasannibhaṃ.

1141. “Tathā tu kassāmi yathāpi issaro, yaṃ labbhati tenapi hotu me alaṃ;
na tāhaṃ kassāmi yathā atandito, biḷārabhastava yathā sumadditaṃ.

1142. “Tathā tu kassāmi yathāpi issaro, yaṃ labbhati tenapi hotu me alaṃ;

vīriyena taṃ mayha vasānayissaṃ, gajaṃva mattaṃ kusalaṅkusaggaho.

1143. “Tayā (..0361) sudantena avatṭhitena hi, hayena yoggācariyova ujjunā;
pahomi maggaṃ paṭipajjitum sivaṃ, cittānurakkhīhi sadā nisevitaṃ.

1144. “Ārammaṇe taṃ balasā nibandhisam, nāgaṃva thambhamhi daḥhāya
rajjuyā;

taṃ me suguttaṃ satiyā subhāvitaṃ, anissitaṃ sabbabhavesu hehisi.

1145. “Paññāya chetvā vipathānusārinaṃ, yogena niggayha pathe nivesiya;
disvā samudayaṃ vibhavañca sambhavaṃ, dāyādako hehisi aggavādino.

1146. “Catubbipallāsavasam adhiṭṭhitaṃ, gāmaṇḍalamva parinesi citta maṃ;
nanu § saṃyojanabandhanacchidaṃ, saṃsevase kāruṇikaṃ mahāmunim.

1147. “Migo yathā seri sucittakānane, rammaṃ giriṃ pāvusa-abbhamālinim §.
anākule tattha nage ramissaṃ §, asaṃsayam citta parā bhavissasi.

1148. “Ye tuyha chandena vasena vattino, narā ca nārī ca anubhonti yaṃ
sukhaṃ;

aviddasū māravasānuvattino, bhavābhinandī tava citta sāvakā”ti.

... Tālapuṭo thero

Paññāsanipāto niṭṭhito.

Tatruddānaṃ-

Paññāsamhi nipātamhi, eko tālapuṭo suci;

gāthāyo tattha paññāsa, puna pañca ca uttarīti.

20. Saṭṭhinipāto

1. Mahāmoggallānattheragāthā

1149. “Āraññikā (..0362) piṇḍapātikā, uñchāpattāgate ratā;
dālemu maccuno senaṃ, ajjhattaṃ susamāhitā.

1150. “Āraññikā piṇḍapātikā, uñchāpattāgate ratā;
dhunāma maccuno senaṃ, naḷāgāraṃva kuñjaro.

1151. “Rukkhamūlikā sātatikā, uñchāpattāgate ratā;
dālemu maccuno senaṃ, ajjhattaṃ susamāhitā.

1152. “Rukkhamūlikā sātatikā, uñchāpattāgate ratā;
dhunāma maccuno senaṃ, naḷāgāraṃva kuñjaro.

1153. “Aṭṭhikaṅkalakuṭike, maṃsanhārupasibbite;
dhiratthu pure duggandhe, paragatte mamāyase.

1154. “Gūthabhaste taconaddhe, uragaṇḍipisācini;
nava sotāni te kāye, yāni sandanti sabbadā.

1155. “Tava sarīraṃ navasotaṃ, duggandhakaraṃ paribandhaṃ;
bhikkhu parivajjayate taṃ, mīlhaṃ ca yathā sucikāmo.
1156. “Evañce taṃ jano jaññā, yathā jānāmi taṃ ahaṃ;
āraḱā parivajjeyya, gūthaṭṭhānaṃva pāvuse”.
1157. “Evametaṃ mahāvīra, yathā samaṇa bhāsasi;
ettha ceke visīdanti, paṅkamhiva jaraggavo.
1158. “Ākāsamhi haliddiyā, yo maññetha rajetave;
aññena vāpi raṅgena, vighātudayameva taṃ.
1159. “Tadākāsasamaṃ cittaṃ, ajjhattaṃ susamāhitaṃ;
mā pāpacitte āsādi, aggikhandhaṃva pakkhimā.
1160. “Passa cittaḱataṃ bimbaṃ, arukāyaṃ samussitaṃ;
āturaṃ bahusaṅkappaṃ, yassa natthi dhuvaṃ ṭṭhiti.
1161. “Passa cittaḱataṃ rūpaṃ, maṇinā kuṇḁalena ca;
aṭṭhiṃ tacena onaddhaṃ, saha vatthehi sobhati.
1162. “Alattakakata (..0363) pādā, mukhaṃ cuṇṇakamakkhitaṃ;
alaṃ bālassa mohāya, no ca pāragavesino.
1163. “Aṭṭhapadakatā kesā, nettā añjanamakkhita;
alaṃ bālassa mohāya, no ca pāragavesino.
1164. “Añjanīva navā citta, pūtikāyo alaṅkato;
alaṃ bālassa mohāya, no ca pāragavesino.
1165. “Odahi migavo pāsaṃ, nāsadā vāguraṃ migo;
bhutvā nivāpaṃ gacchāma, kaddante migabandhake.
1166. “Chinno pāso migavassa, nāsadā vāguraṃ migo;
bhutvā nivāpaṃ gacchāma, socante migaluddake.
1167. “Tadāsi yaṃ bhimsanakaṃ, tadāsi lomahaṃsanam;
anekākārasampanne, sārīputtamhi nibbute.
1168. § “Aniccā vata saṅkhārā uppādavaya dhammino.
upajjitvā nirujjhanti, tesam vūpasamo sukho.
1169. “Sukhumaṃ te paṭivijjhanti, vālaggaṃ usunā yathā;
ye paṅcakkhandhe passanti, parato no ca attato.
1170. “Ye ca passanti saṅkhāre, parato no ca attato;
paccabyādhiṃsu nipuṇam, vālaggaṃ usunā yathā.
1171. § “Sattiyā viya omaṭṭho, ḁayhamānova matthake.
kāmarāgappahānāya, sato bhikkhu paribbaje.
1172. § “Sattiyā viya omaṭṭho, ḁayhamānova matthake.
bhavarāgappahānāya, sato bhikkhu paribbaje”.
1173. “Codito bhāvitattena, sarīrantimadhārinā;
migāramātupāsādaṃ, pādaṅguṭṭhena kampayim.
1174. “Nayidaṃ sithilamārabba, nayidaṃ appena thāmasā;
nibbānamadhigantabbaṃ, sabbagantha-pamocanaṃ.
1175. “Ayañca daharo bhikkhu, ayamuttamaporiso;
dhāreti antimam deham, jetvā māraṃ savāhinim §.

1176. “Vivaramanupabhanti (..0364) vijjutā, vebhārassa ca paṇḍavassa ca;
nagavivaragato jhāyati, putto appaṭimassa tādino.
1177. “Upasanto uparato, pantasenāsano muni;
dāyādo buddhaseṭṭhassa, brahmunā abhivandito.
1178. “Upasantaṃ uparataṃ, pantasenāsanaṃ munim;
dāyādaṃ buddhaseṭṭhassa, vanda brāhmaṇa kassapaṃ.
1179. “Yo ca jātisataṃ gacche, sabbā brāhmaṇajātiyo;
sottiyo vedasampanno, manussesu punappaṇaṃ.
1180. “Ajjhāyakopi ce assa, tiṇṇaṃ vedāna pāragū;
etassa vandanāyetaṃ, kamaṃ nāgghati soḷasiṃ.
1181. “Yo so aṭṭha vimokkhāni, purebhattaṃ aphassayi §.
anulomaṃ paṭilomaṃ, tato piṇḍāya gacchati.
1182. “Tādisaṃ bhikkhuṃ māsādi §, mātṭānaṃ khaṇi brāhmaṇa.
abhippasādehi maṇaṃ, arahantamhi tādine;
khippaṃ pañjaliko vanda, mā te vijaṭi matthakaṃ.

1183. “Neso passati saddhammaṃ, saṃsārena purakkhato;
adhogamaṃ jimhapathaṃ, kummaggamanudhāvati.
1184. “Kimīva mīḷhasallitto, saṅkhāre adhimucchito;
pagāḷho lābhasakkāre, tuccho gacchati poṭṭhilo.
1185. “Imañca passa āyantaṃ, sāriputtaṃ sudassanaṃ;
vimuttaṃ ubhatobhāge, ajjhattaṃ susamāhitaṃ.
1186. “Visallaṃ khīṇasaṃyogaṃ, tevijaṃ macchūhāyinaṃ;
dakkhiṇeyyaṃ manussānaṃ, puññakkhettaṃ anuttaraṃ.
1187. “Ete sambahulā devā, iddhimanto yasassino;
dasa devasahassāni, sabbe brahmapurohitā;
moggallānaṃ namassantā, tiṭṭhanti pañjalikatā.
1188. “‘Namo te purisājañña, namo te purisuttama;
yassa te āsavā khīṇā, dakkhiṇeyyosi mārisa’.
1189. “Pūjito (..0365) naradevena, uppanno maraṇābhībhū;
puṇḍarīkaṃva toyena, saṅkhārenupalippati.
1190. “Yassa muhuttana saḥassadhā loko, saṃvidito sabrahmakappo vasi;
iddhiguṇe cutupapāte kāle, passati devatā sa bhikkhu.
1191. “Sāriputtova paññāya, sīlena upasamena ca;
yopi pāraṅgato bhikkhu, etāvaparamo siyā.
1192. “Koṭisatasahassassa, attabhāvaṃ khaṇena nimmīne;
ahaṃ vikubbanāsu kusalo, vasībhūtomhi iddhiyā.
1193. “Samādhivijjāvasipāramīgato, moggallānagotto asitassa sāsane;
dhīro samucchindi samāhitindriyo, nāgo yathā pūtilataṃva bandhanaṃ.
1194. “Pariciṇṇo mayā sathā, kataṃ buddhassa sāsanaṃ;
ohito garuko bhāro, bhavanetti samūhatā.
1195. “Yassa catthāya pabbajito, agārasmānagāriyaṃ;
so me attho anupatto, sabbasaṃyojanakkhaya.
1196. § “Kīdiso nirayo āsi, yattha dussī apaccatha.
vidhuraṃ sāvakaṃsajja, kakusandhañca brāhmaṇaṃ.
1197. “Sataṃ āsi ayosaṅkū, sabbe paccattavedanā;
īdiso nirayo āsi, yattha dussī apaccatha;
vidhuraṃ sāvakaṃsajja, kakusandhañca brāhmaṇaṃ.
1198. “Yo etamabhijānāti, bhikkhu buddhassa sāvako;
tādisaṃ bhikkhumāsajja, kaṇha dukkhaṃ nigacchasi.
1199. “Majjhesarasmim § tiṭṭhanti, vimānā kappathāyino.
veḷuriyavaṇṇā rucirā, accimanto pabhassarā;
accharā tattha naccanti, puthu nānattavaṇṇiyo.
1200. “Yo (..0366) etamabhijānāti ...pe... kaṇha dukkhaṃ nigacchasi.
1201. “Yo ve buddhena codito, bhikkhusaṅghassa pekkhato;
migāramātupāsādaṃ, pādaṅgutṭhena kampayī.
1202. “Yo etamabhijānāti ...pe... kaṇha dukkhaṃ nigacchasi.
1203. “Yo vejayantapāsādaṃ, pādaṅgutṭhena kampayī;

- iddhibalenupatthaddho, saṃvejesi ca devatā.
- 1204.** “Yo etamabhijānāti ...pe... kaṇha dukkhaṃ nigacchasi.
- 1204.** “Yo etamabhijānāti ...pe... kaṇha dukkhaṃ nigacchasi.
- 1205.** “Yo vejayantapāsāde, sakkaṃ so paripucchati;
api āvuso jānāsi, taṇhakkhayavimuttiyo;
tassa sakko viyākāsi, pañhaṃ puṭṭho yathātathaṃ.
- 1206.** “Yo etamabhijānāti ...pe... kaṇha dukkhaṃ nigacchasi.
- 1207.** “Yo brahmānaṃ paripucchati, sudhammāyaṃ ʒhito ʒ sabhaṃ.
ajjāpi tyāvuso sā diṭṭhi, yā te diṭṭhi pure ahu;
passasi vītivattantaṃ, brahmaloke pabhassaraṃ.
- 1208.** “Tassa brahmā viyākāsi, pañhaṃ puṭṭho yathātathaṃ;
na me mārisa sā diṭṭhi, yā me diṭṭhi pure ahu.
- 1209.** “Passāmi vītivattantaṃ, brahmaloke pabhassaraṃ;
sohaṃ ajja kathaṃ vajjaṃ, ahaṃ niccomhi sassato.
- 1210.** “Yo etamabhijānāti ...pe... kaṇha dukkhaṃ nigacchasi.
- 1211.** “Yo mahāneruno kūṭaṃ, vimokkhena aphasayaṃ ʒ.
vanaṃ pubbavidehānaṃ, ye ca bhūmisayā narā.
- 1212.** “Yo etamabhijānāti, bhikkhu buddhassa sāvako;
tādisaṃ bhikkhumāsajja, kaṇha dukkhaṃ nigacchasi.
- 1213.** “Na ve aggi cetayati, ahaṃ bālaṃ ḍahāmīti;
bālova jalitaṃ aggiṃ, āsajja naṃ paḍayhati.
- 1214.** “Evameva tuvaṃ māra, āsajja naṃ tathāgataṃ;
sayāṃ ḍahissasi attānaṃ, bālo aggiṃva samphusaṃ.
- 1215.** “Apuññaṃ (..0367) pasavī māro, āsajja naṃ tathāgataṃ;
kiṃ nu maññasi pāpima, na me pāpaṃ vipaccati.
- 1216.** “Karato te cīyate ʒ pāpaṃ, cirarattāya antaka.
māra nibbinda buddhamhā, āsaṃ mākāsi bhikkhusu.
- 1217.** “Iti māraṃ atajjesi, bhikkhu bhesakaḷāvane;
tato so dummano yakkho, tatthevantaradhāyathā”ti.
Itthaṃ sudaṃ āyasmā mahāmoggallāno ʒ thero gāthāyo abhāsithāti.

Saṭṭhinipāto niṭṭhito.

Tatruddānaṃ-

saṭṭhikamhi nipātamhi, moggallāno mahiddhiko;
ekova theragāthāyo, aṭṭhasaṭṭhi bhavanti tāti.

21. Mahānipāto

1. Vaṅḡisattheragāthā

1218. “Nikkhantaṃ (..0368) vata maṃ santaṃ, agārasmānagāriyaṃ;
vitakkā upadhāvanti, pagabbhā kaṇhato ime.
1219. “Uggaputtā mahissāsā, sikkhitā daḷhadhammino §.
samantā parikireyyuṃ, sahasaṃ apalāyinaṃ.
1220. “Sacepi ettakā § bhiyyo, āgamissanti itthiyo.
neva maṃ byādhayissanti §, dhamme samhi § patiṭṭhito.
1221. “Sakkhī hi me sutamaṃ etaṃ, buddhassādiccabandhuno;
nibbānagamanaṃ maggaṃ, tatha me nirato mano.
1222. “Evaṃ ce maṃ viharantaṃ, pāpima upagacchasi;
tathā maccu karissāmi, na me maggampi dakkhasi.
1223. “Aratiñca § ratiñca pahāya, sabbaso gehasitañca vitakkaṃ.

- vanatham na kareyya kuhiñci, nibbanatho avanatho sa § bhikkhu.
- 1224.** “Yamidha pathaviñca vehāsaṃ, rūpagataṃ jagatogadhaṃ kiñci; pariḷiyati sabbamaniccaṃ, evaṃ samecca caranti mutattā.
- 1225.** “Upadhīsu janā gadhitāse, diṭṭhasute § paṭighe ca mute ca. ettha vinodaya chandamanejo, yo hettha na limpati muni tamāhu §.
- 1226.** “Atha (..0369) saṭṭhisitā savitakkā, puthujjanatāya § adhammā nivitṭhā. na ca vaggagatassa kuhiñci, no pana duṭṭhullagāhī § sa bhikkhu.
- 1227.** “Dabbo cirarattasamāhito, akuhako nipako apihālu; santaṃ padaṃ ajjhagamā muni, paṭicca parinibbuto kaṅkhati kālaṃ.
- 1228.** “Mānaṃ pajahassu gotama, mānapathañca jahassu asesam; mānapathamhi sa mucchito, vippaṭisārīhuvā cirarattaṃ.
- 1229.** “Makkhena makkhitā pajā, mānahatā nirayaṃ papatanti; socanti janā cirarattaṃ, mānahatā nirayaṃ upapannā.
- 1230.** “Na hi socati bhikkhu kadāci, maggajino sammā paṭipanno; kittiñca sukhañcānubhoti, dhammadasoti tamāhu tathattaṃ.
- 1231.** “Tasmā akhilo idha § padhānavā, nīvaraṇāni pahāya visuddho. mānañca pahāya asesam, vijjāyantakaro samitāvī.
- 1232.** “Kāmarāgena ḍayhāmi, cittaṃ me pariḍayhati; sādhu nibbāpanaṃ brūhi, anukampāya gotama.
- 1233.** “Saññāya (..0370) vipariyesā, cittaṃ te pariḍayhati; nimittaṃ parivajjehi, subhaṃ rāgūpasamhitaṃ () §.
- 1234.** “Asubhāya cittaṃ bhāvehi, ekaggaṃ susamāhitaṃ; sati kāyagatā tyatthu, nibbidābahulo bhava.
- 1235.** “Animittañca bhāvehi, mānānusayamujjaha; tato mānābhisaṃmayā, upasanto carissasi.
- 1236.** “Tameva vācaṃ bhāseyya, yāyattānaṃ na tāpaye; pare ca na vihiṃseyya, sā ve vācā subhāsītā.
- 1237.** “Piyavācameva bhāseyya, yā vācā paṭinanditā; yaṃ anādāya pāpāni, paresam bhāsate piyaṃ.
- 1238.** “Saccaṃ ve amatā vācā, esa dhammo sanantano; sacce atthe ca dhamme ca, āhu santo patiṭṭhitā.
- 1239.** “Yaṃ buddho bhāsati vācaṃ, khemaṃ nibbānapattiyā; dukkhassantakiriyaṃ, sā ve vācānamuttamā.
- 1240.** “Gambhīrapañño medhāvī, maggāmaggassa kovido; sārīputto mahāpañño, dhammaṃ deseti bhikkhunaṃ.
- 1241.** “Saṅkhittenapi deseti, vitthārenapi bhāsati; sālikāyiva nigghoso, paṭibhānaṃ udiyyati §.
- 1242.** “Tassa taṃ desayantassa, suṇanti madhuraṃ giraṃ; sarena rajanīyena, savanīyena vaggunā; udaggacittā muditā, sotaṃ odhenti bhikkhavo.
- 1243.** “Ajja pannarase visuddhiyā, bhikkhū pañcasatā samāgatā; saṃyojanabandhanacchidā, anīghā khīṇapunabbhavā isī.

1244. “Cakkavattī yathā rājā, amaccaparivārito;
samantā anupariyeti, sāgarantaṃ mahiṃ imaṃ.
1245. “Evaṃ (..0371) vijitasāṅgāmaṃ, satthavāhaṃ anuttaraṃ;
sāvakā payirupāsanti, tevijjā maccuhāyino.
1246. “Sabbe bhagavato puttā, palāpettha na vijjati;
taṇhāsallassa hantāraṃ, vande ādiccabandhunaṃ.
1247. “Parosahassaṃ bhikkhūnaṃ, sugataṃ payirupāsati;
desentaṃ virajaṃ dhammaṃ, nibbānaṃ akutobhayaṃ.
1248. “Suṇanti dhammaṃ vimalaṃ, sammāsambuddhadesitaṃ;
sobhati vata sambuddho, bhikkhusaṅghapurakkhato.
1249. “Nāganāmo’si bhagavā, isīnaṃ isisattamo;
mahāmeghova hutvāna, sāvake abhivassasi.
1250. “Divā vihārā nikkhamma, satthudassanakamyatā;
sāvako te mahāvīra, pāde vandati vaṅgiso.
1251. “Ummaggapathaṃ mārassa, abhibhuyya carati pabhijja khilāni;
taṃ passatha bandhapamuñcakaraṃ, asitaṃva bhāgaso pavibhajja.
1252. “Oghassa hi nitaraṇatthaṃ, anekavihitaṃ maggaṃ akkhāsi;
tasmiñca amate akkhāte, dhammadasā ṭhitā asaṃhīrā.
1253. “Pajjotakaro ativijja §, sabbaṭhitīnaṃ atikkamamaddasa §.
ñatvā ca sacchikatvā ca, aggaṃ so desayi dasaddhānaṃ.
1254. “Evaṃ sudesite dhamme, ko pamādo vijānataṃ dhammaṃ;
tasmā hi tassa bhagavato sāsane, appamatto sadā namassamanusikkhe.
1255. “Buddhānubuddho yo thero, koṇḍañño tibbanikkamo;
lābhī sukhavīhārānaṃ, vivekānaṃ abhiṇhaso.
1256. “Yaṃ (..0372) sāvakena pattabbaṃ, satthu sāsana-kārinā;
sabbassa taṃ anuppattaṃ, appamattassa sikkhato.
1257. “Mahānubhāvo tevijjo, cetopariyakovido;
koṇḍañño buddhadāyādo, pāde vandati satthuno.
1258. “Nagassa passe āsīnaṃ, muniṃ dukkhassa pāraguṃ;
sāvakā payirupāsanti, tevijjā maccuhāyino.
1259. “Cetasā § anupariyeti, moggallāno mahiddhiko.
cittaṃ nesaṃ samanvesaṃ §, vippamuttaṃ nirūpadhiṃ.
1260. “Evaṃ sabbaṅgasampannaṃ, muniṃ dukkhassa pāraguṃ;
anekākārasampannaṃ, payirupāsanti gotamaṃ.
1261. “Cando yathā vigatavalāhake nabhe, virocati vītamalova bhāṇumā;
evampi aṅgīrasa tvaṃ mahāmuni, atirocasi yasa-sā sabbalokaṃ.
1262. “Kāveyyamattā vicarimha pubbe, gāmā gāmaṃ purā puraṃ;
athaddasāma sambuddhaṃ, sabbadhammāna pāraguṃ.
1263. “So me dhammamadesesi, muni dukkhassa pāragū;
dhammaṃ sutvā pasīdimha, saddhā § no udapajjatha.
1264. “Tassāhaṃ vacanaṃ sutvā, khandhe āyatanāni ca;
dhātuyo ca viditvāna, pabbajiṃ anagāriyaṃ.

1265. “Bahūnaṃ vata atthāya, uppajjanti tathāgatā;
itthīnaṃ purisānañca, ye te sāsanaḱārakā.

1266. “Tesaṃ kho vata atthāya, bodhimajjhagamā muni;
bhikkhūnaṃ bhikkhunīnañca, ye nirāmagataddasā.

1267. “Sudesitā cakkhumatā, buddhenādiccabandhunā;

cattāri ariyasaccāni, anukampāya pāṇinaṃ.

1268. “Dukkhaṃ (..0373) dukkhasamuppādaṃ, dukkhassa ca atikkamaṃ;
ariyaṃ caṭṭhaṅgikaṃ maggaṃ, dukkhūpasamagāminaṃ.

1269. “Evamete tathā vuttā, diṭṭhā me te yathā tathā;
sadattho me anuppatto, kataṃ buddhassa sāsanaṃ.

1270. “Svāgataṃ vata me āsi, mama buddhassa santike;
suvibhattesu § dhammesu, yaṃ seṭṭhaṃ tadupāgamiṃ.

1271. “Abhiññāpāramippatto, sotadhātu visodhitā;
tevijjo iddhipattomhi, cetopariyakovido.

1272. “Pucchāmi satthāramanomapaññaṃ, diṭṭheva dhamme yo vicikicchānaṃ
chettā;

aggāḷave kālamakāsi bhikkhu, ñāto yasassī abhinibbutatto.

1273. “Nigrodhakappo iti tassa nāmaṃ, tayā kataṃ bhagavā brāhmaṇassa;
so taṃ namassaṃ acari mutyapekho, āradhaviṇṇaṃ daḷhadhammadassī.

1274. “Taṃ sāvakaṃ sakka mayampi sabbe, aññātumicchāma samantacakkhu.
samavaṭṭhitā no savanāya sotā §, tuvaṃ no satthā tvamanuttarosi”.

1275. Chinda no vicikicchaṃ brūhi metaṃ, parinibbutaṃ vedaya bhūripañña;
majjheva no bhāsa samantacakkhu, sakkova devāna sahasanetto.

1276. “Ye keci ganthā idha mohamaggā, aññāṇapakkhā vicikicchaṭṭhānā;
tathāgataṃ patvā na te bhavanti, cakkhuñhi etaṃ paramaṃ narānaṃ.

1277. “No (..0374) ce hi jātu puriso kilese, vāto yathā abbhaghaṇaṃ vihāne;
tamovassa nivuto sabbaloko, jotimantopi na pabhāseyyuṃ §.

1278. “Dhīrā ca pajjotakarā bhavanti, taṃ taṃ ahaṃ vīra tatheva mañña;
vipassinaṃ jānamupāgamimha, parisāsu no āvikarohi kammaṃ.

1279. “Khippaṃ giraṃ eraya vaggu vagguṃ, haṃsova paggayha saṅkamaṃ
nikūja;

bindussarena suvikappitena, sabbeva te ujjugatā suṇoma.

1280. “Pahīnajātīmaraṇaṃ asesamaṃ, niggayha dhonaṃ vadessāmi § dhammaṃ.
na kāmakāro hi § puthujjanānaṃ, saṅkheyyakāro ca § tathāgatānaṃ.

1281. “Sampannaveyyākaraṇaṃ tavedaṃ, samujjupaññaṃ samuggahītaṃ;
ayamañjali pacchimo suppaṇāmito, mā mohayī jānāmanomapañña.

1282. “Paropamaṃ ariyadhammaṃ viditvā, mā mohayī jānāmanomavīriya;
vāriṃ yathā ghammani ghammatatto, vācābhikaṅkhāmi suttaṃ pavassa.

1283. “Yadatthikaṃ brahmacariyaṃ acari, kappāyano kaccissataṃ amoghaṃ;
nibbāyi so ādu sa-upādiseso §, yathā vimutto ahu taṃ suṇoma.

1284. “Acchecchi (..0375) taṇhaṃ idha nāmarūpe,
(iti bhagavā) kaṇhassa sotaṃ dīgharattānusayitaṃ;
atāri jātiṃ maraṇaṃ asesamaṃ, iccabravi bhagavā pañcaseṭṭho.

1285. “Esa sutvā pasidāmi, vaco te isisattama;
amoghaṃ kira me puṭṭhaṃ, na maṃ vañcesi brāhmaṇo.

1286. “Yathā vādī tathā kāri, ahu buddhassa sāvako;
acchecchi maccuno jālaṃ, tataṃ māyāvino daḷhaṃ.

1287. “Addasa bhagavā ādiṃ, upādānassa kappiyo;
accagā vata kappāno, maccudheyyaṃ suduttaraṃ.

1288. “Taṃ devadevaṃ vandāmi, puttaṃ te dvipaduttama;
anujātaṃ mahāvīraṃ, nāgaṃ nāgassa orasaṃ” ti.

Itthaṃ sudaṃ āyasmā vaṅgīso thero gāthāyo

Abhāsittāti.

Mahānipāto niṭṭhito.

Tatruddānaṃ-

Sattatimhi nipātamhi, vaṅgīso paṭibhāṇavā;
ekova thero natthañño, gāthāyo ekasattatīti.

Niṭṭhitā theragāthāyo.

Tatruddānaṃ-

Sahassaṃ honti tā gāthā, tīṇi saṭṭhisatāni ca;
therā ca dve satā saṭṭhi, cattāro ca pakāsītā.
Sīhanādaṃ naditvāna, buddhaputtā anāsavā;
khemantaṃ pāpuṇitvāna, aggikhandhāva nibbutāti.

Theragāthāpāḷi niṭṭhitā.